

**NATIONAL ASSEMBLY OF  
SEYCHELLES**

*Wednesday 15<sup>th</sup> May 2024*

*The Assembly met at 901am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou bann zofisyé Lasanble e tou lodyans ki pe swif nou la deor. Byenveni pour travay ozordi e nou pe travay lo Mosyon. Bon, nou pour komans avek Mosyon, Mosyon par Onorab John Hoareau.

**HON SEBASTIEN PILLAY**

*(Off-Mic)*

**MR SPEAKER**

Onorab Pillay ou – nou'n fer en lareg ki si ou pour entervenir avan biznes i komanse ou bezwen klarifye avek mwan avan. E mon pa pour sanz sa lareg. So ou ti'n devret enform mwan lo ki i pwen ou le adres Lasanble, e mwan ti a'n konsidere. Mersi.

**HON SEBASTIEN PILLAY**

*(Off-Mic)*

**MR SPEAKER**

Mersi. Mersi menm sa, menm sa tou Manm ki anvi fer lentervansyon, en lentervansyon avan biznes Lasanble i komanse, i bezwen enform mwan e mwan avan e mon a konsidere. Mersi. Nou a komans avek Mosyon Onorab John Hoareau, Onorab ou kapab soumet ou Mosyon.

**HON JOHN HOAREAU**

Bonzour Mr Speaker. Bonzour tou Manm Onorab e bonzour tou dimoun a lekout.

Mr Speaker, Mosyon ki mon'n table pour Merkredi le 15 May, i lir koumsa:-

Lasanble Nasjonal i felisit tou travayer servis publik ki pe fer zot travay byen e konsyansyezman pou benefis nou pei, e demann avek lezot pou travay e pou azir dan en fason profesyonnel a tou moman e donn zot kliyan meyer servis posib avek bi pou retir fristrasyon e ed pei avans devan. Mersi.

**MR SPEAKER**

Mersi. Nou pour ganny segonnman pour sa Mosyon. Onorab Naidu?

**HON SATHYA NAIDU**

Yes. Mr Speaker, mersi. Mon le segonn Mosyon anmennen par Onorab John Hoareau e mon le rezerv mon drwa pour koz pli tar. Mersi.

**MR SPEAKER**

Mersi, Onorab, ou kapab adres ou Mosyon.

**HON JOHN HOAREAU**

Mersi Mr Speaker. Mr Speaker, mon ti a kontan ki nou pran en lapros bipartisan lo sa Mosyon ki devan. Vi ki sa Mosyon pour tous tou kous popilasyon, enkli bann viziter ki vin dan nou pei.

I en Mosyon ki pe ganny anmennen pour ranforsi en lapel pour Sesel ganny en servis piblik profesyonnel, ki nou dirizan in fer, an plizyer repriz depi ki in pran sa novo manda koman Prezidan.

Pa byen lontan Minister Finans osi, in pibliy en *National Strategic Plan* kot in met servis piblik koman premye pilye parmi 6, priyорite nasyonal.

E in menm fer en demars avek tou departman Gouvernman pour zot enkli sa dan zot *Departmental Strategic Plan*.

Alor mon le ki ozordi nou fer en deba ki konstriktiv san montre ledwa lo personne e san tret sa size koman en loportinite pour fer propagann politik.

Mon konsidere ki nou dwa sa pep, nou dwa pep Seselwa en deba ki balanse e – nou bezwen egzamin sa size sistematikman e obzektivman, dan en fason entelizan, kot

nou rod solisyon olye reste pri dan negativite e form parti problem nou menm.

Mr Speaker, servis piblik i ganny defini koman en servis ki bann departman Gouvernman, ou bann lazans gouvernmantal i donn en dimoun oubyen en kominote.

E souvandfwa sa servis i swa gratwit, oubyen pour enn pti sonm administrativ san regard lo grander ou pos, oubyen vre kout sa servis. Annefe sa i en norm dan laplipar pei ki demokratik.

Alor bann dimoun ki donn sa servis nou apel zot bann *civil servant*, oubyen serviter Lepep.

Mr Speaker, o debi nou bezwen konteksyaliz sa size, an prenon kont ki Sesel an se moman pa ankor dekouver okenn grans sours mineral.

E apard ki pwason ki debark lo nou Por, pour transformasyon nou napa gran lendistri transformatif. E nou lekonomi i prensipalman baze lo bann servis - lo *service industries*.

Sa i enkli servis ospitalite, servis *corporate providers*, e lezot servis ki nou rann nou pep. Sa i fer ki servis e relasyon konsonmater i vin nou lokipasyon prensipal.

Mr Speaker, avan ki mon al lo detay, lo bann defi ki servis piblik dan nou pei – lo bann defi servis piblik dan nou

pei, les mwan pran loportinite pour mwan felisit tou travayer dan servis piblik ki pe donn en tre bon servis avek bokou profesyonnalizm.

I pour mal pou tret e kategoriz tou travayer parey, akoz i neseser rekonnet ki annan bokou ki pe met bokou zefor e travay avek tou lonnekte e profesyonnalizm.

Souvandfwa nou mank loportinite pou dir zot mersi. Atraver sa Mosyon, mon le ankor enn fwa, dir zot mersi e kontinyen travay dir.

Parfwa ler nou pa dir mersi kot fodre, e rekonnet zefor i vin en souris dekourazman pour sa group travayer ki pe donn tou.

Mr Speaker, nou bezwen osi rekonnet ki problem dan servis piblik dan Sesel, i enn ki pa fek komanse. Malerezman annan de fwa nou vwar kot politisyen ki enterfer e zot met plis dezord pour zot ganny en gen politik e sa i tre dezapwentan.

Par egzanp, ler en serten politisyen dan serten *meeting*, avek son bann aktivis ti demann avek zot pour - anmenn politik dan travay e pa korpere avek zot siperyer ensidswit.

Oubyen ler Dokter i dir avek en pasyan ki'n vin vwar en spesyalis a en moman, kot en spesyalis pa ti ankor antre dan pei, 'be pa ou'n tik anler'!

Olye zantiman donn li en leskiz ki valab.

Sa i fer nou realize ki malgre tou zefor ki pe ganny mete, pour amelyor servis piblik, i annan en mannev ki pe ganny orkestre pour sabotaz sikse sa ladministrasyon.

Si nou onnet avek nou lekor, nou kapab konstate i annan plizyer faktor ki kapab kontribye pour anmenn dezapwentman oubyen fristrasyon parmi nou pep, ler nou pe rod en servis avek bann lofis Gouvernman.

Mr Speaker, annou premyerman egzamin *mindset* dan servis piblik. Ler nou ti komans nou manda, Prezidan ti fer byen resorti ki nou bezwen tret servis piblik parey si nou ti pour fer, si ti nou biznes personnel.

Lozik ek klervwayans deryer sa analozi i evidan. Annefe nenport ki antite piblik, i en biznes par natir son de fonksyon prensipal. Setadir i donn servis en kliyan e i kolekte en reveni atraver Bidze Nasyonal.

Leson deryer sa ki Prezidan in fer nou konpran, se donn en servis ki efektiv, e ki *smart*. Akoz a lafen dizour ou osi pe ganny en lapey ki *taxpayers* i kontribye pour ou fer sa ki ou pe fer.

I egzakteman parey en nenport ki servis ki ti pe ganny

donnen, par en biznes prive ki ti pe fer en benefis personnel. Alors si ou ki pe travay dan en biznes prive, ou pa ti pour oule dezapwent ou kliyan o kontrer ou ti pour fer sir ki zot sorti avek en sourir e satisfaksyon pour zot vin ankor en lot zour.

Sa i devret sa nouvo *mindset* e etik ki nou bezwen kiltive dan servis piblik. Dezyenm pwen Mr Speaker. Dezyenm pwen ki mon oule aborde, se birokrali e bann prosedir ki tro long.

Mr Speaker, souvandfwa bokou birokrali dan letap prosedir pour en dimoun ganny en servis, i prodwi en kantite fristrasyon.

Ler ou egzamin o profon ou vwar ki plizyer fwa, napa bon sikronizasyon ant bann diferan servis anba parasol en sel Minister.

Ou ganny anvoie demen tanto, oubyen ganny dir met en gran laliny pou vwar diferan dimoun dan menm departman, pour ganny en sel servis.

Avek developman teknologik, mon krwar ki tou MDAs i bezwen fer plis zefor pour reevalye zot bann *Standard Operating Procedures*.

Si fodre entrodwir bann *ISO Management Standards*, ki anliny avek bann *best international practices*, *why not?* Met sa an pratik pour zot

ganny en *benchmark*, pour zot evalye servis ki zot donnent.

Nou souvandfwa koz lo *digitalization, e-governance*. E demen nou pour koz plis lo enklizyon lentelizans artifisyel, dan servis piblik pour ogmant lefikasite e redwir letan ki en servis i ganny donnent.

Se sa direksyon ki lemonn i le ale. Annou mars avek letan, sanfwa nou pa pour avanse. Felisitasyon pour tou zefor ki pe ganny – ki serten departman pe fer pour ofer zot bann kliyan servis *online*.

Notaman SIBA, *Central Bank* e lezot labank, PUC serten lakonpannyen prive parey *Cable & Wireless* ensidswit, i annan bokou zot. Kot zot servis laplikasyon e peyman i ganny fer *online*.

Me kestyon ki nou bezwen demande, se eski sa programm *digitalization* pe mars ase vit avek letan? Byensir avek resours e kapital imen ki nou annan. I en size ki nou bezwen evalye ozordi.

Mr Speaker, plis ki zanmen mon konvenki ki nou bezwen met plis an aplikasyon, bann prensip *one-stop shop*. Pour fasilit lavi bann kliyan.

I pli fasil e pli efektiv pour en kliyan fer tou son aplikasyon avek en sel dimoun, dan en sel biro, olye

gaspiy letan pour al dan diferan lokasyon pour en sel servis.

An se moman *Planning* pe sey fer sa, *SIBA*, e *PUC* pe osi fer en zefor dan sa direksyon. Nou bezwen ankouraz linisyativ par egzanp kot fodre anvoy en *email* oubyen *call* ler i neseser, san fer kliyan al dan en lot lofis si sa servis i anba menm Minister.

Si i annan plizyer dokiman, ki en kliyan i bezwen, annou donn en *checklist* davans pour evite ki dimoun i bezwen retourn se li akoz dokiman i manke.

Sa i a osi koup lo letan ki en kliyan i bezwen espere e evite ki dimoun i zis vir an ron san fini fer sa ki in planifye pour fer pandan en lazournen.

Pa blyie, ki *time is money* e pli ki servis i tarde, plis ki nou kree lenflasyon. An metan en sistem telefonni ki efektiv e ki ganny *monitored*, pour osi retir bokou fristrasyon.

Mon konnen ki annan bann *software* ki kapab prodwi statistik lo lakantite *calls* ki rantre, konbyen ki ganny rantre, konbyen ki ganny transfer. Mon asire ki si sa sistem i ganny entrodwir, tou Minister - dan tou Minister i pour ede bokou, pour tir bokou fristrasyon.

Mr Speaker, dan mon vizit dan en distrik tou

resaman, en msye i dir mwan ki dan son travay detanzantan i bezwen met lapwentman pour teste bann veikil.

Alor i telefonnen, me souvandfwa son *call* pa ganny ranmase. Alor i desann li menm pour al kot sa Stasyon Veikil e ler i ariv laba enn pti manmzel pe rikannen lo son mobil, menm ki telefonni *fix line* pe sonnen.

Ler demann li akoz ki i pa anmas telefonni? I dir, 'be i avaaret sonnen apre'. Si sa - si ti annan en sistem ki *monitor* lakantite *call* ki antre, mon krwar sa sityasyon pa ti pour arrive.

Mr Speaker, parey mon'n averti avan, problem dan servis publik pa fek ne yer. Annan dan de fwa nou koman politisyen nou met tro bokou lanfaz lo saler ki i pa ase, lo *working scheme* ki pa ase bon san met lanfaz lo prodiktivite e travay dir dan en fason onnet e profesyonnel.

San realize ki sa osi i kapab kree negativite dan lespri travayer. E fer zot panse ki keksoz i pli enportan dan travay, se zis larzan. Vreman larzan zanmen pour ase.

Dan nenport ki pei se pa *civil servant* ki vin ris. Si ou le ris, ou vin en *businessmen*. Parfwa nou servi sa retorik koman en zouti politik ki pli fasil pour rod popilarite oubyen pour anmenn

lanimozite, lanmertim e lemosyon.

Atraver mon letid, mon'n fer en resers an 2017 dan 6 Minister Gouvernman e mon vwar klerman ki se pa larzan ki sours pli motivan dan lespri laplipar nou *civil servants*.

Me kontrerman se sa ki nou apel *ethos* oubyen *working culture* ki faktor ki pli determinan e enfliyansyel lo motivasyon travayer dan Gouvernman.

Mr Speaker, si nou al pli o profon lo bann mezir ki Gouvernman in pran pour amelyor servis piblik, nou a vwar ki *Result Base Management* in ganny entrodwir, ki'n ganny entrodwir an 2013.

Sa *model management* ki annan 4 pilye prensipal *performance-based budgeting, Performance Management Strategic Planning and Monitoring and Evaluation*.

Sa in anmenn bokou plis latransparans e rankont dan serten ka in amelyor prodiktivite, efikasite e servis atraver bann target ki ganny mete.

Me i osi permet meyer zeson larzan, atraver lyezon e lenportans ki fokaliz lo rezulta. Me 10 an pli tar, mon krwar e mon konvenki ki i plis ki ler pour annan en letid detaye lo egzakteman ki'n ganny

akonplir dan servis piblik apre lentrodiksyon sa programm.

Eski tou sa bann gran lobzektif sa programm in ganny delivre dan tou sekter Gouvernman?

E ki zistans nou'n arrive an kree sa 4 pilye fondamantal. Dan en lot mo ki rezulta sa programm ziske la? Petet a sa moman i devret annan en lotokritik lo lakonplisman sa programm.

Mr Speaker, mon konvenki ki sa refleksyon i enn ki bokou dimoun pe fer pour sey konpran lanatir servis piblik dan Sesel ozordi.

Petet solisyon i enn ki pli senp ki enn nou pe panse, oubyen i pli konplike ki nou kapab mazinen. Nou bezwen demande si zis - si i zis en problem konportman e kiltir travay.

Eski i enn ki nou devret analiz dan en konteks kot nou fer konparezon ek lezot Pti Leta Zil avek bann preski menm faktor zeolozi e ekonomik.

Oubyen eski nou bezwen rewwar bann standar administrativ iniversel, e bann *best practices* pour oriyant nou aksyon pirman lo vizyon ki nou'n fer e promes ki nou'n fer avek nou pep.

Pour bann *senior managers*, ki'n deza annan formasyon lo zeson servis piblik, kwa ki pe anpes zot

anmenn sa sanzman e met an aplikasyon sa bann bon lide ki zot aprann dan zot letid?

Eski nou bann *middle managers* i annan ase bagaz e formasyon pour anmenn sa sanzman dan servis piblik? Ki zistans nou *Public Service College* in arive lo size formasyon e zesyon servis piblik? Sa ki nou apel nou *capacity building*.

Ozordi sa konversasjon in komanse lo latab Lasamble. Annou vin avek solisyon e propozisyon ki nou kapab anvoy kot Legzekitiv koman bann rekomandasyon.

An konklizyon, mon ti a kontan lir en pti *anecdote*. En madanm i arriv kot en biro Gouvernman 8 er bomaten, pour demann en zofisyen pour fer en kopi en plan later.

8 er 30, i ouver - biro i ouver e i vvar resepsyonnis. Sa resepsyonnis, i akey li apre ki in koz avek sa resepsyonnis i ganny dir ki i bezwen pey en *fee*. E i bezwen redessann lo *ground floor* sa batiman pour al peye e retourne ek resi anler.

Sa madanm i desann lo *ground floor*, e i al peye i bezwen remet en lot laliny environ 15 minit e ler i remonte avek son resi, i bezwen esper ankor 15 minit pour vvar resepsyonnis la pour dezyenm fwa.

Apre ki resepsyonnis in pran son *parcel number* en

telefonni sonnen e sa resepsyonnis i al fer en konversasjon 5 minit. Ladan menm i bliy nimero sa *parcel number* e i bezwen retourne kot sa madanm e redemande.

Ler finalman i al lo kompiter pour *download* sa *GIS*, i pa kapab antre akoz i annan en - i *password protected*. E sa dimoun ki annan sa *password* pa la.

Ler in arriv aprezan 9 er 30. I dir avek sa madanm me pas apre midi, sa dimoun i ava antre e mon ava ganny *password* pour ratre pour donn ou sa servis.

Sa madanm i pran pasyans e i retournen 1er apre midi. Sa dimoun i dir avek li, sa dimoun ki annan sa *password* i ouver *computer*, e i dir li koumsa poudir, be ou ti'n kapab fer sa plan lo en *website GIS* lo nenport ki kompiter.

Zis i montre ou sa bann kalite *hassle* ki en dimoun dan lavi toulezour i fer fas avek. Ou'n perdi ou en demi zournen, zis pou en keksoz ki ou ti kapab fer dan 5 minit. Sa i zis ilistre en portre realistik ki'n arrive pa tro lontan.

Mr Speaker, i pa mon lentansyon pour al dan tou detay lo dan diferan leksperyans personnel dan mon lentervansyon.

Me sa pa anpes okenn personn pran en tel lapros dan sa deba. Me lanfaz se annou

anmenn solisyon. Mon konnen ki Lasanble pa pour rat sa lokazyon, pour fer zistis sa Mosyon.

Alor mon ekspekte ki atraver deba nou pour kapab anmenn bann leksperyans e osi refleksyon e pli enportan solisyon. Avek sa Mr Speaker, mon a remersi ou.

### **MR SPEAKER**

Mersi Onorab. Onorab Naidu, ou anvi pran laparol an se moman?

### **HON SATHYA NAIDU**

Yes, Mr Speaker.

### **MR SPEAKER**

Onorab, ou annan laparol?

### **HON SATHYA NAIDU**

Mersi Mr Speaker. Bonzour tou koleg Onorab e zabitan Saint Louis ki a lekout, ki pe swiv.

Mr Speaker, Mosyon i vin en moman apropriye kot i kler ki loter Mosyon in pran ka avek konsern dimoun la deor. E en bon pe dimoun la deor, ler ou demann zot mannyer eski keksoz pe ale dan pei?

Zot donn zot perspektiv, e zot souliny detrwa problem. E ladan enn bann *issues*, se servis piblik, e alors Onorab in anmenn sa Mosyon pour nou byensir diskit sa size e regard li en pe pli profon.

E Prezidan Larepublik, a trwa repriz in eksprim son santiman e mon totalman konpran kot i pe sorti. E i pa zis Prezidan dizour osi bann Prezidan lepase dan serten sans. Zot in sey fer serten demars, me i pa'n vreman marse pour kapab fer servis piblik san pour san efektiv.

Alors an relasyon avek sa size, i kler ki ozordi zour tou bann lakonplisman Ladministrasyon LDS, i annan pou fer avek bann travayer dan servis piblik.

Ozordi i annan lakonplisman, ki byensir i pa'n ganny targete, dan nou manifesto ki en plan 5 an. Nou pa'n vreman prevwar poudir ki *COVID*, ki pour vin dan sa dimansyon, dan sa lanpler.

Me in annan desizyon ki'n ganny pran, pour nou kapab sirmont *COVID-19*. E tou bann travayer, dan servis piblik dan bann departman respektif in donn en koudmen pour sa arive. Sa i en akonplisman.

*Air Seychelles*; personn la deor pa ti konn vre leta *Air Seychelles*. Nou konn vre leta finansyel *Air Seychelles* ler nou'n erit sa sistem gouvernans.

E ankor enn fwa in annan bann travayer dan Departman Finans, Departman Transpor, e bann lezot departman ki'n donn en

koudmen, pour nou kapab sov *Air Seychelles*.

E tourizm, *it's the main pillar of our economy*. E letan *COVID*, ti'n frap nou, laplipar bann travayer dan bann diferan letablisman touristik ki pa ti dan travay ti lo serten *scheme*, nou'n bezwen tir zot, nou'n bezwen remet zot dan travay.

Alors in annan bann zofisyé, bann travayer dan sa bann departman respektif ki'n fer sa arive. E ler nou pe regard serten keksoz ki nou pa'n prevwar. Le 7 Desanm, personn pa'n prevwar poudir kwa ki pe al arive.

Selman nou ti'n vvar tou bann diferan departman respektif, ki annan zot bout pour zwe zot in vin devan vin donn, zot in donn en koudmen pour nou adres sa bann defi.

E sa lensidan le 7; i pe kout pei en kantite. I pe kout en kantite e sa i pour met en serten retar lo travay ki Gouvernman i annan. Enn bann pwen se *SIA*, ozordi mon bezwen tir mon sa po e felisit Mr Jitesh Shah.

Sa msye i travay. Sa msye i donn son kouraz e i en dimoun egzanpler ki pe fer tou posib pour delivre vizavi son responsabilite.

E ler nou pe koz lo *SIA*, nou bezwen rekonnet poudir ki bann lezot proze i pour ganny retar. E alors i annan –

i bezwen annan en komunikasyon. I annan travay ki ganny fer par bann diferan antite ki parfwa zot pe rankontre serten defi. Zot pa fer resorti ek piblik pour kapab apresye sa defi.

Sa pwen in ganny fer resorti dan *meeting* piblik, avek zabitan Cascade, kot in ganny fer resorti poudir ki travay ki *SIA* in bezwen fer dan bann lezot landrwa in annan retar. Akoz lenpak le 7 Desanm e ler dimoun in ekoute zot in konpran poudir sa i en defi ki *SIA* in bezwen fer fas avek.

Me dan plas kritike, zot a analize, zot a realize poudir ki *SIA* i en lazans kot tou bann travayer pe fer zot mye posib pour bouz tou bann proze.

Ler bann departman i fer byen pei i progrese. E ler nou regard servis piblik in annan *Complains Bureau* ki ti'n ganny etablir dan lepase. Ti'n annan en *survey* ki ti'n ganny fer, poudir 65pourasan satisfaksyon piblik ver servis piblik li menm.

An relasyon avek bann diferan desizyon ki ti'n ganny pran, mon rapel poudir ki'n annan propozisyon ki'n ganny soumet depi 2013; vizavi *RBM*, vizavi bann lezot zouti ki pour amelyor servis piblik.

E ler mon ti pe lir sa dokiman, par anba ti'n met '*political will*'. Pour 10 an, si

10 an pase zot ti'n met sa prosedir an plas, i ti pour fer ki tou bann travayer zot annan bann target ki kler, ki zot kapab fonksyonn lo la pour delivre vizavi bann lobzektif, ouswa plan bann diferan departman.

E si pour 10 an i pa'n ganny fer e finalman i pe ganny fer. Mon bezwen felisit Mrs Mohideen ansanm ek son lekip ki pe *rollout* sa plan *RBM*.

E byensir pour nou kapab fer sir ki i ganny aplike dan tou bann departman, i pa en keksoz ki pour ariv ozordi pour demen, *taking into account the government structure* lafason ki ete li menm.

Me selman nou bezwen fer sir ki nou pour kapab annan en *coverage* si oule, an sa ki konsern lakantite antite, ki pour kapab met *RBM*, dan son praktikalite, dan tou son lanpler, pou fer sir ki tou bann travayer ki delivre i ganny bann rekonpans neseser.

Parey leka trezyenm mwan, ou kapab dir akoz *base on performance* e sa i enn bann desizyon ki Gouvernman dizour in pran.

Malgre in annan lanons dan lepase kot zot pa'n kapab pran bann desizyon ozordi ou annan en ladministrasyon ki'n pran sa linisyativ, pour fer sir ki 50poursan i garanti sa lot 50 ou bezwen travay.

E se la kot dimoun in vreman valoriz sa laspe travay dir. E sa i gras a bann eleman ki relye avek *RMB*. Byensir ler nou pe koz lo *result-based management*, ler nou pe regard bann diferan travayer dan Gouvernman, i annan en bon pe zot ki delivre, ki pran sa responsabilite o serye.

E parfwa zot pe fer en travay, plis ki en dimoun. E sa lot dimoun ki merit fer son bout i pa fer, ki kree en pli gran fardo lo sa enn ki ansarz li.

E alors, kan eski nou pour vreman kapab – byensir *RBM* me nou bezwen fer sir ki li tou bann diferan antite, i pe vreman aplik sa *to the letter* e sa i pour pran en pe letan.

Me selman nou bezwen komans kekpar e ler travayer i bezwen delivre. Sa se lekspektasyon piblik akoz zot tou zot ganny peye atraver larzan tax.

E si dan sekter prive i annan bann laspe tel ki, tel ki en saler ki pli favorab, sa i enn bann konsern ki'n monte dan servis piblik an sa ki konsern sekter prive.

Mon konnen ki Onorab in soumet bann pwen an relasyon avek benefis monneter. Me selman sa i en defi ki'n sorti dan letan Bidze, poudir ki nou pa pe vreman kapab *attract the right group of*

*workers basically based on the situation* dan sekter prive.

E sa i enn bann defi. Me selman an menm tan, si fodre Gouvernman lo baz entern, dan plas ou *recruit* 3 dimoun ou *recruit* 2 e ou pey pour 3 dan plas 2. Ou bezwen kapab fer bann analiz koumsa pour sey regarde si ou kapab, donn bann kondisyon ki bokou pli favorab pour bann travayer. Sa i enn bann landrwa ki nou bezwen eksplore.

E enn bann keksoz ki nou osi nou'n erite ki dimoun i annan fristrasyon vizavi servis piblik.

Se resours imen li menm li. Lakantite dimoun ki bezwen pour delivre serten servis. Yer menm nou ti'n regarde lo kote programm *methadone* sa laspe reabilitasyon, i manke e ou bezwen mendev.

E pa demen ki nou pe al ganny sa mendev, me selman nou bezwen komans kekpar pour nou kapab ariv ver sa destinasyon, kot tou dimoun i le vwar Sesel i en nasyon ki vreman progresiv.

E nou kapab garanti ki i pour dir ki anba sa Gouvernman, sa i pour ganny fer. Akoz ozordi zour nenport ki dimoun ki enterese dan servis piblik zot kapab vini, zot kapab soumet zot laplikasyon.

E tou zot merit ava ganny konsider pour zot ganny anploye. Lontan ti

annan sistem ek nou pa ek nou. Lontan ti annan *security clearance*, dan en fason ekstrememan viger avan ki ou ganny en travay.

Ozordi zour ler dimoun pe koz lo servis piblik, fristrasyon se akoz sa enn ki ti la avan i ankor la. *But this is the spirit of Sesel* pour tou son zanfan. Kot i annan lenklisivite.

E mon le felisit bann travayer dan servis piblik, ki'n met politik de kote ki pe donn tou zot kouraz, e zot pe travay pour Sesel.

Me an menm tan, i annan serten endividé ki'n anmenn politik dan travay, ki met en retar enorm ver problem en dimoun. Sa dimoun osi pa pe regard ki son afilyasyon politik ler i pe vin rod en led, i pe senpleman rod led lo en baz kot i annan son merit, pour li ganny ede.

E ler i annan bann laspe politik ki antre, parey in leka avek later ek lakaz dan lepase, ozordi zour mon fyer poudir ki mon Gouvernman atraver HSS, zot in dir ou bezwen kontribye 10poursan pour lakaz napa nanryen mal avek sa.

Kot i annan en keksoz ki mal avek sa, la ou pe koz lakaz abordab i kout R800 mil, pour Gouvernman konstri. Me selman ou pe donn R10 mil. *I'm sorry it doesn't make*

sense. Gouvernman in revwar in met lanfaz lo *active applicants*, pour fer sir ki tou le mwan zot pe peye, pour zot kapab ganny sa prodwi.

Be lontan i pa ti leka. Lontan ou ti vot pour entel, *ok* ou ava gannyen. Koumsa ki ti marse e ozordi nou annan en Gouvernman ki pe promouvwar en pep ki osi responsab.

E parfwa sa ki dimoun, i demande ver servis piblik. Dimoun in soumet bann demann, parfwa larepons i bezwen non.

Me selman ki zot fer zot, zot deside al – zot tap tou laport, e parfwa dan serten lenstans *they go to the higher office* e larepons i non. Akoz senpleman ou pa'n swiv serten kriter ki ou merit swiv, pour ou ganny akse avek en servis Gouvernman.

Lontan sa bann servis ki ti pe ganny donnen la, i ti pe ganny donnen pa lo en baz ki relye avek merit. I ti ganny fer senpleman avek en bi politik.

Ozordi Gouvernman dizour pa pe *operate* koumsa. E mon le felisit tou bann travayer, ki annan bann diferan laspe kot zot bezwen swiv, e zot pe swiv, felisitasyon!

Me ankor enn fwa, dan tou sa bann eleman parfwa mon'n fer resorti. Sa i pour bann dimoun ki kot napa

merit me pour bann ki merit ganny asiste.

Kestyon se konbyen lannen eski zot pour bezwen atann? Akoz Gouvernman avan 10 an, 8 an, 9 an pa'n kapab rezourd zot problem. 23 an osi dan serten lenstans.

Me ozordi zour mon fyer poudir i annan en serten devlopman ki ariv dan tou nou bann distrik. Ki kot ou vwar en proze, ki'n atann pour tou sa lannen.

Pe bouze anba nou Gouvernman. 30 ek lannen dimoun in atann. Me ozordi zour anba sa Gouvernman travay pe ganny fer, e si i gras a sa bann travayer.

Ler ou gard sa bann lakonplisman tou sa bann travayer ki annan en bout pour zot zwe in fer zot par, e zot bezwen fyer. SLTA, i fer mwan rapel bann devlopman ki zot pe fer e malerezman la zot pe rankontre difikilte akoz sityasyon avek leksplozyon le 7 Desanm.

E sa i en fe, ki ankor en fwa Gouvernman pa'n prevwar, poudir ki i pou erite me an relasyon avek bann devlopman. An relasyon ek bann proze i annan en retar.

E sa bann kalite fardo ki koumsa parfwa i kree bann fristrasyon ler napa, komunikasyon.

E ler mon pe koz lo size ki relye avek komunikasyon, i

enportan ki dan serten lenstans lakonplisman parey mon'n fer resorti i ganny met devan avek lanasyon pour zot kapab apresye travay ki pe ganny fer.

I annan en bon pe en bann Minis ki pe debourye ki pe donn tou zot kouraz, *behind the scenes*. Me ou pa pe neseserman vwar li. Pa neseserman mon pe koz lo Nouvel 8 er, me itiliz tou bann mwayer posib.

Pour zot kapab montre sa bon travay, ki zot osi zot pe fer. Ouswa si i annan bann *S.I.* ki ganny entrodwir ki dan serten lenstans i koz konfizyon. I ti a bon avan ki sa *S.I.* i koz konfizyon, i annan en Konferans De Pres si fodre ganny fer avan sa *S.I.* ouswa ler sa *S.I.* plito i ganny pibliye.

I bezwen annan sa laspe komunikasyon pour fer piblik konnen dan plas fer, dan plas kot i annan en leokri, apre nou bann koleg lo lot kote latab zot itiliz sa bann laspe, kot zot konfiz nou pep.

I pa ed nou finalman, me napa nanryen mal ek sa desizyon ki'n ganny pran, atraver sa dernyen *S.I.* kot in annan pa mal diskisyon *online*.

Me selman i enportan nou fer resorti, bann eleman. Par egzanp tou resaman *SIB*, prosedir *tender*, pa'n ganny swiv. Mon byen kontan pour

vwar in annan en Konferans De Pres pour eksplike ki'n arive.

Akoz si non, Lopozisyon ti pour servi sa zot ti pour manipil sa dan tou sord form e zot ti pour kree bann eleman politik pour zot ganny serten pwen. Lepep Seselwa pa bet, ozordi zour anba sa Gouvernman, kriter dan en serten sans in ganny swiv.

Kote eski kriter in ganny swiv? *Appeals Panel* in dir ki prosedir pa annord. Refer *tender*. Lontan dan Gouvernman avan zanmen ou ti pour vwar tousala. Alors *Appeals Panel*, mersi pour sa travay ki zot in fer. Me in montre ki i annan en defayans.

E ozordi zour nou'n erit en sistem 43 an nou. Nou'n erit en fason fer 43 an e nou bezwen anmenn en novo fason fer, en novo *mindset* e nou pe fer nou mye posib.

E mon pou tir mon sapo pour tou nou bann Minis ki pe fer zot bout, ki pe fer zot bout enkli nou Prezidan, enkli la tou nou – lo nou kote latab koman bann Onorab *LDS* ki sorti dan Gouvernman ki pe travay.

Mwan mon fyer lo sak nou bann koleg la ki la ki pe travay. Ou konnen akoz, akoz lontan lafason ki Lasanble ti ete, se *LDS* ki ti'n dir fer li vin

2 zour. Nou, nou krwar dan travay dir.

E lontan *MNA* mon krwar pa si ti'n travay parey lo nou kote latab nou pe travay ozordi. Zot ti servi zot privilez pour ganny later, pour ganny biznes, pour ganny bann lezot benefis...

**(APPLAUSE)**

### **HON SATHYA NAIDU**

Pour fer en kantite keksoz ki ti mal lo kote *LDS* nou pa fer sa. Nou pa krwar dan sa filozofi. Si nou drwa en "larzan *forgo*" nou ti a peye, nou ti a fer nou demars pour nou peye. Be sa enn i pa dwa, i dwa son "larzan *forgo*." Selman i koz lo malere pep Seselwa.

Malere pep Seselwa, seryezman! Si ou dwa ou peye ouswa ou fer en zefor pour ou peye. Sa i bann laspe, Mr Speaker, dan lepase ti'n arive par bann politisyen. I ankor annan politisyen, i annan sepa konbyen morso later lo son non.

I enportan ki Gouvernman dizour, si fodre i annan en lenvestigasyon, ki bezwen ganny fer nou a fer. Me selman zanmen mon krwar i pour annan en ka 50 milyon anba Ladministrasyon *LDS*. *No way!*

Nou en Gouvernman ki krwar dan latransparans, dan rankont. Ozordi zour *FPAC*, mon byen apresye travay ki pe ganny fer. Me selman *FPAC*ler bann departman i vin devan, bann ptipti *issues*, bezwen ganny rektifye.

Mon apel li bann pti *issues*, bann *small issues*. Akoz? Ti napa *Irish* ki ti pe ganny peye! Ti napa gard, ki ti'n vin koman *dog handler* ki pe ganny en saler R155 mil par mwan. Ti napa zofisyé ki sorti Sid Afrik ki dan lapolis, ki pe ganny sepa konbyen mil Roupi koman saler.

*This was the abuse, the rot in this country was so deep!* Dimoun ti'n ganny ase, dimoun ti'n dir nou le en sanzman! Nou le en sanzman!

E sa sanzman in vin avek Sesel pour tou son zanfan ki anmenn son benefis, an menm tan i annan serten eleman ki kree fristrasyon dimoun. Akoz dimoun i dir, "*man* mon'n vot pour sanzman me selman ler mon al dan sa biro mon vwar sa menm dimoun - sa menm dimoun e i pe kree en retar.

Be Onorab kan eski en tel pour ale? Be parfwa dan serten lenstans entel i pe travay li. Me selman striktir ki pe travay ladan dan serten lenstans i bezwen sanze.

E Gouvernman nou apresye bann diferan sanzman, ki'n ganny anonse

dan premye bout ki ler nou ti'n antre o pouvwar, nou'n fer nou mye posib.

In annan sakrifis osi ki sa bann *Board Members* ti fer o komansman ler nou ti'n erit pei dan letan *COVID*. In annan *Board* ki ti'n koupe; in annan bann diferan *remaniement*.

Me selman lafason ki sa striktir li menm li i ete avek bann problemm ki annan pour rezourd, *it would take some time for us to really ensure that the public service is as effective parey*, Lepep Seselwa i le.

Me i annan en kantite travay ki pe ganny fer, pour nou kapab fer sir ki ariv alaoter ki i devret arrive.

Me an relasyon avek sa size, i fer mwan resorti bann senp pti eleman koman en *name tag*. I ti a fer sa dimoun, i ti a ed nou osi pour nou konn madanm entel dan tel departman ki son responsabilite.

Prezan si sa madanm entel i ale, mon konnen avek kot ou pour ale pour al sey rezourd sa *issue*. Alors en *name tag* avek en *designation* i ava ede. E an menm tan dimoun, i bezwen stres lenportans bann keksoz an ekrir. Ler ou'n ganny en komitman, fer sir ki ou fer li an ekrir.

I annan tro bokou promes ki'n ganny fer dan lepase, ozordi zour i vin lo

mwan. I vin lo mwan, par bann promes ki'n ganny fer dan serten - atraver serten dimoun ki ti la, ki ti'n annan responsabilite dan Gouvernman kot zot in fer bann fo promes.

Be prezan ler pour sa miray ou pe rode madanm. Si bannla in promet ou 2006 ou pour kriy miray. Sa dimoun ki'n promet ou la, ki ti'n annan en responsabilite dan Gouvernman Lokal

I ti devret fer sir poudir ki an ekrir ou ti'n ganny en repons, poudir ou merit en miray. Parfwa bann keksoz an ekrir, i ava fer keksoz pli kler pour nou delivre, vizavi bann demann ki ganny soumet ek nou.

E dan serten lenstans kot ou pa vwar merit, ou pour bezwen dir non. Dan lepase miray ti ganny konstrir akoz politik, peron ti ganny konstrir akoz madanm entel pe al vot pour ou.

Ozordi zour i nepli leka. Nou pe regard laspe pli lo en baz kominoter pour nou delivre proze. E an relasyon avek bann demann, bann promes ki'n ganny fer, par en lot kandida, ki pa ti'n ganny elekte pa pour kapab vin mor lo mon lasyet ozordi.

I pa fer sans sa. E alors i annan serten demann ki annan relevans, me selman...

**MR SPEAKER**

Onorab Pillay. I fer plizyer fwa ki ou'n fer komanter, depi ler sa deba in komanse. Silvouple. Silvouple ou osi obzerv en pe lareg kourtwazi. Mersi.

**HON SATHYA NAIDU**

Eskize Mr Speaker, si mon'n, si mon'n komet en lerer kot mon pe, mon pe met laverite devan avek pep Seselwa e zabitan Saint Louis an partikilye pour zot konpran mon dilenm. Ou konpran mwan?

Par legzanp si i annan en semen, akoz i annan bann travayer anba servis piblik osi ki bezwen delivre sa servis. Si i annan en semen, i annan zis de fanmir e de fanmir in demande pour sepa konbyen lannen.

Be si i annan en semen pour 27 fanmir, kote eski Gouvernman Lokal ek son striktir, i kapab antre ofer sa semen pour de fanmir dan plas 27 par egzanp?

Baze lo bann promes ki'n ganny fer dan lepase, i annan serten keksoz kot ou bezwen met bann fe ater, pour eksplik sa pep poudir ki tou bann keksoz ki zot, zot in dir zot pour fer, i pa neseserman dan lavantaz lamazorite e nou pei.

E sa i en pwen i en fe. Alors mon pa vwar kote eski Onorab Pillay i vwar li koman

en problem pour mwan met sa devan.

I annan en kantite laspe ki pe ganny fer vizavi servis piblik. Lo kote travay mon vwar ki i annan bokou plis solidarite an term travayer. Ler ou vwar *Labour Day* sa kantite selebrasyon ki'n annan dan tou bann diferan departman.

Mon pa rapel kan dernyen fwa, selman pou frane onnet kot mon'n vwar sa losa lanpler. Alors i montre ki *there is a work culture* ki pe ganny kree. I enportan ki *the work culture* i en lanvironnman, ki pa toksik.

Malerezman sa laspe i toksik dan landrwa travay i pa zis en keksoz ki zis dan *public service* i en keksoz ki en pe pli global even dan *private sector*.

Me selman se latitud imen, ki mannyer ki nou kapab fer si ki tou dimoun i senkronize pour travay ansanm. Ki mannyer eski nou fer ki, ler en lot dimoun i ganny en promosyon, tou dimoun i kontan pour li.

E i pour donn li sa siper neseser dan plas met son koleg an retar. Sa i bann laspe ki ou eksperyanse dan lemonn travay. *And it's all got to do with one's mindset.* E sel fason pour nou kapab fer sir, ki tou travayer pe fer zot bout.

Se sa zouti pli enportan ki mon ti pe strese pli en pe pli

boner an relasyon avek *RBM*, pour fer sir ki zot pe delivre. Si zot pa delivre *you will be sacked*.

*Sacking* osi i en keksoz ki normal dan lemonn travay. Lontan ler en dimoun ki ti pe ganny tire dan travay ti senpleman baze. Akoz swa ou ti siport *SNP*, ouswa en lot parti politik ki ti dan Lopozisyon sa letan.

Konmela i pa leka. Si ou pa pe delivre, ou pour bezwen ganny tire pour kree lespas pour en lot dimoun vi fer sa louvraz. I annan en gran diferans avek sa ki ti la avan, an konparezon avek sa ki nou annan ozordi.

Me selman enn nou bann pli gran konsern, se birokiasi ki Onorab osi ti fer resorti. Si par egzanp ou annan bann *issues* tel ki pye dibwa ki dan danzere, dan plas al kot 4 departman ou ti a met tou striktir anba en sel departman.

Pou ki ler sa dimoun i vin tap sa laport tou keksoz i annord e enn fwa pour tou, ou ava rezourd en problem; ki sitan senp. Me selman lafason ki striktir li menm li i ete i pa neseserman ede. En striktir ki'n sorti kot zot e i nou problem pour nou rezourd.

E i en *issue* ki en pe partou dan bann diferan departman. Me sa laspe

*digitalization* i ede pour tir sa fardo.

*Licensing* yer nou'n vwar, i annan serten devlopman ki zot, zot pe fer ki - kot zot pe pran bann linisyativ pour zot *streamline*.

E sa i ava ed bann konsonmater, sa i ava ed bann kliyan, sa i ava ed sa pep ki pe akse sa servis. E an relasyon avek sa, lezot laspe, menm pour *ease of doing business*.

*Ease of doing business* i en konsern, akoz sa kantite laport ki en dimoun, en lantreprenier i pe tap lo la i tro bokou. E i annan en *investment* portal kot en kantite larzan pe al ganny envestir pour fer sir ki nou annan en *one-stop shop*.

E sa i pour pran en pe letan me antretan nou pour bezwen fer sir ki atraver bann departman respektif, ase lanfaz pe ganny mete e mon vwar ki zot pe sey fer zot mye.

Me ankor enn fwa i annan bann Polisi ki relye avek *GOP insurance* ki mon konnen ki i en size ki sansib. Akoz ou annan sa laspe Nasional ki vini poudir ki Seselwa nou bezwen met zot premye. E se zot ki bezwen ganny konsidere.

Me ou annan en kominote biznes ki osi annan travayer ki zot bezwen anploye e alors i bezwen annan en balans ler i konsern serten

*field of workers.* Dan plas pas dan en ta birokrasi, zot pour kapab ganny sa dimoun ki zot bezwen.

I pa savedir ki mon pa favoriz Seselwa. Me selman ozordi zour en keksoz ki nou'n erit avek sistem US, ki ti la, problem drog, problem lalkol. E sa i en i pe afekte nou bann travayer. E sa i osi afekte servis piblik pour nou *recruit* bann travayer.

E alors nou vwar dan bann serten lenstans Biro Meteorolozi, par egzanp. Laplipar bann travayer ki mon'n vwar se bann etranze, ki annan bann ekspertiz neseser ki pe ed pei. E mon dir zot mersi pour sa travay, sa servis ki zot pe rann.

Me sa i en defi ki nou, nou pe rankontre. Nou pa le ki byensir nou annan en servis piblik ki ranpli avek etranze, *but this is the dilemma of which we are face with today.*

E an relasyon avek servis piblik, mon bezwen fer resorti poudir i annan serten lenstans, i annan serten lenstans kot bann *public servant* i pran en konze.

I fer ki i annan dimoun ki pe vin akse sa servis, i ganny dir en tel i lo konze *and everything collapses. There has to be a proper line of communication,* an sa ki konsern bann diferan responsabilite, ki sa bann

travayer i annan pou fer sir ki ler en dimoun pe vin akse sa servis, i ava fer sir zot pe ganny sa repons neseser. *Email* pa pe ganny reponn, i en gran konsern.

Me ankor enn fwa nou bezwen kapab, parey Onorab in fer resorti avek en sistem ki relye avek telefonn. Mon krwar i bezwen kapab annan. Ozordi zour ler nou pe koz lo teknolozi i bezwen annan en fason pour kapab *monitor*.

Pa neseserman *read into the details of the email but how effective it's public servant, vizavi bann emails* ki zot, zot resevwar an sa ki konsern bann repons ki zot, zot pe donnent.

Me i paret ki bon pe fwa se *from the talk*, ki desizyon i bezwen ganny pran pour bann dimoun ki pa anba pour zot pran sa desizyon. I pour bann desizyon parfwa ki sitan senp e merit ganny pran par sa travayer. Me selman zot pa fer, zot atann pour Minis ouswa PS donn lenstriksyon apre zot fer.

Sa dan li menm i en mantalite nou bezwen *empower*, nou bann travayer, pour fer sir ki ler zot annan en responsabilite ki zot deservi sa responsabilite ki zot annan.

E zot delivre ver sa servis ki zot merit pe rann sa dimoun ki'n vin devan kot zot. E sa i bann issues ki dimoun i eksprim zot lekor lo la pour

dimoun dir - mon'n vin kot ou apre problem in rezourd.

Ouswa mon'n bezwen al kot en lot dimoun ki annan, en kantite lezot responsabilite. Me zot pe vin rezourd enn pti problem senp kan sa travayer li menm li ki'n anba i devret pe fer son bout.

*This is one of reasons why* ki nou vvar fristrasyon dimoun i ganny eksprimen vizavi serten desizyon ki devret pe ganny pran.

*Derelict vehicles* i enn, ki reste en problem dan laplipar nou bann distrik. I en senp desizyon ki bezwen ganny pran. E *the vehicle pound* eski in ganny etablis wi ou non.

Les nou pep konnen an menm tan poudir si lenfastruktir osi pe ganny mete pour akonpanny serten desizyon ki bezwen ganny enplimante.

Mr Speaker lo sa size....

### **MR SPEAKER**

Eskize Onorab, mon a demann ou pour konklir.

### **HON SATHYA NAIDU**

Zisteman Mr Speaker...

### **MR SPEAKER**

Mon krwar ou pe en pe repetitif.

### **HON SATHYA NAIDU**

Wi, wi.

### **MR SPEAKER**

So konklir.

### **HON SATHYA NAIDU**

Wi. Non ou konnen Mr Speaker. Ou konnen Mr Speaker parfwa ler ou repetitif osi i ede. Ou konnen akoz? Akoz mon'n enterakte ek en kantite dimoun zot annan kantite konsern lo servis piblik.

Alors sak mo ki mon'n dir, mon garanti ou poudir ki sak dimoun ki'n ekout mwan la deor avek serten pwen ki mon'n fer, zot kapab relye avek sa. Alors pour bann Onorab lo lot kote latab.

Byensir mon konnen lafason ki zot pour fer zot politik, zot pa pour met solisyon devan, zot pour zis kritike, zot pour vin avek bann fo lakizasyon ki zot abitye fer.

Me selman lentere nou kote latab se pour met konsern nou pep, pour nou kapab amelyor servis piblik, pour nou kapab delivre pli byen, pour nou fer pli byen e pour nou reste o pouvwar 2025.

E pour nou anmenn Sesel ver prosperite akoz nou deza pe fer en kantite pour nou pep. Malgre ki dan serten lenstans *we are taken for granted*. I annan en kantite keksoz ki nou pe fer pour nou pei e nou tou ki pe bouz sa pei

de lavan nou dwatet fyer.  
Mersi Mr Speaker.

### **MR SPEAKER**

Mersi Onorab. Bon, Onorab Hoareau ti eksprim en zoli lentansyon letan i ti demande ki sa deba pa ti vin politik.

Me selman, sel keksoz, on konnen Manm pa pour kapab evit politik - sel keksoz ki mon a demande se ki, i annan kourtwazi, ver lezot Manm letan zot pe koze.

Onorab Philip Arissol ou lenthervansyon.

### **HON PHILIP ARISSOL**

Mersi Mr Speaker...

### **MR SPEAKER**

Eskiz mwan. Eskiz mwan Onorab, mon krwar pour komanse mon pe met en limit 20 minit par entervansyon. Mersi. Onorab.

### **HON PHILIP ARISSOL**

Mersi Mr Speaker. Bonzour Mr Speaker, koleg Onorab e tou dimoun ki pe swiv nou.

Mr Speaker, ozordi nou zwenn ansanm pour rekonnet e selebre kontribisyon enportan ki nou travayer servis piblik i annan dan fabrik nou sosyete.

Sa bann dimoun devote, senbol lespri servis e zenerozite ki travay sanses zour apre zour pour asir byennet e progre nou nasyon.

Mr Speaker, depi ler nou leve granmaten ziska ler nou al lo nou lili aswar, lenpak servis piblik i ganny santi dan tou laspe nou lavi.

Zot bann edikater ki form nou zanfan, zot bann Lapolis ki fer respekte Lalwa e gard nou bann kominote an sekirite, Ners, Dokter e tou travayer servi lasante ki donn nou swen servis lasante.

Travayer sosyal ki siport dimoun ki pli vilnerab dan nou sosyete. E en kantite lezot ki zwe bann rol enportan dan fonksyonnan nou kominote e nou pei.

I esansyel pour nou rekonnet sakrifis e defi ki travayer servis piblik i fer fas avek dan travay sak zour. Zot souvan travay bann long erdtan dan kondisyon difisil. Zot fer fas avek lobstak e baryer avek determinasyon, e rezilyans pour zot kontinyen.

Zot langazman pour sorti byen piblik i vreman merit ganny felisite e ganny servi koman en lespirasyon pour nou tou.

I malere ki i annan - ki serten travayer servis piblik i ganny vwar dan en fason negativ malgre zot travay dir e devouman pour deservi piblik.

Menm si i vre i kapab annan ka kot dimoun ki dan sekter servis piblik ki pa atantif e ki zot e zot responsabilite.

I enportan pour rekonnet ki lamazorite travayer servis piblik i bann dimoun ki travay ki onnet, ki fer en zefor pour fer en lenpak pozitiv lo kominote e nou sosyete.

I vreman en realite difisil ki bann travayer servis piblik malgre zot plizyer zefor pour asiste dimoun e donn servis esansyel, i kapab parfwa ganny blanmen ki zot koz fristrasyon.

Sa i kapab sorti dan en varyete fakter tel ki move komunikasyon, lobstak birokrasi, en natir konpleks dan livrezon servis piblik.

Mr Speaker, travayer servis piblik i zwe en rol enportan dan mentenir fonksyonnman servis esansyel, mentenir *rule of law* e asir byennet sitwayen.

Zot souvan travay en kantite erdtan dan kondisyon difisil pour akonplir zot devwar e zot responsabilite. I esansyel nou apresye e rekonnet zot zefor, parske zot entegral dan fonksyonnman nou sosyete.

Persepsyon negativ lo travayer servis piblik i kapab sorti dan diferan fakter, tel ki ensidan izole, dan move kondisyon, move kondwit, inefikasite, birokrasi ouswa defi komunikasyon.

Menm si i enportan pour abord e koriz sa bann problem, i enportan egalman

pour rekonnet e selebre lakantite travayer servis piblik ki travay konsyansyezman ek etik pour servi piblik.

Zefor pour amelyor transparans, responsabilite e komunikasyon dan sekter servis piblik, i kapab ede abor persepsyon negativ e batir konfyans ek piblik.

Ankouraz en kiltir profesyonnalism entegrite ek ekselans ki a ede pour amelyor repitasyon travayer servis piblik e met laksan lo kontribisyon presye dan sosyete.

Bann travayer servis piblik i ganny konfye avek responsabilite pour donn bann servis esansyel pour piblik, dan en fason ki ekitab efikas e transparan.

Premye komitman se atraver sitwayen ki zot pe servi e Gouvernman di zour. Non-pa okenn parti politik ouswa azanda parti ki zot afilye avek.

Mr Speaker, servis travayer, servis piblik pou fer ekspre pour koz fristrasyon ouswa deranz servis piblik, pour benefis politik, pa selman kont proaktivite.

Me osi met entegrite fonksyonnman servis piblik an dout e perdi konfyans piblik. I kapab kree linefikasite, detort kalite servis e kree dimal byennet dan kominote. An plis ki sa, sa travayer servis piblik

i ganny son saler atraver larzan *taxpayers*.

Pour fer zot devwar dan en pli bon lentere piblik. Pa tro avans azanda politik ouswa angaz zot dan aktivite partizan.

Ankouraz bann serviter piblik pour azir dan en fason ki al kont prensip profesyonnalizm, lentegrite e enparsyalite. I en move servis pour piblik e i al kont bann valer de baz servis piblik.

I esansyel alor pour travayer servis piblik reste enparsyal obzektif e determinen pour respekte standar, kondwit etik dan travay.

Nenport tantativ pour politiz servis piblik, ouswa servi travayer servis piblik, pour rezon politik, afeblir e menm andomaz kredibilite e efikasite servis piblik pa akseptab Mr Speaker.

Travayer servis piblik i merit evite partisip dan aktivite ki lakoz fristrasyon ouswa deranz servis piblik pour rezon politik.

Defann valer profesyonnalizm, enparsyalite e devouman dan servis piblik i enportan pour mentenir konfyans, konfidans piblik e asir fonksyonnan efikasite dan lenstitisyon gouvernmantal.

Ankouraz bann travayer servis piblik pour azir dan en

fason kont sa bann prensip ki prezidis pour lentegrite servis piblik e byennet sosyete an zeneral.

Mr Speaker, an mezir ki nou reflesir lo sa Mosyon ki Onorab Hoareau in met devan, annou non selman felisit e remersye nou bann travayer servis piblik, pour zot devouman me osi mefye nou prop lekor pour fer pli byen.

Nou merit elev nou lekor lo pli o standar profesyonnalizm e ekselans dan nou prop rol swa atir dan sekter piblik, ouswa ayer.

Sakenn ant nou, nou annan nou rol pour zwe dan batir en sosyete ki enkliziv, ekitab e prospere pour nou dimoun.

Ler nou travay ansanm siport enn a lot, e ankouraz en kiltir kolaborasyon e respe mityel, nou kapab kree en lavenir ki pli briyan pour nou zenerasyon ki pe vini.

I esansyel pour nou, non selman rekonnet travay dir ki sa bann travayer servis piblik me pour osi ankouraz lezot dimoun e bann zenn pour swiv zot lepa.

Ler nou etablir standar profesyonnalizm eleve e avek ekselans nou kapab asire ki tou sitwayen pour resevwar pli bon servis posib. Ler travayer servis piblik i azir avek entegrite e devouman, sa i

ankouraz en kiltir konfyans ki benefisye tou dimoun.

Mr Speaker, ozordi ler nou rasanble, annou non selman felisit travayer - travay dir e devouman nou bann travayer servis piblik. Me annou reaffirm nou langazman pour siport zot dan zot demars nob.

Annou pran enn sa bann langazman pour kree sa lanvironnman kot profesyonnalizm ek ekselans pa selman ankouraze.

Me ekspekte kot sak sitwayen i resevwar pli bon servis posib e sipor de lapar sa dimoun ki'n ganny konfye sa responsabilite dan sa servis piblik.

Ler nou rekonnet e selebre zefor nou bann travayer servis piblik, nou non selman onor zot kontribisyon. Me nou pe osi enspir en novo zenerasyon dirizan e profesyonnel pour swiv zot lepa.

Mr Speaker, nou devre kiltiv en kiltir servis ki valoriz entegrite, ekselans e pour sir sans ses e komen. Se selman dan sa fason ki nou pour kapab vreman retir fristrasyon, ankouraz konfyans e anmenn nou pei dan en direksyon pour en lavenir ki pli briyan e pli prospere.

Mr Speaker, pour fini, annou onor devouman ek

servis tou travayer servis piblik. Annou fer en zefor pour nou imit zot langazman, atraver ekselans. Annou solider avek zot, rekonnet zot kontribisyon enportan e pran langazman pour siport zot dan zot misyon, pour servi nou nasyon.

Ansanm nou kapab sirmont defi, ankouraz progre e ankouraz en sosyete ki nou tou nou a fyier. Mr Speaker avek sa de mo mon pour aport mon sipor pour Mosyon Onorab Hoareau. Mersi.

### **MR SPEAKER**

Mersi Onorab. Entervansyon Onorab Romain.

### **HON GEORGES ROMAIN**

Mersi Mr Speaker. Bonzour tou koleg Onorab e tou dimoun a lekout. Mr Speaker, sa Mosyon ki devan nou ozordi i enn ki tre enportan. Akoz i pe koz lo lefikasite nou servis piblik.

En keksoz ki esansyel pou elev standar e asire ki travayer i azir a tou moman, dan en fason profesyonnel, ler zot pe desarz zot responsabilite.

Sa i pa devret zis en laspirasyon, me i devret ganny vwar koman en pilye pou progre nou nasyon. I devret en keksoz ki tou dimoun ki travay dan servis piblik, i vwar koman enn zot responsabilite.

Sa i akoz, servis piblik, i enpakte nou sitwayen direkteman tou le zour.

E sak fwa ki nou enterakte avek enn nou sitwayen, i en loportinite pou nou reflesir lo lafason ki nou fer li e si nou pe fer li byen.

Mr Speaker, bokou nou Seselwa ki'n ganny sans pou al vizit serten pei devlope, tel ki Singapore, nou'n enpresyonnen avek kalite zot servis e lafason ki disiplin i domin zot fason fer.

Me akoz ki enn pti pei parey Sesel, nou pa kapab arive met nou lo en tel standar? Mr Speaker, i pa enposib, me i demann zefor kolektivman tou dimoun pou nou al anver sa lobzektif.

Konpran kote problem i ete e ki fason fodre amelyore e annou rod solisyon pou enplimante. Tou dimoun ki antre dan en lanplwa, i bezwen ganny prosedir pou li swiv e aprann lafason ki mannyer i pou fer son travay anliny avek son pozisyon.

Me menm si nou rol oubyen pozisyon i diferan, nou tou nou bezwen annan sa bon latitud travay. Annan konprenezon pou nou koleg ek kliyan ki nou rankontre, travay avek lefikasite a tou moman, montre profesyonnalizm e toultan rod fason pou fer pli byen.

Mr Speaker, i kapab nou pe fer *file* en kliyan bouze pou al dan en lot lofis, *process* son laplikasyon, donn li en lapwentman, reponn telefon, pas mesaz avek dimoun apropriye, reponn *email*, fer swivi lo kliyan.

Tousala i bann keksoz ki sipoze ganny fer toulezour dan servis piblik. E menm si i bann pti keksoz, me Mr Speaker, zot enportan pou ede pou promouvwar en bon servis.

Nou konnen ki annan bokou travayer ki pe fer sa byen e zot merit ganny felisite. Me Mr Speaker, i annan serten ki zot azanda se pou fer ekspre pou trenn lipye, pou kree fristrasyon, pou met retar e fer manm piblik ankoler. Sa i pa akseptab.

Mr Speaker, annou mazin sa dimoun ki pe fer fas ek birokrasi pou li ganny son permi. Bann retar ki i bezwen vwar li pe espere pou ganny en larepons.

Ler nou retard son laplikasyon plan lakaz par egzanp, non selman ou met li an retar me ou pe osi met retar lezot dimoun ki an zwe. Tel ki en kontrakter ek son bann travayer ki pe esper sa louvraz demare, labank ki pe donn finansman sa kliyan.

E sa dimoun ki petet i pe lwe en lakaz i kontinyen depanse akoz retar. Annou mazin sa etidyan ki'n kalifye e

ki pe esper son *scholarship* finalize, e ki pe fer fas avek retar akoz petet desizyon pa ankor ganny fer.

Liniversite ankor pe esper konfirmasyon, finansman pou son letid pou ganny retar pou finalize. E sa i met bokou presyon pour en etidyan ki premye fwa pe al fer sa leksperyans.

Mr Speaker, annou mazin en lot legzanp. Sa pasyan ki petet i vwar li pe asiz en ta letan pou li vwar Dokter. E ki petet i ti'n kapab evit sa, si sa travayer ti'n donn li en apwentman pli spesifik.

I annan de fwa ki kliyan i vin kot nou e nou pa donn li tou lenformasyon korekteman. E fer ki sa dimoun i monte desann dan bann biro pou li ganny lasistans.

Mr Speaker, mwan menm mwan mon'n vwar plizyer fwa ler mon'n pas dan bann lofis kot ou'n ale. Sa mon pe koz plizyer lannen pase. Kot ou'n anmenn en sityasyon devan e – kekfwa sa sityasyon son *file* pa la avek zot an se moman.

E sa i dan en lot departman ki dan menm Minister, olye pran sa telefonn ki lo son latab *call* sa departman. I dir ou vin en lot zour. Mr Speaker sa pa akseptab.

I annan sityasyon ki menm ankor enn fwa arive avek mwan, kot mon'n ale pour pey en servis. Ankor enn fwa sa Mr Speaker mon pe fer resorti ki'n arive plis ki 5an pase.

Ler mon antre dan sa lofis, zot dir mwan al dan sa laliny, ler mon arriv devan zot dir mwan koumsa mon pa sipoze vin la, mon sipoze al dan en lot laliny.

Ler mon arriv laba en *staff* i dir ek mwan koumsa ki mon pe al vin fer, mon dir mon vin fer sa i dir mwan non, ou pa sipoze vin la. Ler mon al dan sa lot laliny la devan pour peye i dir mwan *cashier* in fini fermen, mon bezwen vin demen. Sa pa akseptab Mr Speaker.

Tou sa bann sityasyon ti kapab ganny evite si sak dimoun i byen pran son responsabilite, pou fer son bout e travay e kordinen ansanm pou asire ki sa kliyan i ganny sa bon servis.

Ler nou pa fer nou travay byen, i ede pou sem bokou fristrasyon dan servis publik. En dimoun ki ganny en move leksperyans atraver en servis, i donn en move non sa lorganizasyon e i al pli lwen pou li blanm sa Gouvernman.

Mr Speaker, annou mazinen ki ler nou azir profesionnelman, nou pa pe zis swiv prosedir. Me nou osi

pe demontre, respe pou sa dimoun ki devan nou, nou bezwen senpatiz ek sa dimoun, aprann ekout li e konpran li.

E nou bezwen montre en komitman pou ed sa dimoun. Akoz se koumsa ki nou tou nou anvi ganny servi. Alor pou bann ki deside pou trenn lipye, mon pou demann zot pou reflesir byen.

Pour bann ki pe met politik dan travay e pe fer ekspre pou donn Gouvernman en move non, mon anvi dir zot mazinen byen si zot anvi kontinyen reste la. Akoz politik napa en plas dan landrwa travay.

E bann lorganizasyon ki santi ki son bann travayer pe fer ekspre pou met retar, aksyon disipliner i merit ganny pran avek zot.

Akoz sa pe met retard dan devlopman nou pei e senm fristrasyon parmi nou piblik. Annou mazinen si sa biznes ti pou nou, eski nou ti pou anvi perdi larzan, perdi biznes? Zis akoz enn de endividé pa pe fer zot travay?

Mr Speaker, si nou en travayer dan servis piblik, annou vin bann Anbasader pou nou lorganizasyon. Annou montre komitman pou sa ki nou fer.

E annou travay pou kolektivman amelyor lavi nou bann sitwayen. Akoz nou pei i

pou nou e se nou ki bezwen bouz li devan.

Mr Speaker, sa Gouvernman di zour, i le fer le meyer e anmenn plis lefikasite dan lafason fer. E alor nou pe demann tou travayer servis piblik, pou pran zot responsabilite e delivre dapre zot manda.

Pou konkli Mr Speaker, mon le dir ankor enn fwa mersi avek tou bann travayer ki leve toulezour, lapli, soley e desann pour li vin travay. E i pe donn tou pou fer avanse nou servis piblik.

Mon oule dir zot kontinyen dan sa lepa, akoz zot zefor pe ede pou amelyor lavi nou sitwayen. Mr Speaker mon pou donn tou mon sipor pou sa Mosyon. Mersi Mr Speaker.

### **MR SPEAKER**

Mersi Onorab. Mon donn laparol Onorab Labonte.

### **HON ANDY LABONTE**

Mersi Mr Speaker. Bonzour Mr Speaker. Bonzour tou koleg Onorab, tou Seselwa ki a lekout. Tou laglwar, *louange* e ladorasyon i al pour Bondye Papa ki'n kree later e sa liniver.

Mr Speaker, Mosyon anmennen par Onorab John Hoareau, premyerman pe felisit tou travayer servis piblik ki pe fer zot travay byen e

konsyansyezman pour benefis nou pei.

I vreman enportan ki nou annan en konesans ler okenn endividé i fer sa ki byen. Akoz sa i vin koman en sours lankourazman e ede retir negativite e vin en sours, lapresyasyon osi pour sa endividé.

Mr Speaker, tou imen dan nenport ki keksoz i fer i merit touzour mazin dibyen. Akoz sa i ede pour ki ou konsyans i anpe. Fer dibyen pa kout nanryen, ou kapab en Prezidan, ou kapab en Minis, ou kapab en MNA, ou kapab en profesyonnel, e ou kapab en labourer.

Nou tou nou oblize rann lazistis nou konsyans egalman pour sa saler ki nou resevwar. E la, en anplwayer i oblize pey son anplwaye dan en fason rezonnab, ki donn li lanvi pour kontinyen desarz son responsabilite a la oter.

Ler en saler i egal responsabilite ki en endividé i resevwar, i ede ogmant prodktivite e rezulta se pei ki kontinyen progrese e finalman benefisyé.

La mon pour pran lokazyon pour felisit tou endividé, pa selman dan sekter piblik, me dan Sesel antye ki devoue e travay dir. Mon pa pour sit non personn akoz si mon mank enn ou en

departman mon pa pour fer lazistis.

Alor felisitasyon e kontinyen fer sa ki byen dan lavi e dan ou responsabilite ki ou'n ganny dedye pour ou fer. Me par kont Mr Speaker, mon pa pour ositan fer lazistis, si mon fer krwar ki tou travayer i vvar valer fer sa ki byen dan zot responsabilite.

Mon konsey pour sa pti minorite, ki pa devoue e pa desarz zot responsabilite, i reflesir ki kantite retar zot pe met sa pei ki anmenn mwan lo dezyenm parti sa Mosyon fristrasyon.

Dezyenm parti sa Mosyon, pe demann avek lezot pour travay, e azir dan en fason profesyonnel a tou moman. E donn zot kliyan meyer servis posib avek bi retir fristrasyon e ed nou pei avans devan.

Mr Speaker, sa mo "fristrasyon" i en gro mo ki Seselwa i koz bokou lo la. Me akoz i annan bokou fristrasyon? Sa i en kestyion ki nou tou isi dan sa Lasanble e an deor, nou kapab e oblize demann nou lekor.

Pour mwan Mr Speaker, fristrasyon i eggakteman parey sa problem drog ki nou pe lager pour eliminé dan sa pei. Tou dimoun i konnen kote drog pe ganny vann. Me drog i kontinyen ganny vann parey pwason lo bazar.

Egalman tou dimoun i konnen akoz e kwa ki pe anmenn fristrasyon dan nou pei. Me ou a krwar ki nou per pour *deal* avek sa problem, pour elimin li.

Pour azir dan en fason profesyonnel Mr Speaker - a tou moman e donn kliyan en meyer servis posib pa demann bokou. I demann annan lanmour pour ou prosen e kontan nou prosen, parey nou kontan nou prop lekor. Antre dan soulye sa endividé ki pe vin rod sa servis. Si nou met nou responsabilite avan tou, servis pour alaoter e misyon i ava ganny akonplir.

Alor Mr Speaker, dan sa lespri ki mon pour siport sa Mosyon. Akoz i en Mosyon ki pe adres e fer referans lo kwa ki nou koman en Nasyon i anvi vvar.

En Sesel kot tou endividé, enkli nou isi dan Lasanble, nou desarz nou responsabilite byen e konsyansyezman pour benefis nou pei. Travay e azir dan en fason profesyonnel a tou moman.

Ekout laspirasyon nou bann dimoun dan distrik, avek bi retir zot fristrasyon e ed nou pei avans devan.

Mr Speaker, in plis ki ler ki koman en Nasyon, nou tou san leksepsyon nou pran nou responsabilite o serye e travay dan lentere nou pei.

Fer sa ki byen e nou ava resevwar benediksyon Bondye malgre ki nou zonm nou pa parfe. Mr Speaker, avek sa de mo, mon pour donn mon sipor total sa Mosyon e demande ki nou kontinyen travay avek lasazes sorti kot Bondye. Mersi Mr Speaker.

### **MR SPEAKER**

Mersi Onorab. Mon a donn laparol Onorab Doyace Porice.

### **HON DOYACE PORICE**

Mersi Mr Speaker. Bonzour Mr Speaker e tou bann – mon bann koleg Onorab e tou dimoun a lekout.

Mr Speaker, sa Mosyon anmennen par Onorab John Hoareau in vin dan en moman apropriye pou mwan. Set akoz pandan *recess*, mon'n fer mon devwar ansanm avek mon *clerk*, pou sorti dan lofis e al vizit en pe bann travayer dan sekter piblik.

Pour lenformasyon Lasanble ki sa vizit in ed mwan avek mon *clerk* konn sa bann travayer pli byen, konnen ki – konn byen zot louvraz, e osi kot zot lofis i ete.

In osi ed Lofis *MNA* pou annan plis lenformasyon pou kapab ed zabitan ki vin war nou. Mon kapab dir ki nou'n byen ganny akeyir dan sa bann lofis par bann travayer, e zot in apresye nou vizit.

Mr Speaker, nou'n ganny bon dyalog e osi tir en pti portre ansanm. Bann travayer in dir mwan ki premye fwa, ki zot in ganny en tel vizit parey.

Pour mwan ek mon *clerk*, nou vreman pare ozordi pou felisit sa bann travayer, pou sa bann bon travay ki zot pe fer lo nou pti zil Praslin, e osi Zil Pros.

E nou'n dekouver ki i annan lofis ou departman, ki'n annan zis 2 travayer. Sirtou en landrwa parey *PMC*, ki nou tou nou konnen ki annan bokou pou fer.

Mr Speaker, Mr Cliff ek son asistan i kouver Grand Anse Praslin, Baie Saint Anne e La Digue, e zot pe fer byen, menm si zot fatige, e mon felisit zot.

In montre nou ki i annan travayer ki aker pou zot travay e zot desarz byen. Kot pou mwan i pa fasil, me mon pou demann ek Minister konsernen pou asiste sa 2 travayer.

Mr Speaker, travay lo nou zil, e Zil Pros i annan ki pe fer tre byen, e publik i satisfe, zis parey travayer *SLA*, espesyalman Miss Daniella e Andy ki ti donn nou bon lenformasyon dapre nou kestyon.

Ki nou'n demande kot zot in byen apresye, *ASP* Ms Romina ek Ms Zinta, *Land Registration*, Mr Christopher e

Mr Makoniani, zot tou pe donn en bon servis. *MLH* Andy, Ron e Errol zot tou byen satisfe ek travay.

Me pou *Registration Office* Miss Sakina ti pe eksplik nou ki travay i vreman enteresan. Me i zis ki i annan serten keksoz ki fodre aranze, kot i konsern donn zabitan en resi anler. Mr Speaker, sa mon pou diskit ek Minister konsernen.

*HFC* Ms Bigitte, Ms Santa, e Ms Natifa lo resepsyon, Terry, e Micheline, kot *SIB*, mon'n kapab dir ki zot pe fer en bon travay e zot pe vreman kontan zot louvraz.

Lo kote Ms Liza, kot Imigrasyon, in menm diskit serten lenformasyon kot i konsern simityer, e ki fason pou ed zabitan dan demars pou ganny trou pou anter zot pros.

Kot i en problem lo Praslin, byen lontan, li osi mon pou vreman felisit li pou sa pasyans ki annan dan son travay.

Me petet nou pou demann lezot travayer, pou zot osi anmenn plis zefor pou ede - pour ed zot osi siport zabitan. Mr Speaker, mon ti osi zwenn avek Liza, Miss Mardi ek 2 lezot travayer dan *Library* Grand Anse Praslin.

Kot zot osi pe byen satisfe ek zot kondisyon travay. Me zot zis pe trakase avek serten

zot lofis ki annan *fungus*, e pe esper zot ti larzan, e la nou pe *take up* ek Minister konsernen.

Sa Mosyon i pou ed mwan, pou kontinyen vizit lezot travayer sekter piblik, e osi sekter prive pou konn plis zot pwennvi e konn zot louvraz, e lofis.

Mon swe se pou kouver *maximum* tou travayer, konn plis lo zot, ek zot louvraz, akoz parfwa Mr Speaker, fodre nou vvar pour nou menm. Non pa tro ekout mansonz, mon pa dir napa, me nou bezwen sertifye la realite konsyansyezman.

Sa i pou ed bann lezot travayer pou azir dan en fason profesyonnelman a tou moman. E donn zot kliyan meyer servis posib e pou retir fristrasyon, e ed nou zil e pei avans devan.

Akoz nou Ladministrasyon LDS ek Gouvernman i vreman akeyir, e apresye bann tel travayer parey. E siport bon konpansasyon anver bann ki fer byen.

Mr Speaker, sa i anmenn mwan pou dir avek Manm Elekte pour Baie Saint Anne, pou aret fann bann fo lenformasyon kot....

### **MR SPEAKER**

Onorab! Onorab! Pa akseptab. *Retract.* Ou pa kapab akiz en lot Manm ki i pa pe fer son

louvraz byen. Silvouple *retract.* *Retract.*

### **HON DOYACE PORICE**

Mon *retract.*

### **MR SPEAKER**

Mersi. Kontinyen.

### **HON DOYACE PORICE**

Byensir apre konblaz ki Prezidan Rene ti ganny fer, e sa msye pa ti konnen ki pou fer avek, la kot zabitan ti war en pti langar e bwaze ek pye sed, ki swadizan ti pou fer lasose.

Alor Gouvernman LDS in konnen ki pou fer avek, e akoz proze Kato Nwar, se pou donn sans bann biznesmenn pou fer plis biznes. E anmenn plis lanplwa pou bann zabitan ki pa travay dan plas langar ek pye sed.

Mr Speaker, i annan travayer ki dir mwan fran ki \*LDS in vin gat tou keksoz, akoz zot in ganny larzan an labondans dan lepase. E menm zot lakaz ti ganny peye.

Me la i bezwen leve e debourye pou ki i kapab avanse. E mon felisit sa travayer! Ou war Mr Speaker akoz nou annan serten travayer ki'n arriv koumsa.

Parfwa olye nou ed zabitan pour al travay, nou plito dir al kot ASP. Praslin sirtou Baie Sainte Anne tou dernyerman nou annan bann

bon travayer ki vreman debourye ki dan prive ouswa sekter piblik. E zot pe *achieve* zot rezulta e mon felisit zot dan fon mon leker.

Alor mon dir avek tou travayer lo zil Praslin, e Zil Pros, espesyalman Baie Sainte Anne pou kontinyen sa bon travay.

Pa zanmen ekout mansonz ki pas otour zot, o kontrer ed bann ki ti a kontan al pli devan, pou anmenn sa bon servis ki kriter Gouvernman i demande.

Mon la pou siport zot e anmenn sa soutyen, determinasyon pozitivman pou ki nou distrik e nou pei Sesel avans pli devan.

Mr Speaker, avek sa 2 mo mon pou donn mon sipor sa Mosyon anmennen par Onorab Hoareau. Mersi.

### **MR SPEAKER**

Mersi Onorab. Avek sa nou a pran poz e nou a repran deba 11 er. Mersi.

### **(BREAK)**

### **MR SPEAKER**

Permet mwan zis verifye non bann Manm ki'n lev lanmen deza, pour mwan fer sir ki mon pa'n mank personn.

Mon annan Onorab Roucou, Loizeau, Bastienne avek Arissol Sandy, e Henrie, Spiro e Loze, korek? Madanm

Onorab mon krwar, mon ti'n vvar ou'n lev ou lanmen depi avan, en pe vitman mon pa ti tro sir si ou'n soz... Mersi.

Lemiel e Onorab Cosgrow tre byen. Byen. Wi. Mon ankor pe pran non bann dimoun, mon'n zis fer sa pour verifye bann ki'n soz lo la. Onorab William.

Tre byen nou a komans avek Onorab Roucou?

### **HON MICHEL ROUCOU**

Bonjour Mr Speaker. Bonjour tou Manm Onorab, tou dimoun ki pe swiv nou dan lakour. Espesyalman bann travayer dan servis piblik e zabitant Mont Fleuri, en bonjour spesyal pour zot.

Mr Speaker, avan mon ti komans mon parkour koman en Manm Lasanble, mon ti osi en *public servant*, kot mon'n travay pour bokou mon letan avek *HFC*, apre ki in bouz *PMC*.

E koman leksperyans, koman en *public servant* pa toultan ki'n fasil. Akoz sa responsabilite, ki nou ti annan sa se ou travay avek bann *Housing Estate* ki pour Gouvernman.

E sa ou pe travay avek li menm li manm piblik ki ou kapab dir avek diferan kalite mantalite, diferan latitud li menm li. Ki si ou napa latolerans, ou napa pasyans ou pa ti pour kapab *make it* koman en *public servant*.

Akoz souvandfwa ou ti vwar kot ou ti bezwen kontinyelman *remind* manm piblik lo bann serten responsabilite, ki lo bann keksoz ki Gouvernman i met a zot dispozisyon. Pour ede ki demen lezot osi tou i kapab benefisyé.

Mr Speaker, mon'n komans koumsa akoz mon konnen poudir se ki pour en *public servant* souvandfwa, pour sa responsabilite ki zot in gannyen i pa sitan fasil.

Be selman zot persevere avek bokou lankourazman ki zot gannyen avek diferan bann lezot *partner*, ki zot, zot pe lyez avek dan zot parkour travay.

E ozordi ler ou pe get en *public servant* Mr Speaker. Nou konnen poudir zot annan bokou konsern, zot annan bokou keksoz ki petet zot ti a voudre vwar ki ganny amelyore, ouswa pe ganny anmenn devan.

E nou as bann *leaders* nou la pour sa. Akoz mon dir sa Mr Speaker? Dan sa travay ki nou pe fer, koman en Manm Lasanble e osi responsab pour en distrik. Nou travay avek bokou bann *public servant*.

Mon kapab mazin enn de, Lenfrastriktir li menm li dan bokou distrik i annan klinik. I annan bann lezot facilite ki la pour deservi nou manm piblik.

E mwan mon pou dir se ki mon vreman apresye pour sa servis ki nou gannyen. Nou konnen poudir souvandfwa i annan en lekspektasyon parmi manm piblik, la deor.

Pa tou keksoz ki pour vin parey manm piblik i anvi, me selman nou konnen poudir zot sey zot mye. E ozordi zis pour fer en vire dan mon distrik Mr Speaker pour sa dernyen 4 an la, nou'n vwar kot i annan bokou devlopman.

Lo kote semen, lakaz li menm li; lo kote bann dimoun zot menm zot ki anvi *build* zot novo lakaz, biznes. E tousala i komans par bann *public servant*.

Dizon i pe donn *loan* ki pe donn sa servis, dizon ki pe ede dan en lot fason. Bann *teachers*, ki travay avek nou bann zanfan, tousala.

Mr Speaker, sa semenn bann *teachers* zot menm zot ki en *public servant*, ki nou zanfan li menm li, ki zot vin dezyenm paran nou zanfan. Akoz nou zanfan i pas laplipar letan avek zot.

Zot ti a pros mwan, avek en demann. Zot ti dir ek mwan koumsa, dan lepase zot in deza fer en serten travay avek ansyen *MNA*, Minis Ferrari. E zot ti anvi fer li lo en dezyenm faz kot sa se ki, zot ti anvi konnen kote bann zanfan i reste dan kominate.

Zot ti anvi vwar sa lanvironnman li menm, li kote sa bann zanfan i reste. E parey ou konnen kot bann lekol i annan bann zanfan ki petet i annan problem sosyal, nenport ki problem ki vin avek.

Zot, zot menm zot, zot ti anvi eksperyans enn pti pe dan kominate pou zot vwar enn pti pe. E sa i vreman ankourazan, akoz ou vwar koman en *public servant* zot pa pe zis pran sa responsabilite ki la kot lekol.

Zot vini en semenn, zot la ek nou zanfan. E zot anvi al enn pti pe pli lwen ki sa, kot zot ava vwar egzakteman kote sa zanfan i sorti? Kwa ki i pe pas ladan e ki lanvironnman i ladan li menm li?

E mwan mon vreman ankouraz sa akoz mon'n dir zot *ok*. Napa problem, organiz en zour selman pa bann letan kot i annan Lasamble. Kot mwan menm mwan mon kapab mont avek zot, nou ale nou montre zot.

E as en *public servant* i montre ou poudir sa bann *teachers* zot menm zot. Zot annan zot lakour, zot annan zot fanmir, me zot pe war, zot pe rod en letan pour zot kapab al dan bann lezot lanvironnman pour zot ganny en pti pe pli byen konpran.

E sa pour ed zot dan sa travay ki zot pe fer. E

souvandfwa mwan mon rod enn pti moman letan kot mon sot enn pti pe kot lekol pour mwan kapab donn mon sipor e langazman lo nenport ki nivo ki zot, zot bezwen.

Osi i annan bann lezot, *public servant* ankor ki ofer bann servis dan distrik. Nou bann Ners Mr Speaker, ti fek Lazournen bann Ners kot la osi tou i annan mis morel avek son lekip ki la Corgat Estate.

Ki pe donn sa servis akoz nou konnen poudir Corgat Estate i deservi distrik Plaisance tou, Mont Fleuri. E enn pti pe dimoun ki sorti dan Bel Air ki zot vini zot deservi sa.

Ou war sa langazman ki zot annan. Zis ou leve, zot leve bomaten pour zot al dan zot travay sa i montre sa komitman ki zot anvi pour ede pour fer ki nou distrik an menm tan nou pei ek lasante nou bann dimoun, nou bann rezidan i ganny *take care of*.

E mon vreman apresye akoz souvandfwa li menm li mon war bann Ners pe monte dan distrik pour al vizit nou bann dimoun aze Mr Speaker ansanm ek Dokter pour donn zot sa servis.

Oubyen ou menm mwan, mwan menm mwan dan mon pe pase dan distrik kekfwa i annan en dimoun, en dimoun aze ki vini i met dan mon latansyon, i dir mwan Onorab

be mon pa pe war mwan akoz lasante, lafors in diminyen.

Si ou kapab zis gete avek lopital si nou pa kapab ganny sa servis kot Dokter i bezwen mont kot nou, kot la Ners zot pare koman en *public servant* pour zot koz ek Doker pour zot kapab donn sa servis.

Mon le remersye zot pour sa Mr Speaker. Osi ler nou pour marse dan distrik Mr Speaker ozordi Corgat estate, nou war i annan 16-unit la ki byento, i pour annan son alokasyon avek bann kriter ki sa Komite Alokasyon i annan.

E tousala i pa vin par deswit, i annan bann *public servant*, i annan bann travay ki bezwen ganny fer. Premyerman i komans par travay bann *housing officer*, bann zofisyen kot Minister Lakaz ek Later.

I en travay e mwan mon santi, mon santi sa langazman ki zot annan e osi la Mr Speaker, ki zot in vwar apre en legzersis ki zot in fer? Se ki zot in vwar poudir se ki'n annan mazorite dimoun dan sa landrwa ki pa pe fer zot kontribisyon.

E dan en diskisyon ki mon'n gannyen ek zot se ki bann dimoun in pare pour zot sakrifye en zour pou zot mont dan sa landrwa, pour zot al koz avek bann ki pa pe fer sa kontribisyon ki demen avek

redevelopman ki pe al kontinyen.

Akoz ozordi menm i annan *meeting* avek en group dimoun, ki pour ed zot ki pour komans bouze pour kapab ganny teren, pour zot kapab *build ankor 32-unit*.

E sa bann *public servant* Mr Speaker, zot, zot in pare, zot in donn komitman zot lekor ki menm apre ler travay. E tousala i bann keksoz ki i donn ou sa lankourazman pour nou donn zot sa sipor.

Mr Speaker, mwan mon'n pare, pour mwan travay avek nenport ki endividé. Ler mon vin travay avek ou mon pa vin gete ki ou kouler politik, ki ou larelizyon mwan.

Nou'n vini, nou'n vin travay pour nou kapab anmenn nou pei devan, anmenn nou distrik devan, kot sa i kapab ede li menm li pour bouz, bouz bann lezot keksoz ankor Mr Speaker.

E tousala se bann lankourazman ki nou, nou war e mon apresye ki sa travay ki bann *public servant* i donne, ki zot pe donn nou e ki zot donn nou distrik Mr Speaker ki nou donn nou bann zabitan.

E parey nou dir o komansman nou konnen poudir pa tou keksoz ki pour vin dan lekspektasyon ki nou, nou anvi.

Mwan osi tou mon ti annan en lekspektasyon. Mon ti ekspekte poudir se ki i annan keksoz kan mon pour anmennen i pour bouz deswit. Me non i annan bann formalite e zabitan li menm li, zwenn ansanm avek nou, isi dan Lasanble pour nou donn nou bann *public servant*.

Akoz ozordi Mr Speaker, ozordi kot nou reste i annan en Ners, i annan en *teacher*. Mwan kot mon reste mon annan *teacher*, mon annan Ners, mon annan dimoun ki travay dan nenport ki departman ozordi. E nou viv koman en fanmir.

E si nou, nou pa donn lankourazman kanmarad Mr Speaker lekel ki pour donner? Koman bann dimoun ki la pour desarze e pour edik bann ki vin apre nou pour zot kapab pran bann responsabilite.

Akoz tou keksoz i komans dan kominote, ou leve bomaten ou al travay kot ou kapab donn sa bon servis. Nou konnen poudir mazorite fwa Mr Speaker, i annan bokou konsern.

I annan bokou konsern an term lo petet lo kote servis ki petet ki serten dimoun i gannyen, ki sa i anmenn serten fristrasyon.

Me selman nou, nou la nou pe dir ek bann dimoun tou dimoun ozordi i annan problem, tou dimoun i annan

son rev demen ki i ti a voudre achieve.

Me selman ler nou'n ganny en responsabilite, nou bezwen nou osi zwen nou rol. Si ozordi ou leve Mr Speaker, ou al en *interview* pour ou ganny en travay, se ki i akoz en desizyon ki ou ou'n pran.

I en lanvi ki ou anvi zwenn en tim pour ou travay ladan pour ou ed sa departman pour li kapab li osi donne.

Ou pa'n zis leve ozordi ou fer *interview*, dir ou anvi al travay laba. Se ki ou pour ganny en saler, wi? Me selman i annan en responsabilite.

E premye keksoz i ki *once* ki sa dimoun i antre dan sa laport, sa premye dimoun ki i zwenn ou bezwen fer li *feel* konmsi ki i *welcome* dan sa landrwa.

Nou pa kapab antre en landrwa – i annan enn de landrwa ki mon'n antre Mr Speaker, ou dir bonzour ou pa ganny en respons. Ou bezwen dir dezyenm fwa pour ou gannyen.

So nou bezwen *once* ki nou ganny en responsabilite, pour nou kapab donn manm piblik sa *welcoming* pour soulaz li, pour nenport ki keksoz ki pe vin rod sa servis i komans avek nou menm nou.

I komans ek sa dimoun, komansman sa resepsyonnis, menm sa *cleaner* ki la dan sa

lofis. I ede pour li kapab ede pour fer sa lorganizasyon marse. E osi Mr Speaker en lot pwen mon le tous lo la.

Bann *CEOs*, ozordi si ou anvi ki nou bann travayer zot menm zot, zot donn sa servis de kalite, nou osi nou bezwen lo en serten nivo bann *CEOs* zot zwe en responsabilite.

Nou bezwen zwe sa *leadership* ki pour ede ki bann ki vin par anba nou tou zot osi tou ler zot war poudir zot pe ganny sa gidans byen, zot pe ganny sa lankourazman.

Ki sa i kapab ede ki bann servis i gannyen pour donn enn pti pe pli o nivo. E sa enn pti pe ki pour ed nou Mr Speaker, pour nou bouz de lavan. E mwan mon vreman apresye avek bann lazans ki mon'n travay avek Mr Speaker.

Souvandfwa nou organiz bann *meeting* ansanm ek bann zabitan, pour nou kapab anmenn bann serten nide, apre ki bann zabitan zot menm zot, zot anvi war ki zot in met dan nou latansyon.

E nou'n war poudir bokou bann servis biblik, bann zofisyen zot pare menm apre ler travay pour zot kapab vin avek nou lo teren, pour zwenn ek bann zabitan. E pour sa mon dir zot en gro mersi Mr Speaker.

I montre sa pozitivite, i montre sa langazman sa

responsabilite, ki sa i kapab ede ozordi dan *public servant*, pour ede pour nou pou, pouz nou travay zot departman ki zot ladan li menm li.

Nou konnen ki poudir *Guy Morel Institute*, Mr Speaker i pe fer bokou lo bann programm *Leadership* pour ede, ki bann dimoun i ganny bann bagaz li menm li ki demen sa i kapab benefisye i vin en benefis pour pei.

Mr Speaker, sa Mosyon anmennen par Onorab Hoareau in vin a en moman letan. Akoz nou war poudir souvandfwa ler bann konplent ki vini, bann konsern e tou dernyerman parey nou war lo *Facebook* i annan bokou keksoz pozitiv.

Lo kote lasante, lo kote bann servis ki pe ganny donneen par bann *public servants*. Me selman i annan zis enn pti gin ki, enn pti group, ouswa enn pti minorite dimoun ki petet avek letan zot a kapab vini zwenn zot osi pour kapab ede pour kapab donn sa servis o nivo.

E mwan mon pour donn mon sipor sa Mosyon, anmennen par Onorab Hoareau. Akoz mon kapab dir se ki mon vreman apresye, pour bann devosyon ki bann lazans i annan. Mon kapab mazin enn de Ms Elsia kot Lenfrastriktir, e kot Ian kot *SLTA* ansanm avek zot tim.

Mr Speaker, bann *teachers* li menm li ki pe zwe en rol dan nou kominote, pour fer sir ki zot konn langazman bann paran dan nou kominote e i bann lezot servis ki nou, nou gannyen, *SPTC* li menm li.

Kot sa i ede Mr Speaker pour nou kapab bouz de lavan e anmenn sa servis. Parey ou war toulezour ler ou leve bomaten ou war en dimoun pe leve pe al travay. Savedir sa dimoun i annan en lanmour pour son travay.

E once ki antre dan sa travay, sa servis ki i donnent, nou konnen poudir ki pa tou keksoz ki parfe. Me selman nou - mwan menm mwan ansanm ek mon lekip, nou donn sa langazman pour nou kontinyen donn nou sipor bann *public servant* bann dimoun ki pe - bann *public* bann dimoun ki dan *public* - servis piblik kot pour nou kapab anmenn nou distrik, anmenn nou pei de lavan.

E si i annan okenn keksoz nou asize nou dyaloge e nou rod en semen annavans pour fer sir poudir ki nou pei.

Akoz ler i ariv sa nivo Mr Speaker mon pa krwar poudir i devret annan en lager politik ladan.

I devret annan sa lanvi, sa konsantman li menm li pour nou kapab travay koman en tim. E mwan mon donn mon *full* siport bann dimoun

ki travay avek nou dan distrik, pour nou kapab kontinyen li menm li pour nou kapab bouz enn pti pe pli devan.

Onorab Hoareau kont lo mwan pour mwan donn mon sipor sa Mosyon ki ou, ou'n anmennen. Mersi.

**(APPLAUSE)**

### **MR SPEAKER**

Mersi Onorab. Mon a donn laparol Onorab Loizeau.

### **HON NORBERT LOIZEAU**

Mersi Mr Speaker. Bonzour tou Manm, tou dimoun. Bonzour tou dimoun a lekout. Mr Speaker, mersi pour ganny en sans pour koz lo sa Mosyon.

Parey ou'n dir ou'n donn 20 minit, apre ki mon'n ekout deba, mon garanti ou ki mon pa pour koz 20 minit. Mon pour fer li pli kourt posib.

Mr Speaker, pour komanse premye keksoz ki mon anvi fer ler mon'n lir Mosyon, mon anvi felisit tou travayer dan sekter piblik.

Mon dir tou, tou bann ki pe fer zot travay byen. Parey Onorab Hoareau in dir e konsyansyezman, e bann osi ki pe trenn lipye Mr Speaker, mon anvi felisit zot. Akoz mon anvi felisit zot?

Mon anvi felisit zot pour ki zot ava fer parey Mosyon in dir, pour ki pour demann

lezot, sanmenm sa bann pour zot fer parey sa bann ki pe travay byen Mr Speaker.

Alor mon anvi felisit zot tou. Mr Speaker, ler nou ti antre dan eleksyon, nou ti vin avek en tem, ‘Sesel pour tou son zanfan’.

Rezon nou ti vin ek sa tem Mr Speaker, se akoz nou ti anvi tou Seselwa travay dan sa pei, pe enport ki ou parti politik ki ou siporte ki ou larelizyon.

Mr Speaker, akoz nou ti fer sa? Nou ti fer sa akoz politik ti'n antre dan servis piblik. E si nou mazin byen Onorab Georges fek fer resorti taler ler nou ti pe koze ki, ti napa politik dan servis piblik dan bann lepok kolonyal, bann lepok premye repiblik.

Me politik in antre apre. E nou ler nou'n vini nou'n war sa nou dir *ah!* be *ok* annou tir sa. Annou fer Sesel pour tou son zanfan.

Mr Speaker, nou'n dir sa akoz, tou sa ki nou fer ler nou pe travay dan servis piblik, nou bezwen fer li pour Sesel. Alors Mr Speaker, i enportan ki tou travayer servis piblik i donn tou san okenn preferans.

Se sa rezon ki zot apel servis piblik. Tou dimoun ki vin rod en servis Mr Speaker, i bezwen ganny trete byen. E menm si sa ki'n vin rode i pa'n gannyen.

Me selman ler i sorti pour dir, *ah!* Mon pa'n sa – mon pa'n ganny sa keksoz petet ki mon ti pe rode. Me selman mon'n ganny en bon servis.

Ler i pour ariv kot li i poudir *man be* mon'n al kot tel biro. Malgre mon pa'n *successful*. Me selman mon apresye, mon apresye servis ki mon'n gannyen Mr Speaker. Sanmenm sa ki nou apel servis dan servis piblik.

Mr Speaker, Onorab Hoareau in koz lo birokrazi, Mr Speaker, wi, i annan. E Onorab Hoareau in dir ki fodre ki nou retire. Mr Speaker, akoz sa bann keksoz ou konnen ki i fer? I fer dimoun ankoler, i fer dimoun fristre, parey dan Mosyon, parey dan Mosyon in dir.

E mwan Mr Speaker ler mwan pe, ler mon sa *issue* la, i pe fer mwan mazin en senp pti keksoz, ki en dimoun ti fristre avek.

Ti annan en dimoun ti'n al en landrwa - Sid Afrik e in war en transpor ki in kontan, sa lazans pa fer vini sa transpor isi ekspekte bann lot *car dealers*.

Me li i ti anvi fer son transpor vini li menm. E i ti annan son fanmir laba, ki fer bann biznes *shipping*. Alor i ti fer sa. Difikilte ki i ti gannyen se ki akoz sa lazans loto, in tir sa loto dan sa *warehouse* laba kot zot, in anmenn kot sa

dimoun pour fer *shipment* Sesel. Zot dir li sa loto i *secondhand*. Zis akoz i sorti la in al laba.

Mr Speaker, sa dimoun in ankoler, me selman par kont sa ki enterese Mr Speaker, dan bann negosyasyon ki'n ganny fer, keksoz in bouze e problemm in rezourd. Ou konpran Mr Speaker, bann senp pti *issue* koumsa ki pa merit arive ki senp e ki sa in arive.

E ozordi Mr Speaker, i annan biznes ki mon konnen malgre apre keksoz in soz ki zot in *apply* zot pa'n ganny aprouvasyon pour fer serten keksoz. Serten *planning permission*. Serten rezon ki aplik pou serten dimoun petet.

Zot in santi poudir sa dimoun pa bezwen gannyen. Me apre *appeal*, apartir *appeal* in reisi kapab fer li Mr Speaker. Savedir nou servis piblik pe bouze.

Malgre Mr Speaker sa dimoun ki ti pe blok sa, pa'n kapab dir ki rezon, ki rezon ki sa pa merit ganny fer. Mr Speaker ou trouve bann senp pti *issue*.

Me selman sa ki enteresan ozordi Mr Speaker, ler zot dir non i pa vedir ki ou'n ganny kondannen. Ou fer ou *appeal* e keksoz i ganny diskite e keksoz i bouz devan.

Mr Speaker, ou konnen ozordi imen sa, parfwa i annan

imen ki ganny plezir, ki ganny plezir dan fer, dan fer ditor dimoun. Dan fer dimoun ankoler; i annan imen, i arive.

Me nou, nou anvi ki sa i tire, annou elimin li akoz Sesel pour tou son zanfan e tou Seselwa i bezwen kapab ganny en sans pour li kapab pour ki kapab fer en keksoz san pri serten landrwa.

Mr Speaker, par kont mwan mon'n eksperyans sirtou i annan serten departman Minister. Mr Speaker, ki zot servis i sanpyon konmsi Minis Rangasamy sanpyon, sanpyon!

E mon a donn en legzanp, mwan dernyen fwa mon ti ganny enn pti problemm lizye, mon'n al kot Klinik Lizye. Mr Speaker mon ganny mwan apwentman, mon'n ganny en mwan mon'n esper mon en mwan, pa en mwan akoz ti en pe grav, semenn.

Mr Speaker, mon'n ale, mon pa'n ale dan prive, mon'n al kot Minister Lasante pour mwan fer sa. Mr Speaker, akoz mon pa'n al dan prive mwan? Akoz nou bezwen donn lespwar nou bann profesyonnel ki pe travay dan Gouvernman, dan sa bann servis.

Akoz nou anvoy zot *training* apre mon pour al dan prive. Mr Speaker, mon'n al laba, mon'n ganny tou mon

swen, ki mon'n gannyen e menm pli byen ki mon ti pour gannyen dan prive.

E la Mr Speaker, mon anvi felisit sa bann dimoun ankor kot Klinik Lizye. Zot annan lekipman e mon anvi dir ek Seselwa pa per nou bann profesyonnel.

Annou servi nou resours ki nou annan, nou bann profesyonnel i kapab. Annou donn zot sa konfidans pour zot bouze. Mr Speaker annou mazin *COVID*. Ler *COVID* ti vini get travay ki Minister Lasante in fer, pour nou kapab *deal* ek *COVID*.

E sa bann travayer lasante, zot in donn tou, tou sa ki zot kapab lannwit lizour pa'n dormi zis pour fer sir ki nou pei i kapab redrese e nou'n get on avek lavi.

Me par kont Mr Speaker, mon pa dir ki tou keksoz i parfe dan sa Minister. I annan defayans, partou i annan. Partou i annan. Mwan koman *MNA*, mon'n sey fer kontak avek en serten dimoun en pe o, pour en dimoun ki ti annan en malad en pe serye pour – mon ti pe ganny en pe difikilte pour mwan kapab ganny sa kontak.

Me selman Mr Speaker, mon'n pouse, me apre mon'n kapab fer sa kontak e keksoz in bouze. Be an dizan sa mon'n realize ki parfwa sa

bann dimoun, wi parfwa zot pe donn nou en pe –

Me selman parfwa mon pe mazin sa *load* travay ki annan lo sa dimoun. Malgre mon'n ankoler ek li mwan Mr Speaker, mon'n ankoler ek li seryezman.

Me apre ler mon realize koman en imen mon dir, *man be* sa boug i annan en ta keksoz dan son lasyet. Alors annou pran keksoz en pe easy parfwa lo zot. Alors Mr Speaker mon anvi – mon anvi felisit sa bann dimoun ki donn mwan sa bon servis.

E i annan dimoun ki mon'n avoy laba Mr Speaker ki'n ganny sa bon servis e zot pe dir mwan dir sa bann dimoun. Mersi bokou.

Mr Speaker, ozordi nou servis publik i annan en ta dimoun i konplent. E parfwa i annan ou konnen ki i dir, Prezidan i *micromange*.

Mr Speaker, parfwa prezidan i bezwen *micromange* pour fer keksoz bouze. Akoz i annan serten landrwa Mr Speaker kot travay ti al *usual*.

Ou konnen Gouvernman in sanze nou, nou pe vin avek en nouveau fason travay prezan i annan ki'n toulstan dan en kwen pe travay dan sa fason ki zot ti abitye travay.

Aprezan zot pe war li difisil pour antre dan sa nouveau fason. E prezidan se pour sa

rezon koman Sef Legzekitiv, ki mon pa war nanryen mal ki i desann. Li ki ansarz sa bann Minister, i desann e in ver serten travay e la mon mazin kot *MLUH* Mr Speaker.

Prezidan in desann kot *MLUH* pour sey ede pour bouze, ozordi *MLUH* pe bouze Mr Speaker. Mwan mon'n ganny 6-unit Sans Soucis. I pa en ta lakaz, solman mon'n dir mersi.

Nou annan negosyasyon nou pe fer la pour nou al fer ankor en 20 ekek *unit* apre en lesanz. Mon dir zot mersi.

Lontan koman *MNA* mwan, ler mon ti dan Lopozisyon, mon pa ti kapab fer sa! mon pa ti kapab fer sa! Ozordi mon santi mon kapab fer sa.

E *SIA* Mr Speaker, nou merit pran legzanp, Mr Speaker. Bann dimoun dan servis piblik, ler nou pe koz konsyansyezman lezot fer parey, pran legzanp Mr Jitesh CEO Jitesh Mr Speaker.

Pran legzanp lo li sa travay ki pe fer, en zenn *homme*. Mr Speaker lannwit lizour sa boug i travay, napa en ler ki mon *call* li ki sa msye pa pran mon *call*.

Lannwit lizour si i dir mwan i pour call mwan apre 4 er i *call* mwan. Mr Speaker zis pour nou pa – akoz? I konnen dimoun pour fristre.

Sanmenm sa i pe fer son travay byen, konsyansyezman, alors mon anvi demann tou lezot dimoun pour fer parey. Mr Herath, Mr Speaker, Mr Herath kot land transport.

Bougla *call* li *anytime*, i pran ou *call*, i koz ek ou i pa net ou retar, i pa dir ou non. Par kont Mr Speaker kot *SLTA* i annan pe donn lenfirmite, nou pa pour kapab dir non. Mwan mon pa pour vin dir ki tou keksoz i an roz kontan ki Prezidan i kontan tande.

Parfwa nou bezwen dir keksoz ki pa pour kontan tande. Me selman Mr Speaker, ki mon pe fer ler mon pe dir keksoz ki zot pa kontan tande. Parey mon'n dir la i annan serten departman ki annan keksoz pa pe fer byen.

Pour mwan Gouvernman fer pli byen, koriz sa bann fot. Sanmenm sa rezon ki ou war mwan mon vin koz lo la. E la, Mr Herath mon *loan* li Mr Speaker, mon koz ek li keksoz i bouze i annan proze dan distrik ki pe ganny fer, ki pe al ganny fer.

E elarzisman semen Curio Road, in fini koz ek mwan. I pe bouze lalimyer in mete partou, mon pa kapab dir mon'n pa'n ganny nanryen. Mon pa'n ganny bokou, akoz *topographie* nou distrik.

Me selman Mr Speaker, mon dan servis piblik, apard

bann lot pti detay kot en ler i annan sa bann pti fristrasyon.

Mr Speaker, mwan mon ganny resevwar byen, me selman zis mon anvi dir ek zot an terminan Mr Speaker, mon'n dir ou mon pa pour 20 minit.

Mon pour kourt. An terminan mon anvi dir ek tou dimoun ki pe travay dan servis piblik, si nou'n deside travay dan servis piblik, savedir nou anvi travay ek piblik.

E ler nou travay ek piblik, nou bezwen fer sir nou travay byen, nou pa fer piblik ankoler. Nou pa fer piblik fristre. Nou donn piblik en bon servis, malgre ki mon'n pa'n satisfe ek larepons ki mon'n gannyen, me selman sa servis ki mon'n gannyen ler mon'n sorti laba, dan sa biro mon satisfe.

Mr Speaker, se sa, akoz avan tou Sesel i pour tou son zanfan. Konmsi Prezidan Faure, "Sesel i pli gran ki nou."

Ganny laglwar dan fer – dan pez en dimoun, met li retar Mr Speaker, i pour anmenn nou lwen koman en pei. Sesel i ptipti nou tou nou konn kanmarad. En dimoun i reste Anse Royale, koman ou nonm mwan son non mon dir, "an sa entel laba Mont Plaisir".

I osi sa dimoun Anse Royale, koman ou dir li en keksoz – en dimoun Bel

Ombre. I dir, "ah be sa kot Onorab Arissol laba mon konn li."

Mr Speaker, Sesel nou ptipti si nou anvi anmenn sa linite, dan nou pei, annou met nou politik de kote bann ki travay dan servis piblik, annou donn sa servis, annou donn sa servis, ki a lafen nou tou nou pour *happy*.

Mr Speaker parey mon'n dir ou mon pa pour pran 20 minit, mon anvi remersye ou pour sa pti letan ki mon'n koze. Mersi.

### **MR SPEAKER**

Mersi Onorab. Mon a donn laparol Onorab Sylvianne Lemiel.

### **HON SYLVIANNE LEMIEL**

Mersi Mr Speaker. Bonzour Mr Speaker. Bonzour tou mon bann koleg Manm Onorab. Mr Speaker, devan nou ozordi i annan en Mosyon. Anmennen par Onorab John Hoareau. Parti son Mosyon i pe demann Lasanble pour felisit bann travayer servis piblik.

Be ler nou get servis piblik an zeneral li menm, premyerman enn mon ti a kontan dir lo mon kote, mon le felisit tou travayer Seselwa - i enkli son servis piblik, e an menm tan prive osi, ki en moter nou lekonomi e ki pe fer marse sa pei.

En ta larzan sekter prive i osi pe enzekte dan nou pei. E mwan mon pour dir mon felisit tou travayer Seselwa. Ler mon vin lo servis piblik Mr Speaker. Mon pe tann menm loter Mosyon on dir, i pa oule politik pa fer politik ek sa Mosyon, me li menm li in komans fer politik ek sa Mosyon.

Segonder Mosyon in fer plis politik ek sa Mosyon. E enn de zot ki'n koze ankor in fer en pe politik ek sa Mosyon. As if ki zot ankor pe pran tou keksoz baz li dan zot koze ki zot pe koze, 5 an pase.

LDS in ariv 4 an depi ler i o pouvwar li. Ki sanzman in anmennen dan servis piblik Mr Speaker? Ok? Ozordi nou pe dir felisit travayer servis piblik ki mon dakor ek sa mwan Mr Speaker.

Akoz la ater, travayer servis piblik mwan mon pour dir zot pe travay, zot pe travay, zot pe debourye. E zot pe deboury avek resours ki zot gannyen, avek sa Gouvernman.

Mon war poudir sa bann dimoun pe seye travay. I annan dimoun pe fer louvraz 3 dimoun. Akoz? Serten dimoun in ganny pouse dan zot louvraz zot ale. Swa lo en baz politik, in ganny fer arete e apre ou war akoz servis petet i annan de nou, nou pe war servis petet in sanze, in diminyen nou pa pe satisfe.

Be petet sa travayer servis piblik li menm, i fatige. Nou bezwen gete, bann landrwa kot nou kapab met dimoun pour travay e dimoun konpetan pour kapab fer sa bann louvraz.

E ki zot a kapab donn en bon servis. Ozordi Gouvernman i annan li 13 Minister Mr Speaker. Dan letan ki zot in koz 5 an pase ki dapre zot tou servis pa ti bon ditou, dapre zot dan LDS. Ozordi i annan 13 Minister, departman en bann li osi.

Lazans plis ankor. Eski pep Seselwa i satisfe avek servis ki zot pe gannyen? Eski nou war poudir sa 13 Minister i vin pli efikas? Eski zot pe donne sa bon servis?

Detrwa Minister ou war, i annan serten Minis zot menm fek dir Prezidan i *micromanage*, i desann pour li *micromanage* akoz i ler fer son Minister mars pli byen. Be eski, sa bann Minister menm si Prezidan i vin *micromanage* eski zot pe fer pli byen?

Eski sa bann Minister li menm, menm si son bann Minis pe *micromanage* mazorite zot, eski zot pe fer pli byen? Ou tann plis konplent Mr Speaker.

Prezan ki annan konplent. Onorab Naidu in dir, ki ler i pase partou kot i pase i tann bann dimoun pe felisit son Gouvernman. Pe felisit

Prezidan pour sa bann bon travay ki i pe fer.

Be mwan marse mwan, ou konnen ki mon pe tandé Mr Speaker. Dir mwan! Bann dimoun pe dir, zot pe esper 2025 arive pou tir zot o pouvwar!

**(APPLAUSE)**

### **HON SYLVANNE LEMIEL**

Akoz Mr Speaker?

Akoz ki keksoz i pli pa pe marse ki avan. Nou'n ti'n dimoun konpetan dan louvraz, nou'n pou serten sa bann dimoun dan servis piblik, akoz i ti en *US*. Nou'n tir li i pe asize kot li oubyen in al dan en prive kot i pe *perform* bokou byen.

E prezan nou dir servis pa pe bon, travayer pa pe delivre, travayer pe trenn lipye. I paret mwan i ankor annan *US* dan Gouvernman ki zot anvi pouse *LDS*.

Me zot in dir taler zot menm, Sesel i pour tou son zanfan. E mon espere ki la ziska 2025, petet napa ankor dimoun ki pe ganny promet or ki zot manze pe kwi lo pti dife pour zot ganny pouse.

Akoz ki nou pour al war la? Nou pour war poudir zot servis, dan servis piblik pour pli deteryore ankor. Akoz zot, zot pour krwar, zot pe krwar zot pou pe fer en keksoz ki byen.

Ler nou get problem - annou get en kou problem ozordi en. Sa problem ki ti annan 5 an pase la. Annou get en kou ozordi ki annan. En litani problem i annan lo lalis la.

Premyerman enn ;- larepons kot *ASP*, pour plis ki 2 mwan i pran pour en dimoun gannyen. Sa i enn.

Trwa mwan zot pran, pou pran en desizyon pour donn en *carer* en dimoun. Eski en vye dimoun i kapab kontinyen esper pour 3 mwan pour ganny en larepons pour ganny en *carer*?

Mon annan en ka aktyel dan distrik - (pa rous pete lot kote) - mon annan bann ka aktyel. Trwa mwan en vye dimoun i ankor pe espere, pa ankor kapab ganny en larepons.

Selman *Home Care* i dir ou, i pe travay i pe travay, i pe deal avek li. Telefond ki pa ganny reponn Mr Speaker. I en pli gro problem sa. Sa i depi son Minis, ki mon dir ou mwan mon'n pas atraver, mon repet ankor - Minis pa pran sa telefonn akoz i dir ou i pa konnen lekel sa nimero.

Apre nou blanm travayer anba? Be i pran legzanp lo son Minis. *Email* pa ganny reponn. I komans depi son Minis ziska son pli ba. I pa ganny reponn, pa ganny *acknowledged*.

*File* ki ganny dormi lo la oubyen i perdi Mr Speaker. Fer dimoun vir an ron pour en senp pti problem, zot in koz lo la taler. En senp pti problem en dimoun, i vir an ron.

Mal koz ek dimoun dan servis piblik i en pli gro problem ozordi. En dimoun mon pa konnen ki mannyer in leve, li i vini pour li, i tir son lakoler, i tir son fristrasyon lo sa manm piblik ki pe *call* ki pe rod en servis.

Definitivman sa bann keksoz koumsa i pa pour *portray* byen lo en Minister departman oubyen lazans. En sel dimoun i ase, pour gat latmosfer travay dan en landrwa. En sel dimoun i ase sa.

Dokiman, ler ou al lopital. Dimoun i al tir dizan, rezulta disan i perdi, dimoun i bezwen retournen retir disan ankor. I form parti dan servis ki pe ganny donnen ki demann amelyore, ki demann revwar pour ki sa bann servis i vin pli byen.

Eski nou pour blanm 5 an pase? Mwan mon poudir 5 an pase i annan en bon pe sa bann keksoz, ki ti'n fini amelyore, ti'n aranze sa. Ou konpran. La dan letan ki Mr Faure ti Prezidan, en kantite sa bann keksoz ti'n amelyore ti'n aranze.

I ti pe seye pour anmenn servis piblik lo en pli o nivo. Keksoz ti pe aranze. Ozordi in pli deteryore ki zanmen!

Sistèm met apwentman kot lopital. Mon al kot lopital ler i dir ou midi, i *shut down*. E ou ki'n fini ou randevou, or ou pe vin rod en lot apwentman ou bezwen esper 1er si midi in sonnen. Ou bezwen asize esper ziska 1 er.

Akoz pour sistem reoran 1er. Me sa bann keksoz ki demann aranze letan nou pe get amelyor servis, amelyor servis piblik. Anpes dimoun fristre parey Mosyon pe dir.

Sa i bann keksoz ki merit, ganny aranze ki bann pti keksoz ki dimoun ozordi pe konplent ki nou merite pe aranze.

Minis pa oule war dimoun. I fer dimoun fristre sa. Minis pa war dimoun li. I dir ou al war sa lot dimoun pli anba. I dir ou li i napa letan pour war ou. I bizi i dir.

Mr Speaker, problem si nou al lo la, nou pour ale ziska tanto. Pasyan Anse Royale, pasyon i asize ziska 3erdan, ti'n rezourd sa problem. La in retourne ankor la. Pasyan i asize pour 3 erdtan lo ban pour esper Dokter.

Be eski sa i pa pour fer dimoun fristre? Eski sa nou apel li en bon servis ki pe ganny donnen? Nou amelyore pour 3 mwan, apre nou trouv

*back to square one.* Nou kontinyen donn sa bon servis, letan i ti en problem nou'n aranze. Me nou kontinyen lo la.

Nou pa kontiny pour enn pti letan apre nou tourn back. Telefonn Mr Speaker. Telefonn nou transfer li lo en lot dimoun. Sa lot dimoun ki pour reponn nou telefonn.

Sa kliyan, sa dimoun ki pe esper sa servis, ek ou koman sa dimoun ki ti anvi koz avek, me ou'n deside transfer ou telefonn lo swa ou sekreter, swa ou *clerk*, swa ou *whoever*. Be sa dimoun pa gannyen sa larepons ki i pe rode Mr Speaker. Ou konpran?

Ou bezwen fer sir *either* ou dir, sekreter i dir i pour *return call*, i a fer *return call*, *return call* pa zanmen arive. Zanmen dimoun i ganny en larepons. Sa bann pti keksoz koumsa, la i kree fristrasyon dan dimoun.

En dimoun i ekrir pour li ganny en larepons, i dir sepa i le kennsel tel keksoz. I bezwen en larepons deswit. Sa keksoz i enkli pey en *lease*. Ou pran 3 an pour ou rann li en larepons, e li i bezwen war li pe kontinyen pey sa *lease* akoz in dir ou kennsel mon pa oule, mon pa pour pran.

Ou, ou kontinyen pa rann li en larepons e ladan menm ler i pe lyez ek ou, ou pa

ti okouran ti annan sa. Selman bokou vizit in ganny fer, en kantite ka in ganny *take up*. Zis aksyon pour finaliz en demann ki en dimoun in demande, i pe pran 3 an avan i finalize.

(Pa konsern ou, ou a vin fer pli byen ou). Sa detrwa *US* ki dan Gouvernman Mr Speaker - sa bann dimoun mwan mon war zot, zot pe travay sa bann dimoun. Mazorite dimoun, mazorite dimoun, mazorite.

Mwan mon pour dir i annan en - si nou pe dir i annan dimoun dan servis piblik ki pe kree fristrasyon Mr Speaker. I annan enn pti minorite sa bann dimoun.

E mon krwar, ki nou bezwen fer Mr Speaker se ki tou Minister, i annan li son *clear* vizyon. Ou annan ou, ou *clear* vizyon ki ou anvi fer ou. Eski tou travayer dan servis piblik, i *onboard*?

Pour fer sir ki son Minister, divizyon departman i akonpli sa vizyon? Eski tou travayer i konnen ki *goal* ki aksyon ki i bezwen fer pour ki son Minister, son departman i akonplir en tel *goal* ki in met devan.

Landrwa travay, servis piblik, zot bezwen fer sir ki zot angaz zot travayer dan tou sa ki zot fer. Konmela mon war bokou *team building session* i ganny fer. I byen Mr Speaker.

E i ankouraze, i sipoze ganny ankouraze. Mwan mon war sa i en bon keksoz, akoz i en keksoz ki mwan mon ti pratik li avek mon bann travayer letan mon ti dan servis piblik. E i marse sa.

I marse. E petet i bezwen annan plis sa bann keksoz parey, ki bann Minister i fer, ki pour zot ankouraz zot bann travayer pour zot met travayer ansanm, konn kanmarad.

I annan travayer dan serten departman ki sitan departman, Minister i sitan gran zot pa konn kanmarad. Pa konnen si sa dimoun i travay dan sa Minister.

So i en enportan alors ki tanzantan i annan sa *team building session* e ki sa bann dimoun i get to know *each other*. Apre osi, nou bezwen fer sir ki letan en Minister in *set*, in *set* son vizyon, son misyon e ki goal ki travayer i bezwen travay ver pour li ariv kot sa misyon ek sa vizyon. I fer sir ki tou dimoun i *on board*.

Letan nou pe sey koz lo - mon'n tann en kantite legzanp ki zot in donne an sa ki konsern bann travayer landrwa travay, ki efikas. I byen letan nou pe dir *SLTA*. En legzanp ki mon pour donnek kot *VTS*. Sa bann dimoun zot servis vit, al la kot *VTS*.

E de plis i annan lot servis atase ek zot ki Licensing. Ou fer 2 zafer an

menm tan ou fini. Me i en landrwa kot ou pa al gaspiy ou letan Mr Speaker. Ki pour fer ou vir an ron. Ou ale 5 minit ou anmenn ou loto, in fini teste, fini zafer. La mon pe dir ou en servis ki efikas. En legzanp. Konpran.

Me i annan landrwa kot ou pa kapab dir, i en legzanp. *I am annan landrwa Gouvernman lokal, i annan son bout dan ler ki i fer ki ou dir i a sey marse.* Me i annan bout, ki i fer ki pa li ditou. Ou a vir an ron.

Enn i mont lo *site* i a dir ek sa kliyan sa dimoun wi nou pour kapab – sa pye dibwa nou pour kapab fer, nou pour kapab koupe. Ler i ariv kot son biro laba i sanz desizyon i dir, *DA* monte, tyeke gete *means test* li.

Me depi ler ou ti la kot li ou pa ti kapab dir li nou pour *means test* ou madanm, nou pour gete si i vre nou pour kapab koupe, si pa pour kapab koupe. Ou fer dimoun vir an ron prezant i fer ki en case i pran 1 an. En pye dibwa pour koupe i pran ou 1 an. Pa ti sipoze.

Sa bann landrwa ki nou bezwen aranze. Sa bann landrwa ki nou bezwen amelyore. Lasante, *Local Government* i annan son bout. Tousala i bezwen ganny aranze, e larepons pour ou donn en dimoun kot Later. Wi,

non? Nou fer li vit e sa i ava tir fristrasyon dan dimoun Mr Speaker.

Pour mwan dir zot selman aranze? I annan en kantite pour zot aranze *LDS*. En kantite aranze pour zot aranze, e parfwa zot bann prop dimoun, ki pe kree fristrasyon dan piblik la deor.

E sa zot bezwen ale, al fer en travay parey zot kontan fer zot bann *retreat*. Al asize ankor dan zot *retreat*, al regete, ki mannyer pour zot fer enn pti pe pli byen, pour zot retir sa bann fristrasyon ki zot ankor – e ler zot fer *retreat* Mr Speaker.

Pa fer li zis antre Minis, Prezidan. Fer *retreat* pour bann travayer osi ki donn sa servis sa piblik. Ou konpran? Ki li osi i ava kapab, i ava ganny ase letan avek ou koman sa Minis.

*Whoever* ki pour al travay ek zot dan sa *retreat*, ki zot ava ganny en *better knowledge of* kwa ki ou koman sa Minis, sa *PS*, sa Direkter Zeneral, ou pe ekspekte de li koman enn ou travayer.

E demen ou pa ava vin la, oubyen Prezidan pa ava vin la, pour maltret travayer poudir ki zot pe trenn lipye.

So nou tou nou ava kontan pour nou dir *yes!* Nou annan en *very good workforce*, nou annan bann bon tim dan nou landrwa travay. Parey ki

*SLTA* pe ganny felisite. Parey ki *SIA* pe ganny felisite.

Me nou - tou landrwa travay i ava kapab dir nou annan bann bon travayer. E ki nou travayer pe vreman delivre, e ki sa pep la deor i ava kapab koz enn pti pe pli byen, lo Gouvernman ozordi. E ki pa ava dir, zot pe esper 2025, pour tir li! Mersi Mr Speaker.

**(APPLAUSE)**

### **MR SPEAKER**

Mersi Onorab. Mon a donn laparol Onorab Desheila Bastienne.

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour tou koleg Onorab, e bonzour tou dimuon a lekout.

Mr Speaker, Mosyon anmennen par Onorab, John Hoareau i demonstre valer, lapresyasyon anver travayer servis piblik ki pe desarz zot responsabilite byen e an menm tan pe ankouraz lezot osi pour leve e pran zot responsabilite zot osi.

Mr Speaker, kritik par ler i anmenn bokou dekourazman kot nou war bokou travayer i degoute zot sanz travay e menm i fer ki nou perdi bokou nou bann profesyonnel ki deside plito al travay aletranze.

Me i osi bon note ki letan en travayer servis piblik ki demontre son lanmour ek lentere dan son travay i enportan ki piblik osi i rekonnet e montre lapresyasyon anver sa travayer pour ankouraz li reste e kontinyen fer pli byen ankor.

Servis piblik i ganny konsidere koman premye pilye ki gard lekonomi en pei solid e an mouvman a plen tan.

Mr Speaker, tan ki Servis Piblik i mars lo semen progre pei i kontinyen progrese sa i fer ki piblik li menm i santi zot alez pour rantre dan nenport biro pour fer zot tranzaksyon, akoz zot annan sa lasirans ki zot pou ganny en respons pozitiv ler zot sorti e zot problemm i an vin en pti pe pli leze.

Mr Speaker, bon kalite en servis i konmans lo son premye staz e sa se lakey kot *customer service* li menm.

Enn fwa ki ou donn en lakey *chaleureux* letan ou antre dan en biro ou bonzour i ganny reponn, swivi par en pti konversasyon pozitiv en pti fars ou fini santi ki ou tranzaksyon pour deroul byen e i pou fini avek sikse.

Mr Speaker, bi sa Mosyon, se en fason etablir e ankouraz bon konportman demontre vre pasyon e profesyonnalizm dan travay.

Dan nenport ki fason ki nou pe donn servis en kliyan, swa an personn ou partaz lenformasyon atraver en *email*, ouswa atraver en kout telefonn lespas letan ki pran pour reponn e i pli enportan se larepons ki sa kliyan pe espere i demontre vre lefikasite sa travayer ki i a pe fer son komunikasyon avek.

Mr Speaker, i vre ki bokou fe ki lo ter Mosyon in prezante dan son deliberasyon ki arive e pe kontinyen arive dan serten landrwa travay. Letan ou rantre dan en biro par egzanp de travayer pa ni menm realize ki en kliyan in rantre telman zot pe rakont zot levensman ki zot in pase, zot pe riye, pour ou ganny zot latansyon ou pou bezwen dir bonzour de fwa.

Dan en fason amikal, pour nou kapab konmans en bon konversasyon, nou menm pran lo nou menm e demann li konman sava me i pre pour li pa menm reponn. Son *mobile* i sonnen i tanpi si ou pe debout la devan li, i pran i avans akote i koze.

Mr Speaker, me de lot kote mon fyer pour dir ki annan bokou endividé ki son kliyan i vreman enportan pour li, i fer tou pour met son kliyan alez.

Lafason ki zot deservi zot kliyan i donn nou sa mesaz pour ankouraz lezot dimoun la

deor pour vin akse zot servis e la ozordi mon pour profite mon pour felisit sa tim dantis ek ners kot Twa Zonn ki zot pe war zot pasyan a parti 6 er 45 bomaten ziska 6 er diswar.

Ozordi napa laliny ek pasyan pe debout pe esper servis dantis kot Twa Zonn fason travay in sanze pou de bon e mon pou felisit Minis Vidot, Minis Peggy Vidot avek son tim profesyonnel ; mon pou felisit bann dantis spesyalis ek zot ners kot Twa Zonn pour sa bon travay ki zot pe *provide* piblik la deor.

Mr Speaker, Mosyon an premye pe felisit bann travayer servis piblik pe travay byen e konsyaman pou benefis nou pei me i pe osi demann avek lezot pour travay e azir dan en fason profesyonnel a tou moman e donn zot kliyan meyer servis posib, avek bi pour retir fristrasyon e a ed nou pei avans devan.

Mr Speaker, retir fristrasyon dan servis piblik se priyорite limero 1. Reponn en senp mesaz, reponn en *email* e donn en solisyon se sa ki lepep la deor i anvi pour anmenn soulazman dan zot lavi toulezour.

Letan nou dir avek en dimoun, ki nou pour donn li en repons dan 2 zour, annou gard nou parol e reponn li dan 2 zour.

En apwentman dokter ki form par lavi e lasante e dimoun i sipoze ganny pran avek bokou lenportans e sa i ede redwir presyon lo sa pasyan osi byen ki son fanmir.

Akoz letan en pasyan pe soufer son fanmir i soufer avek li e la bokou fristrasyon i leve, tou sort deba i ganny fer e dimoun inosan i ganny akize.

E la mon pour dir ki ler keksoz i al mal dan nenport Minister ou okenn servis piblik tou dimoun i konnen ki arive, tou blanm i tonm lo ledo Gouvernman ; se Gouvernman ki pe mal travay se Gouvernman ki pe met retar ki pa pe ekout son pep, ki pa konn douler son pep.

Mr Speaker, fot en endividé dan en biro i vin problem Gouvernman ozordi.

Mr Speaker, i enportan ki nou tou nou zwe nou rol byen avek bon lentansyon, pour nou fer nou pei marse e pour fer ki nou re etablir plis konfyans dan nou pep e ki nou kontribisyon dan lekonomi nou pei i a vin nou rekompans pour demen.

Se ler nou travay avek lanmour, nou travay pour fer sa Minister ouswa sa departman kontinyen monte, nou pa trenn li ater, se la kot nou rekompans i vini kot nou pour annan dwa koz plis larzan dan pos.

Mr Speaker, ozordi dan tou konversasyon ki ou fer avek en dimoun, fodre ou tann sa konplent,

“Mon pe espere”,

“Mon ankor pe espere menm.”

“Sa biro pa ankor apel mon pou mon siny mon dokiman kestyon lo kestyon.”

“Akoz en aplikasyon i pran bokou letan?”

“Mon le konmans pey mon kontribisyon pour mwan ganny mon lakaz in ariv 3 mwan e mon ankor pe sey esper mon dokiman pour mwan kapab anmenn dan mon landrwa travay. Ki pe arive dan sa bann biro?”

Mr Speaker, me i enportan osi ki nou demande be lekel ki annan sa dokiman dan son lanmen? Minis? Sa dokiman i dan biro Minis? I dan tirwar Prezidan li, oubyen i dan lanmen en endividé dan sa biro?

I bon osi ou al rode be lekel li sa travayer? Lekel li sa endividé ki pe fer sa? Lekel li ki pe met fristrasyon dan dimoun? Lekel sa ser? Sa frer la? Sa kouzin ki vre pe met dezord li. In vin ek son bi pour li vin met dezord li pour li vin trenn lipye pour li kre fristrasyon apre tou i tonm lo ledo Minis, tou i tonm lo ledo Gouvernman.

Annou get byen e annou al get byen lekel zot ki pe fer sa dan sa bann biro. I enportan nou konnen Mr Speaker, avan nou kraze.

Mr Speaker, Mosyon anmennen par Onorab, John Hoareau i annan en balans, kot nou pe donn nou sipor kontinyel nou travayer servis piblik ki pe kontinyelman desarz zot responsabilite tre byen avek respe e osi avek sazes e nou osi pe ankouraz e demann lezot travayer pour swiv menm patern kit nou problem personnel, ek nou fristrasyon, ek nou kouler politik, ek nou larelizyon dan lakour e annou vin travay pour sa saler ki nou pe gannyen.

Mr Speaker, ozordi lo mon kote mon pou dir en gro mersi bann serten departman servis piblik, bann Minister ki'n azir avek responsabilite e ki mon tre byen apresye tel ki ;- Departman Lanvironnman ki'n reponn a mon lapel pou etablir lord kot en endividé ti a pe fer en tranzaksyon san permision dan distrik Perseverans e sa ti ganny met anba kontrol dan lespas 4 zour.

Mersi pour lapolis Perseverans zot osi zot dan sekter piblik S.I. Camille, ki ti fer en travay eksepsyonnal kot dimoun ti ape antre pe vin zis zet salte dan Perseverans ti pe

servi en landrwa konman *dumpsite* pourtan mon pa ti dan pei mon ti fer en komunikasyon atraver WhatsApp e avek sipor LWMA sa travay ti ganny fer dan lespas 24 er.

Mersi bann kontrakter avek PMC ki pe tap tou menm *weekend* pou zot fini sa 24-unit, travay sekter piblik. Tousala pour siport bann fanmir ki pe esper en lakaz apre sitan lontan. Lo lalis espere e osi bann ki pe rekouver sa bann lakaz *prefab* kot bokou fanmir ti a pe sibir lakaz koule pandan letan lapli.

Malgre in annan bokou mekontantman ek bokou konplent tapaz, me ozordi nou pou dir mersi nou annan dimoun ki ankor pe travay pou lentere lepep ki dan bezwen.

Mersi pou zot travay e devouman sa i montre vre lanmour e devosyon dan zot travay anver piblik e la mon ti ava apresye war sa travay lo sa gro problem *streetlights* demare dan lentere nou zabitan.

Mr Speaker, an terminnan mon anvi lans en lapel pou tou bann travayer dan servis piblik ki ti dakor e menm aksepte pour zot pran ouswa kontinyen pou servi piblik ki dan travay ozordi ki ti dakor e menm kontinyen pour zot reste pou servi piblik, ki dan travay ozordi nou napa

plas pou trenn lipye e kre retar; napa plas pou zwe avek piblik e kre fristrasyon e kontinyen anvoy nou bann piblik demen tanto.

La nou pe travay e la nou pou travay e anmenn satisfaksyon pou nou pep e fer nou pei bouz devan. Set avek sa de mo Mr Speaker, ki mon pou donn mon sipor sa Mosyon e ki mon pou dir avek Onorab, John Hoareau kont lo mwan. Mersi.

### **MR SPEAKER**

Mersi Onorab, prezan mon a donn laparol Onorab Rachel Spiro.

### **HON RACHEL SPIRO**

Mersi Mr Speaker. Bonzour Mr Speaker. Bonzour tou koleg Onorab, e bonzour tou dimoun ki a le kout.

Mr Speaker, mon lentervansyon pa pou long, me mon swete ki lesansyel i ganny fer. Travayer Sesel ki swa dan prive ouswa dan Servis Piblik se zot ki ede fer marse lekonomi pei.

Zot fer sa travay ki zot in swazir pou fer ;-

- 1) pou ganny satisfaksyon personnel e ganny en reveni,
- 2) pou sonny zot fanmir e
- 3) pou ede fer marse sa lekonomi dan nou pei ki nou pe koz lo la.

En travayer si i ganny satisfaksyon dan son travay i pou reste dan sa travay e fer en karyer ladan. Napa en travay ki pli enportan oubyen pli enferyer ki en lot malgre serten fwa nou'n tann bann *leaders* dir oubyen abes bann travayer Seselwa an dizan ki zot travay napa valer.

I annan travayer parey bann *nurse*, bann polisye, bann ansenyan in travay pou en kantite lannen dan servis piblik e malgre plizyer defi zot pa dekouraze e zot kontinyen fer zot travay avek devosyon, lanmour, konpasyon e byensir disiplin.

Bann ansenyan zot, zot sa group travayer dan pei, ki moul tou lezot metye. Se zot ki form labaz pou bann travayer dan lezot sekter ki nou pe koz lo la ki swa dan prive dan servis piblik e osi lezot.

Alor mon rekonnet e salye tou travayer servis piblik ki pe fer zot travay avek devosyon e lanmour e dan en fason nob. Zot travay konsyansyezman e donn en servis zot kliyan ki alaoter e ki pare pou fer en pe an plis pou satisfer sa kliyan.

Mon rekonnet e apresye sa travayer ki sakrifye detrwa minit dan son letan *break*, pou asire ki i satisfer en kliyan ki'n vini e ki li i ti pe pran son pti repo me i kite pou li *attend* sa kliyan.

Pou sa enn ki pare pou donn enn 2erdan an plis kan i neseser, i osi nou rekonnet son valer e travay ki i pe fer. Travayer servis piblik serten fwa pa pe ganny valorize ase e i malere ki Gouvernman in war li pa ase enportan pou kontinyen rekonpans sa bann travayer ki'n travay avek lwayote pandan plis ki 10 an e plis. La mon pe koz lo sa *long service allowance* ki ozordi in ganny koupe. Sa i fermal pou sa bann dimoun ki zot, zot kontinyelman reste la e donn sa servis sa kliyantel.

Nou montre ki nou pa pe apresye sa bann travayer e sa long letan ki zot donne dan sa travay ki zot pe fer. Osi i annan sa 13 mwan saler ki lot kote latab ti lager lebra kase pou ensiste ek Gouvernman US sa letan ki zot bezwen donn tou travayer 13 mwan saler.

Ozordi zot pe koz *performance allowance* zot pe koz lo montre ki ou bezwen kapab fer sa travay e *appraise* ou. Zot pe koz lo *RBM* ozordi e zot blyie sa ki zot ti'n dir avan sa.

Mon salye bann travayer servis piblik ki menm si zot kontinyen ganny viktimize zot leve toulezour e kontinyelman priye ki en zour sa viktimizasyon ki zot pe pas atraver i ava arete e son siperyer i a realize ki li osi i en mayon dan sa lasenn ki fer sa

departman e sa Minister marse.

Mr Speaker, kantite fwa nou pe blanm sa bann dimoun ki'n travay dan en Minister pou 43 an ou plis me selman zot in donn en servis alaoter e ozordi zot pe ganny viktimize.

E ou a krwar kantmenm nou dir Sesel pou tou son zanfan, ou a krwar nenport ki moman sa bann dimoun i riske ganny met deor. Akoz nou santi ki sa bann dimoun lo lot kote latab zot krwar se sa bann dimoun ki pe trenn lipye.

Me non nou konnen sa bann dimoun i travay e zot travay pou delivre pour zot kliyan ki vin devan zot e zot in fer sa pandan tou sa letan.

Mr Speaker, lo term Mosyon in selman adres travayer e pe demann zot pou kontinyelman travay konsyansyezman napa travayer ki konsyaman leve bomaten e al travay zis pou li pa prodiktiv. Sa i pa egziste.

Si sa pe arive i bezwen annan lezot faktor ki pe dekouraz sa travayer e alors lo ter Mosyon pa pe pran kont ki dan en kontra travay i annan 2 parti sa anplwayer e sa anplwaye.

I plito refer lo anployer me mwan, mon pou ensiste ki ler nou reflekte lo lafason ki anplwaye pe delivre dan servis piblik, i osi enportan ki anplwayer i osi rekonné

sakrifis sa travayer e montre li ki i ganny apresye par met an plis serten *incentive* pou son travay.

Asire ki sa landrwa travay ki i enn ki donn sa anplwayer sa satisfaksyon dan sa travay; kre lespas pou sa travayer santi li ki son anplwayer pe ekout li avek konpasyon e konprenezon pour li kapab kontinyen e ankouraz li pou li donn plis.

Travayer dan sekter piblik bezwen rekonné ki menm si i annan *management* travay dan sa sekter i annan pou fer avek travay an tim ; aksepte kan enn i fer mal e rekonné ki si ou mal ou pa kapab met blanm lo en lot akoz ou, ou dan *Management*.

I enportan ki travayer i aprann solider avek kanmarad pret en zorey sa koleg travayer, akoz i kapab dan en difikilte. Se atraver solidarite, limite ki ansanm zot a kapab kontinyen annan kouraz, lafors, lwayote, devosyon pou zot kontinyen donn en bon servis zot kliyan e asire ki lekonomi pei i mont lo en pli o nivo.

Mr Speaker, kliyan depillanpli i vin pli egzisan e demann bokou lo bann travayer servis piblik pou delivre servis lo en pli o standar. Donn en servis ki ou, ou ti a eksepte gannyen an retour.

E pou sa bann ki zanmen in deza travay dan servis piblik e ki ozordi zis zot pas zot letan blanmen ler zot pe ganny demande pou delivre, mon ti a krwar ki ler ou'n ganny elekte ou ti krwar i pour en *easy ride* Saint Louis, me *tough luck* ou pou bezwen travay e konnen ki i riske ou dernyen manda sa, en?

**(APPLAUSE)**

### **HON RACHEL SPIRO**

Mon swete ki dan lespri linyon i fer lafors, bann travayer servis piblik i a kapab fer Sesel fyier e ganny apresye pou kalite servis ki zot donnen e pe donn zot kliyantel e osi sa pei ki nou dir Sesel. Mersi Mr Speaker.

**(APPLAUSE)**

### **MR SPEAKER**

Mersi Onorab. Mon a donn la parol Onorab Sandy Arissol.

### **HON SANDY ARISSOL**

Mersi Mr Speaker. Bonn apre midi Mr Speaker. Bonn apre midi tou dimoun ki ale kout espesyalman nou bann travayer Servis Piblik.

Mr Speaker, Mosyon Onorab, John Hoareau i lir Lasanble Nasyonal i felisit tou travayer Servis Piblik ki pe fer zot travay byen e konsyansyezman pou benefis nou pei.

Alor mwan konman en dimoun ki pe koz lo sa Mosyon, mon ti a kontan profite letan mon konmanse menm pou mwan felisit tou travayer servis piblik ki pe fer zot travay byen, konsyansyezman e pou benefis nou pei. Alor mon profite pou dir zot mersi pour sa bon servis e mon felisit zot parey Mosyon pe demande.

Me letan nou lo Mosyon travayer servis piblik, kestyon ki nou devret pe demande lekel bann dimoun ki travay dan servis piblik? Se bann Seselwa? Bann dimonn ki nob? Bann dimoun ki onnet? Bann dimoun ki serye? Bann dimoun ki leve tou le bomaten i annan pou plis ki i annan pou plis ki 30 an e i desann e i al rann sa servis lezot dimoun.

Bann travayer servis piblik mazorite souvan fwa letan mon get Bel Ombre dan mon distrik, se bann dimoun ki bann debouryer, bann travayer me i pa neseserman i annan en transpor.

I sa Seselwa ki leve granmaten pour li esper sa premye bis pour li arriv travay boner. I sa Seselwa mazorite letan ki lo *bus stop* lapli, loraz, zekler, savat dan son lipye e son soulye dan son lanmen pour li al met dan son landrwa travay. Parske i santi poudir i

pe rann servis nou pei e pe rann servis lakominote.

E pou sa mwan, mon fyer Mr Speaker, parske letan mon'n al dan distrik Bel Ombre, Bel Ombre i enn sa distrik kot i annan en pe sa group travayer Seselwa parey mon'n dir, ki'n donn tou zot letan, tou zot lenerzi pour plizyer lannen, pour zot fer en travay nob pour nou pei.

Me, mon osi bezwen konsyan Mr Speaker, poudir letan nou pe koz lo zot, i annan zot ki zot in la pour plizyer lannen.

Alor i pou enportan ki letan nou pe koz lo sa Mosyon, pou mwan osi demann bann zenn ki pe ekoute, pour nou ankouraz zot pou zot rantre dan en lanplwa pour ki nou bann travayer servis piblik ki'n la pour plizyer lannen, zot osi zot a kapab ganny ranplase par bann zenn Seselwa serye ; pour ki zot osi kot kapab pran zot retret byen.

E pou zot rezouir manz zot larzan parey nou dir e osi okip zot pti zanfan avek zot lakour.

Mr Speaker, mon'n konmans koumsa, parske mwan koman en *MNA* Elekte mon santi mwan koman en travayer servis piblik parske mwan osi toulezour dan mon karyer politik mon zwenn piblik,

Toulezour dan mon karyer politik mon fer sir mon asiste piblik e se pou sa rezon Bel Ombre mon'n fer li en mantalite ki letan dimoun i *call* mwan i demann mwan en lapwentman mon dir ek li non mon pa donnen apwentman, be mon vin kot ou, mon vin *visit* ou zour ki ou la, ler ki ou kapab e kot nou kapab asize dan sa lakour pour nou fer sa diskisyon.

Parske mon santi mon bezwen rann sa servis mwan osi konman sa travayer Servis Piblik Mr Speaker.

Bel Ombre an relasyon avek travay ki Mosyon pe demande - sa premye bout Mosyon ki Onorab, John Hoareau in demande konsyansyezman pou benefis nou pei. mon bezwen montre lapresyasyon.

Mon montre lapresyasyon Mr Speaker, parske le 25 Avril *MNA*, DA, Lotorite Distrik nou ti ganny sans avek lezot lazans *PMC*, lapolis, sanniter, travayer sosyal ek lezot pour nou kapab *visit* flat *Corsaire* a parti 5 er diswar ziska 8 er diswar.

Nou ti vizit flat *Corsaire* e vizit tou bann flat *Kashoggi estate*, kot nou ti *visit* tou bann dimoun, get zot problem an relasyon avek konportman lo nivo bann *housing estate*, bann problem sosyal ki zot annan,

problem ki zot annan avek zot flat e pour sa mon bezwen montre lapresyasyon pou sa group dimoun ki ti akonpanny nou dan sa *visit*. Sa sete bann travayer servis piblik.

E pou sa ankor enn fwa mon dir ek zot mersi pou sa travay e sa kontribisyon ki zot pe fer pou distrik Bel Ombre.

Dezyenm legzanp Zedi le 9 May MNA avek DA Bel Ombre, nou ti ganny sans avek 2 travayer *Land Transport* apartir 7er diswar, pour nou *visit* Bel Ombre an antye, antre dan tou semen segonder pou nou rode kote bann glob in brile, kote nou kapab met bann nouvo poto, kote nou kapab azout nouvo lalimyer, pour nou bann zabitan viv an sekirite e donn zot sa servis pli pre avek zot.

E ankor enn fwa, nou ti ganny sa korperasyon bann zofisyen *Land Transport* e pou sa Mr Speaker, parey Mosyon pe demann mwan, mon bezwen felisit bann travayer servis piblik spesifikman *Land Transport* ki'n ed nou fer sa travay lo nivo distrik. Alor nou bezwen montre lapresyasyon.

I annan en kantite amelyorasyon ozordi konpare avek letan mon ti MNA dan lopozisyon avek letan ozordi mon vvar mon MNA dan Gouvernman Mr Speaker. I annan sa diferans e pou sa mon bezwen apresye e

rekonnet travay ki bann travayer dan Servis Piblik pe fer.

Trwazyenm legzanp mon ti a kontan partaze ; le 7 desanm distrik Bel Ombre, Beau Vallon, Glacis nou ti ganny en kalamite, lapli, linondasyon e nou ti annan dimoun ki ti mor lo nou rezyon Mr Speaker.

E mon bezwen apresye rekonnet travay ki *Local Government* ti fer, lapolis in fer, SFRSA in fer, *Land Transport* in fer ek tou lezot lasans ki lalis i long parske zot in akonpanny nou dan sa parkour kot Bel Ombre nou ti vvar nou dan difikilte. E nou bezwen dir zot mersi pou sa.

Parske zot bann travayer servis piblik ki'n deservi nou distrik zot in anmenn zot soutyen e zot in donn nou sipor kot i neseser.

E pou sa Mr Speaker parey Mosyon pe demande, mon bezwen dir zot mersi e ti annan en travay kolaborasyon dan nor.

Nou baz ti ganny baze dan sant DA's Office Beau Vallon, kot tou bann distrik rezyon nor nou ti baze la avek led bann DAs - menm bann DA ki zot distrik pa ti'n ganny afekte zot ti la avek nou enkli bann MNAs ki zot distrik pa ti ganny afekte zot ti vin donn nou sipor, lo sa travay ki

distrik nor spesifikman Bel Ombre nou ti bezwen fer.

Ozordi letan nou pe koze, mazorite nou ban dimoun in ganny ede an sa ki konsern sa led finansman ki zot sipoze gannyen. E par kont me i annan bann lezot dimoun ki zot lakaz in *partially* ganny andomaze, ki in annan en travay ki pe ganny fer avek SIA pou ki zot osi zot a kapab retourn dan en lavi normal parey bann lezot dimoun Mr Speaker.

Mon krwar i enportan mon'n konmans koumsa, parske mon krwar i enportan letan i annan bann defi tou dilon. Me i osi annan bann *success stories* dan nou pei e Bel Ombre i enn nou bann distrik ozordi ki nou, nou reste pozitiv.

Nou reste lo en note pozitiv e nou pe swiv tou sa ki pe arive e nou, nou fer sir nou angaze avek servis piblik. Letan nou koz servis piblik i enportan pou nou konnen lekel sa dimoun ki nou koz avek lo sa lot laliny telefonn.

I enportan pou nou konnen lekel sa zofisyé ki ansarz tou bann dimoun ki'n fer aplikasyon lakaz dan nou distrik. I enportan pou nou konnen lekel sa *regional commander* ki baze Beau Vallon, be selman ki fer travay dan distrik Bel Ombre.

I enportan pou nou konnen lekel bann Direkter Zeneral ki travay dan bann Minister, parske letan nou annan bann komunikasyon ki nou kapab fer pou nou kapab fer.

Mr Speaker, mon dir sa parske souvandfwa sa enn ki devret ganny blanmen i pa ganny blanmen li, me nou blanm tou dimoun e nou met tou dimoun dan en sel pannyen.

Me i enportan pou nou konnen si ou papye in pri kote ou papye in pri? Letan ou telefonnen lekel ki pa reponn ou telefonn? Letan ou'n tir disan Minister Lasante, eski Minis, ki ti asize obor ou pe tir ou disan?

Eski Minis, ki sipoze donn ou rezulta? Mon krwar sa ozordi nou'n ariv 2024 i enportan pou nou tou pran nou responsabilite an sa ki konsern nou aksyon Mr Speaker

**(APPLAUSE)**

### **HON SANDY ARISSOL**

Fodore pa nou vini nou blanm tou dimoun. E pa blyie bann dimoun ki travay dan sekter piblik zot osi ariv en moman letan parey nou dan lasanble kot nou pran sa ki apel *lunch time*.

E si mon pa tronpe Minister lasante kot ou pran

non la twa zonn i annan mil an pase 12-1er zot fermen, parske mon mazinen bann dimoun ki travay la zot sak pa kapab reste vid. Zot osi ennler zot sorti zot al rod en pti goute, en keksoz pou zot ganny lenerzi apre 1er pou zot kontinyen avek sa gran laliny ziska 4 er oubyen 5 er Mr Speaker.

E la mon anvi dir avek tou Seselwa, letan ou pran telefonn ou telefonn en Minister entrodwi ou lekor. Bonzour isi Msye Arissol ki pe koze, eski mon kapab konnen eki mon pe koze silvouple?

Pour ki demen ler u annan en problem ou kapab dir be laba kot sa Minister mon ti koz avek en Msye ki apel Gervais Henrie. Ou pa kapab blanm tou dimoun kot sa Minister akoz ou, ou pa'n konnen eki ou pe koze.

Ler ou al anmenn ou let kot en Minister ou met dan lanmen en dimoun be demann li sa madanm oubyen sa msye mon a ganny ou non silvouple? Koumsa demen ler u let pan ariv kot sa Minis, kot sa PS, kot sa MNA ou a kapab dir be msye John Hoareau ki mon ti met mon let dan son lanmen i bezwen li ki'n manz mon let, koumsa ou pa pou kapab pran en mayos e konmans mayos sekirite depi lo peron ziska dan biro Minis...

*(laughter)*

### **HON SANDY ARISSOL**

Me nou tou nou bezwen pran nou responsabilite dan sa pei an sa ki konsern servis ki nou, nou pe rode Mr Speaker, e sa mon krwar i en keksoz enportan ki bann Seselwa nou bezwen apresye e rekonné.

Letan mon pe koz lo distrik Bel Ombre mon krwar i annan en kantite keksoz ki'n arive parske nou tandem souvannfwa kwa ki nou ti pou fer pli byen, akoz nou pe konplent poudir napa naryen ki'n arive.

Mr Speaker, avek gran lafyerte mon ti a kontan partaz serten keksoz ki'n arive dan mon distrik pandan sa peryod 3an. Pa blyie nou ti ganny dir poudir si zanmen LDS i vin o pouvwar soley pa pou tape, tou proze distrik pa pou ganny fer, nou bann trwazyenm az pa pou ganny zot sekirite sosyal, bann lasistans pou koupe, bann zenn pou nepli ganny anvoye aletranze pour zot kontiny zot letid e nou pou tourn dan en nespes Libya oubyen an *Iran* oubyen an *Iraq*.

Me ozordi dan nou pei i annan plizyer Seselwa ki pe travay dan sekter publik e i annan plizyer nou la anndan dan Lasamble Nasyonal ki nou mari, swa nou fanm, swa nou zanfan, swa en zanmi, swa en

manm fanmir i travay dan Minister dan kek Minister dan servis piblik e nou bezwen apresye sa Mr Speaker,

Gran laliny, pti laliny, mwayen laliny pa fek arive an 2020. *File perdi, file* anba latab, *file* pa sorti pa fek arive an 2020.

Me par kont sa ki nou Gouvernman in fer, in fer sir in kit tou sa ki ti dan sa bann pozisyon menm pozisyon. Tou bann ki pa ti anvi travay zot in dir mersi zot in ale apre zot in dir viktimizasyon zot in ganny pouse.

Me tou bann ki ti pe mazin pwazon zot in ale parske nou pa kapab an pwazonn personn zot in al lo zot e nou lavi i kontinyen, Minister i kontinyen bouze e tou Seselwa i kontinyen fer sa travay ki Mosyon Onorab, John Hoareau pe demande.

Ki mon pe dir par bann *achievement* bann pozitivite dan distrik Bel Ombre? Par egzanp mon bezwen ozordi felisit Minister *Local Government*. Parske parey mon'n dir nou dezas le 7 Desanm nou ti ganny en kantite sipor avek zot.

E ozordi ler nou pe koze *Local Government* sel distrik dan Sesel ki pou annan en nouvo sant en nouvo DA's Office ground plus one I zis distrik Bel Ombre - napa okenn distrik ankor ki annan

oubyen ki pou gannyen. Mon bezwen dir mersi *Local Government* Mr Speaker.

Letan nou pe koz lakaz mon bezwen felisit Minis Rangasamy avek Minister Lakaz ou konnen akoz? Parske le 11 Zen sa lannen, nou pou al donn en trwazyenm proze lakaz dan distrik Bel Ombre. I pour apel vilaz prosperite deryer *Shell Beau Vallon* ki tonm dan distrik Bel Ombre ki baliz avek lekol segonder.

I pou fer nou, nou trwazyenm proze lakaz Mr Speaker dan en peryod 3 an pe al lo 4 an. Sa i pou fer nou 40 lakaz. E an mwayenn dan lakaz i annan en papa, en manman de zanfan i pou fer nou 40x4 ki pou fer nou 160 zabitant Bel Ombre, ki pou ganny asiste sa lannen avek lakaz.

E mon bezwen dir mersi bann travayer *PMC, HFC*, Minister Lakaz e *SIA* pou sa zoli proze ki zot pe donn zabitant Bel Ombre. E mon bezwen osi dir mersi nou bann zabitant ki'n serye, ki'n responsab, ki'n fer zot kontribisyon e ki'n espere pandan plizyer letan. Sa i bann pozitivite ki annan dan nou distrik Mr Speaker.

Letan i annan en madanm ki letan mon'n vin Bel Ombre son lakaz ros ti'n roul lo la apre en dezas, i ti ganny mete Barbarons preski

6 an e ler nou'n vini atraver SIA son lakaz in fini ganny fer e la sa lannen i pou fer Nwel dan son lakaz.

Mon bezwen dir SIA mersi sa i bann lakonplisman ki annan dan distrik Bel Ombre an relasyon avek lakaz.

Letan nou e koze la i annan en fanmir ki nou'n fini met tou son bann dokiman annord, *tender* in fini konmanse pour ki en bann zanfan zot in asosye ansanm, pou zot fer sa ki nou apel en *family house* lo zot propriyete avek led Gouvernman avek led SIA.

Mr Speaker, plizyer keksoz pozitiv i ganny fer atraver bann Minister, atraver bann travayer Servis Piblik ki Onorab, John Hoareau pe demande dan son Mosyon. Se pou sa rezon mwan, mon fer li mon devwar koman MNA Elekte pou distrik Bel Ombre tou le lafendiwan mon al kot lapos mon met mon laliny parey tou dimoun, mon al pey mon bil lo kontwar avek sa bann madanm ki la.

Parske parfwa kontak direk avek bann travayer Servis Piblik i enportan. Se pour sa rezon mon fer li mon devwar dan Dimans, dan Sanmdi spesifikman koman en kretyen, mon al lanmes, parske laba dan lanmes apre servis ou ganny sans zwenn bann travayer servis piblik ki

ou pa zwenn li pandan lasemann, pour donn li en ponnyendmen, gete ki mannyer in pas son lazournen pou li akont ou en pti konsern.

Se pour sa rezon mon fer li mon devwar konman MNA Elekte pour mon *visit* Lopital Victoria ozordi ki apel Lopital Sesel, pou mwan *visit* mon bann zabitan ki'n vwar li dan en pwen rezon lasante i lopital.

Ou ganny sans *visit* li, *visit* plizyer lezot pasyan e ou ganny sans enterakte avek bann dokter, bann nurse, bann *cleaners*, bann travayer Minister Lasante ki la pour ou gete swa son pwennvi, kwa ki ou kapab amelyore, kwa ki ou kapab ed li dan sa travay ki nou pe fer.

E mon krwar Mr Speaker, sa i en keksoz ki mars byen lo kote Bel Ombre. Bel Ombre nou en distrik ki positive. I annan en kantite keksoz ki pozitiv ki pe arive dan nou distrik e mon krwar sa pozitivite i bezwen dekoul dan Mosyon ki Onorab, John Hoareau in dir.

Me letan mon ava pe terminen, dezyenm bout Mosyon Onorab, John Hoareau se

“E demann avek lezot pou travay e pour azir dan en fason profesyonnel, a tou moman e donn zot kliyan meyer servis posib avek bi pou

retir fristrasyon e ed nou pei avan devan”.

Mr Speaker, ou konnen, travay avek piblik i pa en keksoz fasil ozordi si ou demann en zofisyen lapolis si travay avek piblik si i fasil i pou dir ek ou non, parske parfwa i ganny zoure, i ganny menase.

Ozordi bann ansennyan si ou kestyonn zot, ou koz ek zot, eski i fasil pou travay avek bann etidyan Seselwa? i pou dir ek ou pa neseserman 100 poursan korek. Non.

Ler ou koz avek en ners ki travay *casualty*, si ou demann li travay avek piblik ki mannyer i ete? Ki mannyer i vwar? i pa pou dir ek ou 100 poursan korek, parske sa travay ki I fer dan Sanmdi swar en dimoun pour vin vomi lo li, enn pou vin met disan lo li, enn ki'n lager pou bezwen rapport *Casualty*.

Savedir travay avek piblik i pa neseserman en keksoz ki fasil, en keksoz ki nou tou nou kontan fer, me par kont nou annan en pti group, en pti group dimoun ki kontinyen kit *file* lo son latab, ki kontinyen pa reponn ou telefon, ki kontinyen pa koz ek ou oubyen ki kontinyen inyor sa servis.

Alor atraver Mosyon Onorab, John Hoareau, mwan, mon anvi apre midi la lans en lapel avek tou bann

travayer servis piblik ki'n kontan pour li reste dan sa travay menm anba en nouveau ladministrasyon, pour zot fer louvraz nob, fer en louvraz serye e kontinyen deservi tou dimoun.

Parey mwan konman en MNA Elekte Bel Ombre Mr Speaker, letan ti annan dezas dan mon distrik. Mon ti al *visit* tou dimoun san eksepsyon, san rode ki son kouler politik, si i ti vot pou mwan dan dernyen eleksyon, si i annan en paviyon kot son lakaz mon ti rann zot tou sa servis ki zot ti bezwen konman MNA Elekte.

Alor pour sa mon ti a kontan dir avek tou bann travayer servis piblik ki pe ekout nou apre midi, ki pe fer en travay nob pour kontinyen dan sa profesyon pour kontinyen fer sa travay, pa pou benefis MNA, pa pou benefis Prezidan, pa pou benefis Minis, me pou benefis nou pei parey Mosyon pe demande.

Dezyenmman, mon ti a kontan lans en lapel serye ankor, pou tou sa pti group, sa pti group ki pe trenn lipye parey nou'n ganny dir ki pe fer serten keksoz ki pa bon, pour *beef up* mazin pozitiv.

Pa mazin Gouvernman, pa mazin sa koleg be mazin ou pei an relasyon avek servis ki

nou kapab ofer pou nou pei pour ki nou pei i al de lavan.

Mr Speaker, mon krwar Onorab, John Hoareau in anmenn en bon Mosyon e mon krwar i en Mosyon ki fer sans ozordi kot nou'n arive, pou nou kapab siport nou servis piblik, pou nou donn zot sa lankourazman, ekout zot, visit zot e rode kwa ki nou kapab travay ansanm pou benefis nou pei parey Mosyon pe demande.

Mon krwar nou'n arriv en bon ler Mr Speaker. Mon ava aret la pou le moman e mwan ava dir Onorab, John Hoareau poudir i pou ganny mon *full* sipor an relasyon avek son Mosyon. Mersi bokou.

**(APPLAUSE)**

### **MR SPEAKER**

Mersi Onorab, Sandy Arissol. Wi, ou *timing* i bon, nou a pran poz la. Mon *remind* manm *Assembly Business Committee* pour pa an retar silvouple. Nou a zwenn pour nou kapab repren travay 2 er dan Lasamble. Mersi nou a pran poz, nou a repren 2 er apre midi.

**(BREAK)**

### **MR SPEAKER**

Bonn apre midi tou dimoun nou repren. Nou leskiz pour en ti pe an retar, rezon se ki

nou *Assembly Business Committee* in en ti pe prolonze avek bann size ki nou ti bezwen diskite e se pour sa, sa retar. Zot a dakor pou dir fer en *meeting* e osi ganny en ti pe letan pour dezennen dan lespas 1edtan 30 i en pe sere.

Bon, nou a repren e mon donn laparol Onorab, Gervais Henrie. Enn enstan Onorab, eskize Madanm Clerk in fer mon remarke ki nou annan en *Revised Order Paper* ki annan en *First Reading Public Bill* lo la. Donk nou a fer sa. Madanm Clerk?

### **MADAM CLERK**

Mersi Mr Speaker. Nou pe fer *First Reading* pour *Tobacco Control (Amendment) Bill, 2024*.

*This Act may be cited as the Tobacco Control (Amendment) Act 2024.*

Mersi Mr Speaker.

### **MR SPEAKER**

Mersi. Bill in lo *Order Paper pour First Reading*.

Onorab, Henrie ou lantervansyon.

### **HON GERVAIS HENRIE**

Mersi Mr Speaker. Bonn apre midi tou dimoun e sirtou bann *public servant* ki kekfwa i kapab pe ekout nou deba ozordi.

E an menm tan mon ava profite pour swet tou bann fanmir dan Mont Buxton en

*Happy International Family Day* e felisit bann ki pe pran swen ek zot fanmir e priye e ankouraz bann fanmir ki annan bann tirayman ki keksoz pa pe marse, ki zot kapab vin ansanm akoz fanmir i keksoz pli enportan ki nou kapab annan dan lavi.

Mr Speaker, mon pran laparol ozordi konman Manm Elekte pou distrik Mont Buxton en pti distrik dan milye Mahe, ki napa otan bann servis Gouvernman etablir dan sa distrik parey lezot.

Nou napa lekol, nou napa klinik, kordgard, simityer, lakres, eksetera. Alor nou relasyon avek bann antite servis piblik i limite konpare avek lezot.

Me kantmenm sa nou annan bann relasyon travay tre pre avek bann MDAs parey SLTA, Lenfraztriktir, PUC, Later ek Lakaz, *Public Health Authority*, Lanvironnman, LWMA pou nonm enn de.

E a sa pwen mon remersi tou bann zofisyel servis piblik ki aport en sipor soutyen e servis nou distrik dan fason ki zot kapab e konman MNA mon toulstan fer sir ki mon annan en relasyon pre avek bann zofisyel, ki travay lo teren koumsa mon *call* zot direkteman si i annan en sityasyon nou adres kanmarad par non, e mon *ok*

avek sa. Koumsa nou kapab fer keksoz mars byen e kapab annan en lantant ant mwan avek zot.

E akoz mon relasyon i koumsa avek bann zofisyel servis piblik? Akoz mon realize ki sa bann endividé i nou pe koz lo la ozordi i bann vivan, imen parey nou tou, zot bann Seselwa e bann zanfan Bondye.

Alor nou bezwen apresye bann byen fer ki zot pe fer, nou bezwen pare pou travay avek zot pou anbelir kot i merit annan amelyorasyon.

Nou merit aplodi zot e konsey zot kan nou santi poudir i mank keksoz e nou kapab fer sa ler senpleman nou konn zot e nou tret zot parey bann profesyonnel akoz san zot sa pei vreman i pa pou marse.

E depi bomaten ler mon pe ekout deba mon ti ava kontan ki konman Manm Lasable nou sezi en keksoz servis piblik ouswa ladministrasyon piblik li i en keksoz permanan dan en leta demokratik.

Gouvernman i vini Gouvernman i ale me servis piblik i reste e vwala nou koman Lasable Nasyonal, akoz nou merit sezi sa lenstitisyen e nou merit ankouraz li pour li vin endepandan, pour li vin enparsyel, pou li vin

profesyonnel e ki alor i reste konman enn bann pilye nou devlopman konman en nasyon.

Alor sa ki enteresan menm dan bann dokiman ki'n pibliye par Gouvernman depi byen lontan irespektiv ki mannyer politik natir politik Sesel ti été. I koz lo ki servis piblik i la pou li servi Gouvernman aktyel e Gouvernman lavenir.

Me nou konnen poudir dan la pratik avek keksoz an teori lo papye i de keksoz me selman lentansyon i la e alor si nou ozordi kan nou pe koze an 2025, nou kapab batir lo sa lentansyon i pou vreman ed Servis Piblik li menm konman en antite me pli enportan i pou ed piblik ki nou, nou reprezante isi anndan e ki pep servis piblik i la pour rann zot sa servis.

Donk servis piblik i la pour siport en Gouvernman demokratik dan son rol konstitisyonnel e ed li devlop e enplimant son *policy*, delivre servis o nivo e efikas dan lentere piblik Seselwa ki *taxpayers*, ki zot larzan zisteman i servi pou ki servis piblik i kapab marse.

E i annan en kotasyon ki monn vwar parla Mr Speaker, ki dir "en travayer servis piblik i annan responsabilite ver Gouvernman ki'n ganny elekte e non pa en parti politik" e

mon ava retourn lo la en pe pli tar.

Donk ler nou pe koz lo *public sector* dapre lenformasyon pibliye par biro *National Statistics Bureau* dan katriyem ka 2024, i annan 10,716 travayer dan sekter piblik 10,716.

E dan sa 10,716 bann madanm an total i 6,644 ki reprezant 62poursan, bann zom I 3,472 ki reprezant 34poursan; plito 32.4poursan e i annan osi bann etranze ki travay dan nou servis piblik.

Dan ka bann etranze i annan 357 zom I ki reprezant 3.3poursan e madanm 243 ki reprezant 2.3poursan. E an total madanm I an mazorite dan servis piblik dan Sesel ki 64.3poursan e zom 58.7poursan.

Ler nou regard servis piblik i annan bann diferan sekter i pa lendistri parey prive, me plito bann sekter ki plito konsentre dan ladministrasyon piblik ladefans e sekirite sosyal, ledikasyon, lasante, travay sosyal, lar, divertisman e rekreasyon e osi lezot servis.

E sa 10,716 travayer Servis Piblik ki monn site be lekel zot? Bomaten Onorab, Arissol ti pe koz lo la, lekel zot? Be nou fanmir sa, nou zanmi, nou vwazen, nou bann ansyen koleg lekol ki swa nou'n dan primer, segonder, NYS,

politeknik avek zot; zot dimoun ki reste dan nou vwazinaz, dan nou distrik.

Zot al dan menm legliz avek nou. Zot siport menm lekip sportif avek nou, zot enn nou voter, nou konman nou bann manm Lasanble Nasyonal zot enn nou, zot en Seselwa.

E alor se sa ki nou bezwen annan en serten sansibilite ler nou koz vizavi sa bann dimoun nou pa mont lo en pedestal nou, nou laba anler konmsi nou konn tou keksoz e nou pou *lecture* zot, non.

Nou bezwen akonpanny zot, akoz nou travay parey Onorab, Roucou ti fer resorti nou travay etrwat ek kanmarad.

Nou konman *MNA* nou anvoy zot en *email* nou fer zot en phone call, nou travay ek zot pour akonplir bann proze ki ganny finanse atraver bidze pei.

Me toudmenm nou bezwen dir avek bann travayer servis piblik zot pa'n arriv la par aksidan si zot in arriv dan servis piblik par aksidan *it's a bit unfortunate*. Akoz pour mwan letan mon regard li servis piblik i en vokasyon li, akoz ou'n bezwen vin la e ou bezwen annan en lanmour profon pour ou deservi piblik.

E i annan en manm bomaten ki'n dir poudir

dimoun i difisil pou travay avek. Wi, Onorab Arissol, dimoun i keksoz pli difisil. Dimoun pa en blok, pa en bal siman ki zis sa ki ou fer, kot ou met li i antre. Non! I pou argimant ek ou, i pou le konn plis ki ou, i pou le rod son rezon.

So pou ou vin dan servis piblik ou bezwen annan en gran lanmour pou deservi ou frer avek ser.

Ou bezwen pare pou amelyor zot lavi - *go out of your way*, ofer zot sa servis ki souvandfwa i esansyel dan zot lavi, ki son term zot lasante, ledikasyon zot zanfan, zot sekirite. E ler ou fer sa travay son *end result* i bezwen pe kree en lenpak pozitiv dan lavi en lot sitwayen.

Ki swa ou'n fer posib pou sanz en glob, ou'n fer posib ki son *loan HFC* in marse. I kre en lenpak pozitiv pour li. I fer en diferans dan lavi sa dimoun e an retour sosyete i vin en meyer landrwa pour li konman en sitwayen.

E i asire ki piblik Seselwa i annan servis avek, akse avek bann servis ki zot bezwen tel ki lord piblik, sekirite piblik e promouwar ek tre enportan lagrandisman lekonomi.

Alor letan ou'n arriv dan servis piblik pour ou annan sa bann kalite ou osi bezwen demonstre serten karakter, bezwen demonstre serten

karakter. Ou bezwen kapab deservi dan en fason ki dwat napa fanmir, napa zanmi, napa i dan menm ek mon la.

Akoz servis piblik zot, zot dil avek *policy* ki *policy* i dir, ki regilasyon i dir, ki Lalwa i dir e Polisi, regilasyon, Lalwa napa lemosyon li. Wi, parfwa kekfwa nou kapab dir be ou konnen ki mannyer nou kapab en pe fleksib.

Be selman *you have to fair. You have to be servi* dan en fason dwat avek lentegrite, ou bezwen annan lwayote, emparsyalite avek obzektivite. E ler ou pe fer tousala, ki ou bezwen mazinen se ou pe bezwen met lentere piblik e servis piblik li menm devan ou prop lentere e ou bezwen fer sa pour ki Konfyans ek konfidans piblik dan servis piblik i agrandi.

E ozordi dan *break* la, mon'n fer en konversasyon avek en O fonksyonner Gouvernman ki an se moman pe annan en pe mirmirasyon dan servis kot i ete. E mon demann li en kestyion be ekout en kou be akoz en sel kou ki annan sa bann mirmirasyon?

E i dir ek mwan ou konnen kwa sa bann defayans lontan ti la, menm plis ki 10 an, be selman la *lately* ki'n arive e sirtou avek en sanzman ladministrasyon 2020, kot i annan bann nouveau striktir sa *performance base* ki nou pe

koz lo la e ki sertern dimoun pa kontan, in anmenn en nouveau fason fer, kot aprezan ou pe bezwen rann kont.

E i annan nouveau dimoun ki pe antre sirtou zenn ki li i anvi travay e souvan ki li i pa (eskiz mwan) me *for lack of a better word* sa zenn ki fek antre i pa koronpi. Alor li i le fer keksoz pou fer keksoz bouze.

E sa nouveau *system* ki an plas i pe detekte bann defayans, bann trenn lipye ki'n annan e ki prezant se sa ki pe annan en nouveau *wave of mirmirasyon*. E Onorab, Arissol bomaten letan in koze Mr Speaker, in dir byen li, in donn legzanp konkret - zour ou al tir ou disan, pa sa Minis, ki'n tire ou disan i ti servi sa parol, sa rezulta pa sa Minis.

Akoz ler Minis Lasante i vin la par egzanp. Minis, Peggy Vidot i asiz la son PS Dokter Valentin, son de CEO ki travay pli enportan avek li *Public Health Authority* Dokter Gedeon e lot Dokter pour *Health Care Agency*, Dokter Louange. Be depi lontan zot la zot depi avan 2020.

*So at the end of the day* annou demann nou lekor, kwa ki'n sanze dan nou pei? Wi ladministrasyon politik in sanze, me *public service* an zeneral i pa'n sanze alor nou konman Seselwa annou azir fran ek nou lekor.

Annou demann avek sa *public servant* la ki nou frer, ki nou fanmir, ki nou vwazen, ki nou ansyen zanmi lekol, demann li si vreman i pe travay avek tou son senserite pour sa valer, sa larzan ki i ganny peye tou le mwan?

I kapab ptigin, i kapab ptigin me eski i pe travay pou deservi byen parey sa saler ki I gannyen, parey legzizans son travay i demann li? So, pour nou kapab apresye e fer bann rekomandasyon kot i neseser.

E la Mr Speaker, nou konman Lasanble National, nou annan en rol enportan pour nou zwe. Akoz? Servis piblik pour li marse, i bezwen larzan ki vin atraver Bidze pei ki la dayer bann preparasyon i komanse. I pou al devan *cabinet*, konsiltasyon back and forth bann MDAs avan ki I vin la ki nou depouye.

Be nou, nou bezwen sezi en keksoz konman Manm Lasanble, servis piblik li i mars lo programm e nou, nou bezwen asire kestyonn sa bann programm, *the input* i larzan ki nou pou met ladan e baze lo son *input* eski zot annan sifizaman resours imen pour fer li marse?

Eski zot annan en kart legal normal an term Polisi, regilasyon, Lalwa pou fer li marse?

Eski zot annan en *monitoring* and *accounting*

process an plas? Pou asire poudir nou war ki mannyer rezulta i ganny mezire? E si nou pa satisfe nou pa merit aprouv sa bann programm.

Parske alafendefen nou'n la konmen letan nou, diferan nou, konman manm Lasanble? Si nou dir par egzanp, mon kapab pran en programm dan Minister Lafanmir *Quality of Life*.

*What is this program?* Lekel ki pe fer sa programm? Ki mannyer dan bann distrik, sa 26 distrik ki isi nou reprezante anndan, i benefisyé direkteman dan sa programm? So vwala kot nou menm nou, nou bezwen demann nou lekor, kwa ki nou kapab fer pour akonpanny servis piblik pour li leve, retir tou politik retir parti ki nou ladan akoz sa i pou Sesel e Seselwa.

Pour asire kontinite, lagrandisman nou nasyon ki ankor dan 2 an i pe al selebre 50 an depi son lendepandans e nou bezwen osi asire poudir sa antite la; swa i en Minister, swa i en departman, swa i en lazans.

E parey Onorab, Lemiel bomaten ti pe dir i annan en vizyon, i annan en misyon, i annan bann lobzektif ki kler i annan sifizaman resours imen, i annan en *website* kot dimoun i kapab ale ki kapab annan en detay lo ki sa Minister akfer i egziste.

I annan en limero kontak, i annan en fason ki kapab fer en konplent ouswa fer en sizesyon, ouswa fer en konpliman. So tousala eski letan nou pe koze nou servis piblik i dan sa oter? E si non ki mannyer nou kapab demann zot pou amelyore atraver prosesis Bidze.

Alor se sa ki nou bezwen regard servis piblik. I en lorgann enportan dan nou demokrasi e si nou ti pou get nou pei konman swa en lakaz ouswa en lekor, annou pran en lakaz, servis piblik i enn bann lasanm konponan enportan dan sa lakaz.

Si i ti lakwizin nou pa kapab tir lakwizin. akoz nou pou napa landrwa pou nou kwi manze. So, i enportan. I enportan e fodre ki nou tir sa politik ladan.

E Mr Speaker, si nou regard tou bann ladministrasyon ki'n vini parey mon ti pe dir lo komansman tousala pou zot servis piblik in enportan.

Prezidan aktyel ler in vin o pouvwar dan enn son bann premye diskour ki i ti fer, in dir son lentansyon vizavi servis piblik se pou retir plizyer lannen mank lefikasite, koripsyon e lapwentman zis zanmi e siporter politik san kalifikasyon dan servis Leta e ladministrasyon piblik, setadir pour fer li vin pli efikas.

Avan li ti Prezidan Faure, ki li i ti met lanfaz lo bann prensip swivan; bon gouvernans, latransparans e rann kont. Avan Prezidan Faure ti Prezidan James Michel dan en mesaz ki ti anvoye an 2015, i ti dir swivan

“En Prezidan i ganny elekte pou deservi lepep e delivre lo promes ki dan son manifesto, me sa travay latas pa fer par Prezidan tousel, me atraver en striktir Servis Piblik angaze e dedye.

E i ti *challenge* bann *public servant* pou vvar *the bigger picture* e pour ki nou travay dan en fason *to broaden the horizon*.

Prezidan Rene mon ti ankor en pe tro zenn pou mwan al fer komanter, solman mon konnen dan son letan ki I ti vin *the famous or infamous security clearance*. E *security clearance* ti en prosedir pou tyek *background* endividé regard son afilyasyon politik e lwayote vizavi rezim, ouswa ladministrasyon o pouvwar pour li kapab travay menm ganny sans al etidye ou menm al osi lwen ganny tretman aletranze.

E sa i kas, kas nou servis piblik e son *professionalism* son lentegrite, son lefikasite. Selman *security clearance* mon bann zanmi e pou bann lazene Seselwa ki pe ekout mwan, nek an 2016 ki *security*

*clearance i pe nepli servi ler rezulta 15 lo 10 ti vini kot mazorite LDS ti gannyen dan Lasanble.*

**(APPLAUSE)**

### **HON GERVAIS HENRIE**

E sa lazenes Seselwa annou pa zanmen fer sa fot, si zanmen i annan en sanzman politik an 2025 *security clearance will come back with a vengeance!*

Akoz mon dir sa Mr Speaker, ler nou ti ganny mazorite dan Lasanble Nasyonal an 2016, konnen ki ti arive kot Lasanble Nasyonal? Plizyer dimoun ki ti travay dan *secretariat* ...

### **MR SPEAKER**

20 Minit Onorab,

### **HON GERVAIS HENRIE**

Mon termin lo la Mr Speaker. ...ti ganny dekouraze pou kite depi *Clerk, Sergeant at Arms*, dimoun ki ti ansarz *HR* ti ganny dekouraze o plito ankouraze pou kite so that the institution will crumble.

E alor tou sa bann *public servant* ki'n reste letan bann LDS in ganny eleksyon zeneral 2020, zot krwar si i annan en sanzman politik zot pa pou ganny viktimize pou dir "pa ou ti siport bannla?" "Ou ankor la?" zot pour sorti parey ros dan fles!

**(APPLAUSE)**

### **HON GERVAIS HENRIE**

E ler mon konte Mr Speaker, i annan en 20tenn dimoun, en 20tenn dimoun ki'n servi pou parti *United Seychelles* depi 1er Lasanble ziska 8enm Lasanble in debout koman en kandida en 20tenn - en 20tenn zot ki ankor pe servi dan diferan fonksyon dan servis piblik nou'n vini nou pan viktimiz zot, akoz Sesel i pour tou son zanfan parey manifesto LDS lo paz 14 a 15 in promet pou fer plizyer reform.

E alor Mr Speaker, mon ava fini lo la an konklizyon - pou nou kapab anmenn re etablir sa lentegrite ki nou servis piblik, i bezwen i pou pran ant 15 a 20 an ankor. E pou sa arive fodre absoliman ki Seselwa i kontinyen fer konfyans parti LDS, akoz avek *United Seychelles* viktimizasyon dan servis piblik pou retournen, politik pou retournen, *security clearance* pou retournen e sirtou lazenes Seselwa pa pou trouv zot plas dan lavenir nou pei.

Mersi Mr Speaker.

**(APPLAUSE)**

### **MR SPEAKER**

Mersi Onorab. Mon a donn laparol Onorab Loze.

**HON JOHAN LOZE**

Mersi Mr Speaker. Mr Speaker, Onorab, John Hoareau ti konmans son Mosyon avek en lapel pour nou pran en lapros bi partizane a politik mon krwar i sa mo ki mon pe rode kot nou tir politik ladan.

*How's that going for you Onorab? En Onorab, Hoareau? How's that working out for you?*

**MR SPEAKER**

Onorab...

**HON JOHAN LOZE**

Mon pe poz en kestyon. Mon pe poz en kestyon Mr Speaker, apre sa *rubbish*...

**MR SPEAKER**

Onorab, ou adres Speaker, ler ou entervenir dan Lasanble.

**HON JOHAN LOZE**

Mr Speaker, *how's that going for you? How is the nonpartisan apolitical approach* kot nou tir politik dan sa Mosyon apre sa ta *raid of rubbish* ki mon fek tandé la.

*How is it going?* Konmkwa ki si *United Seychelles* I ganny elekte dimoun pou sorti parey rod dan fles dan Gouvernman.

E pa sa ros dan fles ki mon pe dir *rubbish, what do you mean si United Seychelles...* ler

*United Seychelles* I ganny elekte 2025

(*Interruption*)

**HON JOHAN LOZE**

Kan *United Seychelles* I ganny elekte 2025.

Sa saret 5 larou ki zot in vini la zot pa ni menm devret prezant zot figir dan eleksyon zot.

(*Interruption*)

**HON JOHAN LOZE**

Sa leta fer lapenn ki zot ladan la...

(*Interruption*)

**HON JOHAN LOZE**

Zot pe gel ek nou si nou ganny elekte.

Premyerman Mr Speaker, *United Seychelles* pe al ganny elekte, i pe al ganny elekte par vwa popiler Lepep Seselwa.

Mr Speaker, si Onorab, Doyace Porice ti kapab *maintain* en ptgit *decorum* dan Lasanble i ti ava...

(*Interruptions*)

**HON JOHAN LOZE**

Ou tandé Mr Speaker?

**MR SPEAKER**

Onorab, fer ou entervansyon adres Speaker...

*(Interruptions)*

**MR SPEAKER**

Adres Speaker e les lezot manm trankil. Mersi.

**HON JOHAN LOZE**

Yes, Mr Speaker, a kondisyon ki Onorab, Doyace Porice i ...

*(laughter)*

**MR SPEAKER**

Onorab, fer ou diskour adres Speaker. Les lezot Manm trankil mersi.

*(Interruption)*

**HON JOHAN LOZE**

Yes Mr Speaker.

*(Interruptions)*

**HON JOHAN LOZE**

Wi Onorab, ki ganny peye pou koz apre mwan.

Mr Speaker, nou pe al gannyen eleksyon nou, sa in kler nou pe al gannyen par en vwa popiler!

Sekreter Zeneral LDS i kapab gele *until the cows come home* menas sa ki i anvi menase, zot in fini! *LDS you are done!*

**(APPLAUSE)**

**HON JOHAN LOZE**

*Pack up and go home!* Zot letan in fini zot pa trouve? Zot konnen zot. Dan sanmdi devan laport dimoun zot swazir kot pou ale

*(Interruption)*

**HON JOHAN LOZE**

Zot gete ki lakaz zot ale, zot al an misouk, zot ganny zoure, zot ganny maltrete akoz?

*(Interruptions)*

**HON JOHAN LOZE**

Akoz zot in fini *you are done!* *Pack up and go home!* Pa vini pou vin fer sa bann lecture dan sa Lasanble si nou ganny eleksyon isi laba lot, lot, lot.

Mr Speaker, 2021 ler zot ti pe kasyet sa pep e zot Gouvernman ti pe donn en bal lo ledo Seselwa e ti napa enn zot ki ti annan kouraz pour sorti pou al lo teren.

I rephrase Mr Speaker, apart mon koleg Mont Fleuri Onorab, Michel Roucou ti napa enn zot ki ti annan kouraz pour sorti pou al lo teren pour al get dimoun.

Be sa pa ti sa bann letan kot ti annan zis 115 Seselwa ki ti lo *welfare*? 115 Seselwa ki ti pe ganny lasistans *welfare*.

Now konbyen *hard working civil servants* ki zot ti tire malapropo lo lasistans *welfare*? Konbyen *hard working civil servants* kin

bezwen retourn dan en lakaz kot son manman ki pa apropriye pour li ek son fanmir, akoz zot dan zot megalomani zot in koup lasistans *part rental*, konbyen?

Ozordi zot pou vini zot pou vin rod nou *arr civil servants* isi laba. *Really?* Zot? Zot pa kalifye pou koz lo sa bann size zot.

E annan bokou keksoz ki diskalifye ou parti Mr Speaker, from fer sa bann pozisyon ki zot pe pran ozordi dan Lasamble.

Ozordi nou pe ganny dir annan sansibilite, pa mont lo en pedestal, konmsi nou konn tou pou *lecture* sa bann dimoun dan *civil service*.

30 an zot in lo sa pedestal, zot pa fek ne yer zot 30 an zot pe *lecture civil servants* depi 93, depi 93 zot dan lopozisyon zot pe pran bann menm pozisyon 30 an.

Ozordi zot a vini, zot a vini zot a vin dir avek nou koumsa letan ou tir disan Minister lasante eski Minis, ki asize obor ou.

Be konmsi ozordi ki zot reve sa zot? Pandan 30 an zot pa ti war poudir pa Minis, ki pe asiz obor ou? pandan 30 an zot pa ti trouve poudir pa Minis, ki pe tir disan dimoun? Pa Minis, ki pe bouz ek *file*?

Eski zot, zot in kontribye pou edik sa pep lo sa bann size? Eski zot in pran sa 30 an

ki zot ti annan dan lopozisyon pour prepar Seselwa pour zour zot vin o pouvwar? Ouswa eski zot pe rekolte tou sa legren bat latet ki zot in senmen?

**(APPLAUSE)**

### **HON JOHAN LOZE**

Sanmenm sa ki pe zerm ek zot ozordi. Prezan vin gele la anndan isi laba, *civil servants*, pa Minis, ki tir ou disan.

Ozordi ki zot realize pa Minis, ki tir disan? Tou sa letan ki zot pe maltret travayer Lasante la, zot pa ti konpran? *Now the realization dolls?*

Be Mr Speaker, i tro tar i zis parey sa lapel limite ki Prezidan in vin fer apre ki in maltret tou dimoun kales kase.

In ganny son zistwar lanver li, i tin devret lans ek lapel pour limite apre 3 an pli tar vin rod leta kales.

Be tou dimoun tin a konnen I senser *from day one* sa msye i antre i vin Prezidan i lans en lapel pour limite, 3 an pli tar i a vin dir nou limite apre ki in vin maltret nou kales kase?

Be lekel ki pou mord sa la? in tar, in tar pou zot *I'm sorry* zot in *fail*. E ler nou koz en sistenm lapwentman ki fermen ant 12 ek 1er i pa *contingent* lo si travayer i bezwen al manze ouswar si travayer pa bezwen al manze

sa, i pa contingent lo ledo sa *clerk* ki pran lapwentman sa.

*But what about the system?* Lekel ki responsab pour met en sistenm *in place*? I sa sistenm an plas. I devret annan dimoun la pour fer sa, i sa management ki devret met en sistenm konvenab an plas.

Zot pa kapab vini avek en leskiz dir nou “travayer pa pou manze” be ki mannyer travayer pa pou manze? Pa nou vot Bidze pou Minister Lasante nou? Zot pa kapab anploy travayer met la?

Si bezwen travayer mete *mes chers amis* pa vin avek sa bann largiman las koumsa be i fay sa bann largiman.

Mr Speaker, i annan 2 group dimoun ler mon pe gete ki pe ganny targete atraver zot bann kalite panse pour zot. Ozordi ou annan *civil servants* li menm ki ganny kritike, bann sef i ganny aplodi *by the way*, msye isi, msye laba fantastik, bravo tou Minis, i ganny aplodi zot, zot sanpyon zot.

Be i annan 2 group dimoun ki mon war i ganny targete i anna *civil servants* zot menm zot, zot ganny targete bokou.

Apre ou annan en group dimoun ki ganny dir konmkwa li i pe met blanm lo ledo Gouvernman sa mon sipoze bann resipyen servis bann dimoun ki li i annan en *grievance*, i annan en konplent

e i pou bezwen ganny *lectured* ki mannyer i pou delivre son konplent.

Be Mr Speaker, se ou parti depi ti parti Seselwa ki’n *train* Seselwa pour *voice* son *grievance* dan lafason ki i pe voice ozordi se ou parti Mr Speaker, in dreng lapo lagel sa Kreol ki’n anmenn li koumsa la ki ozordi ou war li koz dan lafason ki i koze.

Zot ki’n *train* sa pep. Zot ki’n fer Seselwa vin koumsa konplent Gouvernman dan la fason ki i konplent Gouvernman pa nou, nou fek vin la nou.

Zot ki’n enzekte sa bann latitud dan sa pep ozordi zot vire zot maltret sa pep akoz lafason ki I konplent zot Gouvernman? Be zot zouti sa, zot roten ki zot in met dan lanmen kreol ki pe fwet zot avek. *Live with it mes chers amis, live with it. You did this.*

Pandan 30 an zot in dan Lopozisyon dan sa pei e zot pan edik sa pep pour vin, sa pep ki zot, zot ti a kontan i ete ler ki zot, zot pou dan Gouvernman e sa ki zot pe rekole la, sa ki zot in anmenn Mosyon, sa ki zot pe gele, akoz sa ki zot gannyen dan Sanmdi prezan zot pe rode, zot pe tat tate pe rode ki mannyer pou aziste. Be i pa pour arete sa zot ki’n fer.

Konnen Mr Speaker, sa bann letan kot ti annan zis

115 Seselwa ki ti pe ganny lasistans, e annou pa dir bann dimoun *unemployed* annou koz lo *civil servants*. Akoz Mosyon i lo *civil servants* be sa bann menm letan kot ti napa larzan pour asiste nou bann *civil servants* ek *welfare* akoz *part rental* be i bann menm letan ki zot in swazir pour koup *long service allowance*.

I bann menm letan ki zot in swazir pou zot zwe avek 13 mwan saler. Be ki ti bann letan sa 2021 an montan ki pe pase sa bann letan? Sa ti bann letan kot serten dimoun letan *COVID* ti ankor so pei ti ankor fermen, zot ti mont lo avyon *IDC* zot ti al maryaz fir zot dalon Moris ti sa bann letan.

Sa ti bann letan kot zot ti fer *retreat* bann retrete Silhouette, ti sa bann letan. Sa ti sa bann letan kot nou ti al *visit zil IDC* pou en ti 3 milyon. Ki i fer?

Be nou pa ti mazin travayer *civil service all along* nou? Ler nou ti pe donn bal monte, desann lo *Emirates*. Nou al konferans, nou al *meeting*, apre nou sove Vandredi swar nou retour Dimans bomaten, nou ale menm nou pa anonse.

En ler ou a krwar zot laport konferans si zot pa laba konferans pa pou fer. Tou konferans zot bezwen ale *Abu*

*Dhabi*, be *civil servants* li i pa trouve sa li.

Ozordi zot mazin en kou *civil servants*? Ozordi?

Prezan sa mazinen ki zot mazin li la i vin *sweet and sour* li en pti felisitasyon avek 4 maltrete.

Be pran zot en desizyon, mon konnen zot pe sey sov zot nanm, mon konnen zot be trouv lanmor dan zot lizye be sey pran zot en desizyon.

Zot in fini zot be *exit gracefully*! Annan en ti pe pider mon konnen sa msye in dir ki koson in fer avek zot pider, be annan en pti de pider konmsi *exit gracefully*! Napa naryen zot pou fer *between* la avek le 25 Septanm 2025 sepa 24, Septanm 2025 la.

Ni sa *shuffling Cabinet* ki zot pe al fer lo 48 mwan an Oktob naryen pa pou marse la, napa naryen pou sov zot nanm. Ni sa Mosyon, ni sa lot Mosyon lise ki zot in mete - naryen. *You are done* zot konpran?

Mon pe koz ek zot dan en kreol ki zot kapab konpran, en itil zot pe vini pou vin maltret *civil servants* pa *civil servants* ki zot problem. zot sitan dekonekte zot realize bomaten in annan enn zot ki'n dir apropos le 7 Desanm nou pa'n prevwar ki Gouvernman pan prevwar ki zot ti pou erite dapre zot, zot in erite sa ki'n arive le 7 Desanm Onorab,

Naidu al rewwar ki ou'n dir bomaten.

Zot sitan dekonekte zot krwar zot in erit sa sitasyon le 7 Desanm ki'n ariv anba zot *watch akoz zot neglizans pou zot. This is how lost you are.*

*How lost ou parti i ete Mr Speaker. Bomaten mon tann en lot zistwar LDS ti dir fer Lasanble vin 2 zour this is how lost you are. LDS ti dir fer Lasanble vin 3 zour, LDS ti dir fer Lasanble vin 3 zour zot pa rapel ki zot ti dir 2015 zot - 3 zour. United Seychelles ti dir 2 zour, zot ti fail, zot ti fail lo sa ki zot ti dir fer.*

Prezan zot vin war problemm ek *civil servants?* Apre ki zot in promet en Lasanble 3 zour, zot in *fall back* lo 2 zour prezan problemm I ek *civil servants?* Be bon.

Mwan lo kestyon *civil servants* premyerman 13 mwan saler.

Mr Speaker, nou pou retournen 13 mwan saler dan sa pei, 2025 *United Seychelles* pour retournen en 13 mwan saler dan sa pei, en *proper* 13 mwan saler dan sa pei. Sa ki konnen i oule en *service performance allowance* ouswa en *performance allowance* mete avan zot sorti.

Met zot *performance allowance* avan zot sorti sa i a vin *contingent to RBM*, akoz nou ler nou antre la 13 mwan

saler pe retournen sa met byen dan zot latet.

Lot keksou mon anvi dir ek *civil servants* ki *in service* 2025 ou pou kalifye ou pansyon a laz 63 an ler *United Seychelles* I vin o pouvwar ou pou kalifye ou pansyon a laz 63 an parske nou depi 78 nou kon veki...

**(APPLAUSE)**

### **HON JOHAN LOZE**

Ki kreol 63 lannen travay I ase. *We are done with this.* Nou pa pe argimant ankor ek zot lo la, akoz zot in fini zot, zot nepli dan sa *equation*.

Nou pa pou pas nou letan argimant avek en bann sez vid, ki parey en nespes zwazo lezel kase. Zot in fini - *you are done!* E nou pa pe argimant ek zot nou.

Pansyon pe retour 63 an, 13 mwan saler pe retournen pou *civil servants* e mon dernyen mesaz pou *civil servants* Mr Speaker, Minister Finans ti fer son letid konplet avan ki I ti met an plas *long service allowance*.

Letid ti ganny fer par Minister Finans e i ti en keksou ki ti ganny trouve vyab. Ou *long service allowance* pour retournen an 2025 letan *United Seychelles* i return o pouvwar dan sa pei !

**(APPLAUSE)**

**HON JOHAN LOZE**

Sa mon le dir kler pou tou *civil servants* tande.

(*Interruptions*)

**HON JOHAN LOZE**

Tande Mr Speaker? Ou tande ou *Caucus* Mr Speaker, lakres in ouver laba. *Day care* i ouver.

(*Interruption*)

**HON JOHAN LOZE**

Mr Speaker, tande?

(*Interruption*)

**MR SPEAKER**

Fer ou *speech* Onorab.

**HON JOHAN LOZE**

Ar wi mon pe fer mon *speech* Mr Speaker, e mon ou pe byen apresye mon *speech* malgre dezord e malelve ou *Caucus, at least* ou'n nobou apresye bann keksoz ki mon annan pou dir Mr Speaker.

Mr Speaker, nou'n arriv en staz kot nou nepli kapab viv en sityasyon kot politisyen nek pou vini i pou maltret dimoun dan *civil service*.

malgre lefe kot zot annan en *pedigree* ki zot in fer sa pandan en 30tenn lannen nou konnen, ki sak fwa li i annan son bann felir, i annan son bann *failures*, i annan son bann febles i vini fer en *speech*

kot i pa'n prepare, kot in pann angaz li pou fer okenn resers e son *go to* i vini i dir ou *civil servants* pe trenn lipye, zot pa pe delivre, zot kasyet *file*, zot isi zot laba.

Konnen zot, zot in lev size Prezidan i *micromanage* taler e zot in nonm Minister tou ki zot dir Prezidan i *micromanage* zot ki'n dir.

Mr Speaker, selman letan zot in dir, zot in dir akoz travayer *civil servants* pa ankor konpran poudir sanzman in arive la i fer 3 an Prezidan i bezwen vini vin *micromanage* sa ki mon'n tande mwan.

Mr Speaker, Prezidan i *micromanage* son prop Minis, ou le dir mon Minis, pa ankor konpran?

**MR SPEAKER**

20 Minit Onorab.

**HON JOHAN LOZE**

I *micromanage* son prop Minis, i dir son Minis, ki pou fer, ki pa pou fer e Minis, ler in siny en dokiman fer retournen ale al rode ki sa bann dimoun in anmase la prezan.

Mr Speaker, mon remersye ou pou sa 20 minit. Mon byen apresye letan ki ou'n donn mwan, e mon byen kontan monn nobou adres Lepep Seselwa, adres bann *civil servants* lo bann size ki mon krwar zot ti devret konnen konmkwa ki 2025

*United Seychelles* pou retourn zot pansiyan laz 63 an, pou retourn zot *long service allowance*.

E pli enportan nou pou prezerv lanplwa tou dimoun ki dan *civil service* - pa ekout bann voler *speech* ki annan pou dir Mr Speaker. Mersi.

**(APPLAUSE)**

### **MR SPEAKER**

Mersi Onorab. Laparol i pou Onorab Cosgrow?

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi tou dimoun ki pe ekout nou la apre midi. Mr Speaker, Mosyon ki devan nou apre midi i pe demann Lasanble Nasyonal. Lasanble Nasyonal i felisit tou travayer servis piblik ki pe fer zot travay byen e konsyansyezman pou benefis nou pei. Mwan pou mwan mon stop la mon.

Mon stop la, akoz larestan Mosyon pou mwan malgre in ganny table devan Lasanble Nasyonal mwan pou mwan i pa fer sans, i *rubbish*. E Mr Speaker, mon pou dir akoz. Mwan mon ti ava prefere, mon ti ava prefere ki dan sa Mosyon ti demann Gouvernman bezwen demann Gouvernman. Akoz ou pa kapab al demann ek travayer servis piblik.

Travayer servis piblik i travay anba en kad Gouvernman. So, ou bezwen demann avek Gouvernman. E se Gouvernman ki pran nou Mosyon, swa i aksepte ouswa i rezete ouswa i pa fer naryen. E se Gouvernman ki lotorite, pa travayer servis piblik. Zot pe zis pran blanm, tir blanm lo linefikasite zot Gouvernman e pran anvoy lo travayer servis piblik.

Mwan mon ti ava prefere Mr Speaker, ki zot demann *or Lasanble* i demann Gouvernman pou vwar *or* pou fer letid *or* pou vwar kwa ki pe arive dan servis piblik ki pe fer ki serten landrwa dan servis piblik pa pe sitan efikas parey pep Seselwa ti ava anvi. Sa ti ava fer sans, akoz se Gouvernman ki annan pouvwar pou fer aksyon.

E mon konnen akoz zot pa pe fer sa. Akoz ler zot in fini fer sa letid, ouswa zot in rewwar fonksyonnman servis piblik zot pou war ki problem i pa avek Travayer Servis Piblik. Problem i avek zot direksyon, zot ladministrasyon ki en kapab ozordi pou delivre dan servis piblik pou pep Seselwa.

Bomaten Mr Speaker, Onorab Hoareau, mon zanmi Onorab Hoareau, ler in prezant son Mosyon parey mon koleg Onorab Loze in dir i ti anvi en lapros bi partizan.

Me zis koman i fini dir i anvi en lapros bi partizan, Onorab Hoareau i komanse. I antre dan tout sort kalite *statement* politik. *Statement* politik i vin kraz bann ladministrasyon avan, kraz parti politik. E Onorab i ekspekte nou asize, ekoute, reste trankil e annou kontinyen koze bi partizan sa ki ti arive 2016/2020 pa pou ariv ankor sa.

Pa pou ariv ankor, nou pa pou asize ekout zot e krwar tou sa ki zot dir nou pou tonm dakor avek, zot pou fer sa ki zot anvi. Non, malgre nou pli pti gin kote isi la, nou pou donn zot en *tough time* ziska 2025 ler mazorite zot i *exit* sa Lasanble Nasional.

**(APPLAUSE)**

### **HON WALLACE COSGROW**

Nou pou donn zot en *tough time*, nou pou fer zot travay. Nou pou fer zot aprann travay pandan sa dernyen 1 an ki reste, pou zot aranz sa bann dega ki zot in fer dan Servis Piblik. Mr Speaker, ou pa kapab demann Manm Lasanble pou nou et bi partizan lo en Mosyon, kan ou maltret travayer Servis Piblik trenn lipye.

Ou pouz zot dan travay, dan zot travay Servis piblik akoz zot krwayans politik. I annan ki'n arive nou konnen, i annan en kantite in arrive.

Onorab Henrie, in koz lo *security clearance* zot in fer en kantite *security clearance* ler zot in vini 2020 zot. I annan en kantite Seselwa ozordi la, sa ki konnen i konnen sa ki'n santi ki'n pas ladan ozordi in temwanny sa i pou dakor avek mwan.

Ki mannyer ou kapab Mr Speaker, dir nou annou koz bi partizan ler ou annan en PS ki *weekend* la i dir avek son *staff*, i pa oule war personn son *staff* dan *rally United Seychelles* le 26 Anse Aux Pins. Pa mwan... ler mon ava anvi dir mon ava dir, pa ou ki pou dir mwan ki poudir. E mwan mon pe dir ou...

*(Interruption)*

### **MR SPEAKER**

*Order! Order! Order!*

### **HON WALLACE COSGROW**

Mr Speaker...

### **MR SPEAKER**

Wi Onorab.

### **HON WALLACE COSGROW**

Ler moustik i pik for zot kriye.

### **MR SPEAKER**

Reste lo remark.

### **HON WALLACE COSGROW**

Ler i pik zot i fermal, zot kriye.

### **MR SPEAKER**

Wi Onorab, reste lo remark ki ou kapab zistifye. Mersi.

### **HON WALLACE COSGROW**

Mon kapab kontinyen. Mr Speaker, Onorab, son lentrodiksyon i komans par blanm lepase. Mosyon i enn li menm Mr Speaker, ki pe kre divizyon. E ozordi dimoun Servis Piblik ki pe ekout nou, i pe war zis divizyon dan lafason ki nou pe koze akoz Mosyon li menm i enn ki'n kre divizyon.

Parey mon dir ou Mr Speaker, mwan, mon ti a prefere ki Mosyon i koz lo Gouvernman rod fason pou rektifye bann defayans ki ozordi i annan dan servis piblik i pa met sa bann zafer lo ledo travayer servis piblik.

Mr Speaker, ler en dimoun i travay en landrwa ou dir avek li koumsa poudir "ou konnen, tou dimoun ki la nou konnen kot zot ete. Be ou nou pa konnen" be sa pa en viktimizasyon sa? Pa en presyon lo sa *public servant*?

Tousala i bann rezon Mr Speaker, akoz ki ozordi petet dan serten ka Travayer Servis Piblik pa pe performen. Mon a donn zot en legzanp Mr Speaker, kot pa pe performen. Kot Lazans Proteksyon Sosyal, Onorab Lemiel in koz lo la taler. 1 an, 2 an pase ti annan zis 115 dimoun ki ti pe ganny asiste. 115 dimoun letan ou

divize mon krwar ti tonm pres 3, 4 par distrik.

Dan sa 115 Mr Speaker, i annan dimoun ki bezwen asize esper 2 mwan, 3 mwan avan i ganny larepons. I annan letan i ganny larepons i sanse i ganny larepons pozitiv. E i kapab soutenir son fanmir avek en lasistans Gouvernman.

Mazorite Mr Speaker, i ganny en larepons ki dir li ou pa kalifye. Apre tou sa birokrali, tou sa papye ki in anmennen tou sa *hoops* ki zot fer li sote Mr Speaker, avek zot bann birokrali ki zot in entrodwir ler zot in vin o pouvwar ozordi Seselwa, malere, travayer servis piblik ki dayer i pa *unemployed* li, i pe travay li.

Me selman son saler petet i pa ase pou soutenir son fanmir in ganny met akote. La, la inefikasite Mr Speaker, i pa sa bann travayer lazans. Se sa bann birokrali ki zot in mete dan tou sa bann prosedir par lao prosedir ki ozordi i fer ki keksoz i pa pe marse, e sitwayen pe fristre. Lazans Proteksyon Sosyal i enn.

Mr Speaker, Onorab Lemiel in koz osi lo *Home Care Service*. Nou'n tir *Home Care*, Lasanble in tir *Home Care* in aprouv *Bill* pou *Home Care* in met li koman en lazans separe. Ozordi ou konnen ki kantite dimoun pe plennyen Mr

Speaker, akoz en larepons sorti kot sa lazans pou zot kapab konnen pou kalifye en *carer* ou non.

Si zot pou ganny asiste, bann prosedir lot, lot, lot. Me se sa Mr Speaker fristrasyon pep Seselwa. Fristrasyon i dan lafason ki zot in kre bann sistenm, bann birokrali ki ozordi pe afekte pep Seselwa. I pa travayer *Home Care*, travayer *Home Care* i sey son mye.

Me i bann birokrali ki zot in kree ki ozordi pe fer ki pep Seselwa pa pe ganny sa servis ki i merite. E mazorite se nou bann dimoun, nou popilasyon dimoun ki pli vilnerab.

En lot landrwa Mr Speaker, kot dimoun i fristre e taler zot in dir poudir pa Minis ki tir disan. Me Mr Speaker, pa Onorab Ramkalawan dan Lasanble ki ti dir “*Minister the bucks stop with you, stop with you Minister.*” Pa nou ki ti dir, be kwa zot in blyi sa bann keksoz?

Me Minis i responsab Mr Speaker, se li ki a latet sa Minister latet politik Minister se li. Letan nou dir politik, se li ki bezwen vin avek bann Polisi, bann stratezi pou fer sir ki son Minister i marse. Si i annan en problem kot i tir disan, Minis i bezwen adrese e fer prosedir marse pou son pep. I aret kot li Mr Speaker.

E mwan sa bann zafer ki zot pe dir se pa travayer ki responsab lot, lot, lot pe trenn lipye, mwan pou mwan mon pa tonm dakor avek. Si zot war travayer pe trenn lipye, zot war keksoz pa pe marse zot annan pouvwar pou zot aranz keksoz.

E ki zot ti fer letan zot ti vini Mr Speaker an 2020? Zot ti pran dan serten landrwa, zot ti pran en bon pe kot bann pouvwar ti ganny *delegate* avek bann lazans, bann lotorite zot ti pran zot ti ferm serten sa bann lazans. Zot ti *merge* lazans, frenm lazans.

Dan bokou ka, pran pouvwar met anba Minister. E efektivman pran pouvwar met anba lanmen Minis. E ozordi si i pa pe marse, nou bezwen blanm Minis. Se s aki nou dir pa bezwen blanm *public servant*, blanm dimoun ki fer Polisi Minis ou annan direksyon politik Polisi aranze kot pa pe marse. Ou pa kapab vin blanm travayer servis piblik, akoz li i *operate* anba en kad prosedir ki ou met li ladan.

Si i pa pe marse, sanz prosedir. Si pa pe marse, sanz striktir. Sanz striktir ki zot in fer depi ler zot in vini. Ki zot in fer? Naryen, an term striktir apard *RDM* ki ti dan prose, ki ti dan prose. Depi en pe letan in komanse avek *World Bank* ki ti dan prose, zot pa'n fer naryen. Ki zot in fer?

Zot in plizoumwen al atak tou keksoz ki travayer Servis Piblik ti pe gannyen, ti pe benefisyen pou zot kapab delivre en meyer servis.

Nou pou *harp* ankor. 13enm mwan saler ki zot in fer avek? Zot in aras travayer servis piblik dan lafason ki i ti ete. E zot in met en pake birokrazi kondisyon avek ozordi. E parey in ganny dir, 2025, 2025 13enm mwan saler pou tourn en drwa travayer Servis Piblik e osi tou travayer Seselwa.

Si fodre annan en performans ki vin en sistenm performans ki evalye zot pou ganny en *bonus* i ava annan en sistenm. Me 13enm mwan saler, i ava tournen Mr Speaker, parey i ti ete. Ki zot in fer ankor Mr Speaker? Apre zot blanm travayer servis piblik, zot dir servis Piblik pa pe marse. *Long service allowance* Mr Speaker, ti en lankourazman.

Ozordi i annan dimoun ki'n komans gannyen in koupe. I annan en dimoun lot fwa pe koz avek mwan i dir mwan 39 an dan servis. 39 an dan servis i ti ganny son *long service allowance* 35 an. La ozordi, e sepa si i pa'n fini ganny son 40 an mon krwar sa semenn la avan yer in ganny son 40 an, i napa naryen benefis pou li Mr Speaker. Zot in koupe, me selman zot oule i

delivre. Zot oule i delivre plis, zot donn li plis louvraz, zot met bokou plis *stress* lo li me selman zot pa oule pey li.

Mr Speaker, ki zot, zot in fer letan zot in vini zot, mon pou *remind* zot ankor menm si zot pa kontan. Pa ti pou Servis Piblik sa, zot in aranz zot lekor byen avek tou sort kalite *allowance*. Premye lannen ki zot vin dan Gouvernman, zot aranz zot lekor ek tou sort kalite *allowance*. Wi, mon pou koz lo la mwan, mon pou koz lo la akoz mon kapab koz lo la. Sa ki pa ti la mon pou koz lo la.

Mr Speaker, i annan en Onorab ki'n dir bomaten ki poudir li i servi servis lasante pou ankouraz bann *staff*. Tre byen *very good*, napa problem. Be Mr Speaker, mon a dir ek Onorab dir avek son bann Minis ki ganny larzan ledan zot osi pa pran larzan ledan, al kot dantis ki *free*. Mr Speaker, mon a dir ek son bann Minis pa bezwen pran larzan palto. Pa bezwen pran larzan palto, aste zot lenz dan zot pos.

Mr Speaker, zot in aranz zot lekor sitan byen, sitan byen ki zot, zot in *ok*. E zot in met en pake stres lo travayer Servis Piblik, apre zot ekspekte en bon *delivery* dan Servis Piblik. Me i pa mars koumsa Mr Speaker, apre zot vire zot bat latet travayer

servis piblik donn en logmantasyon 10 poursan ki'n ganny manze dan taks ki'n ganny manze dan logmantasyon pri lavi. Bil kouran in monte, pri manze in monte.

Bann ki lo zil ankor pa bezwen al gete manman pa pe kapab tenir. Lavi pa fasil, apre zot ekspekte dimoun delivre en *better service*. Be pa mars koumsa sa. Ou bezwen sonny ou servis piblik, vre i en vokasyon Mr Speaker. I en vokasyon Servis Piblik, pa tou dimoun ki fer li. Pou en bon pe letan, mwan mon'n en dimoun ki'n travay dan servis piblik depi komansman.

I pa fasil, ou zwenn tou sort kalite mantalite dimoun. I annan de fwa dimoun ki pou kriy ek ou. I annan dimoun ki *pleasant* napa problem, me i pa fasil.

I pa fasil Mr Speaker, me pou nou kapab annan en servis piblik ki mars byen, Servis Piblik ki mars byen e ki delivre alaoter ki nou anvi. Be nou bezwen osi sonny sa servis piblik, kot pa pe marse nou bezwen annan nou bann *leaders*, i bezwen annan kouraz.

Bezwen annan lafason fer pou ki nou evolye bann Polisi, bann stratezi, revwar striktir pou fer keksoz marse. I pa sifi zis pou debout dan en *speech* vini komans plennyen,

komans dir en pake zafer ekspekte keksoz i sanze. Non, i pa mars koumsa sa. Ou konnen i annan dimoun tou zot lavi zot in zis koze, koze, koze, koze pa'n zanmen kapab fer aksyon.

Me ozordi i zour, annefe letan pe fini, letan pe ale. Pa reste bokou letan, mon pa konnen ki kantite aksyon zot pou fer. Napa problem, ler nou vini nou a netwaye nou. Nou a netwaye nou, nou ava aranze akoz pa reste bokou letan 2025 ler nou vini nou ava netwaye, nou ava aranze, nou ava tourn sa Servis Piblik dan en pli bon fason dan fason ki zot ti zwenn li an 2020.

Mr Speaker, parey mon'n dir Servis Piblik i enportan li. Akoz dan en sans leker Ladministrasyon. E se servis piblik, si servis piblik i mars byen pei an zeneral i pou mars byen akoz nou donn servis bann biznes, sekter biznes. Ki moter lekonomi e ki fer keksoz marse. So, si Servis piblik i mars byen, pei an zeneral i bezwen kapab perform pli byen.

Me se sa ozordi ki nou pe war bokou defayans dan bann diferan Sekter Prodiktiv, kot pa pe neseserman mars parey. E nou pe tann bokou biznes pe konplent, pe konplent en kantite. Akoz zisteman servis piblik pa pe ofer sa servis dan

son totalite parey i devret pe fer.

E dimoun deor i fristre pe konplent, laplikasyon i pran en kantite letan. Pa problem sa dimoun ki pe *deal* ek sa laplikasyon sa. Parfwa desizyon anler pa pe ganny pran parey i sipoze pe ganny pran.

Me selman i asiz anler avek Minis, e i deside parfwa. E zot pou dir mwan *substantiate*, be mwan mon konnen desizyon parfwa Mr Speaker i baze lo kontan pa kontan, ek nou pa ek nou ozordi. Desizyon i ganny baze lo ek nou pa ek nou ozordi Mr Speaker. So, mwan mon krwar Mr Speaker, ki si sa Mosyon ti annan en pti pe plis...

Si sa Mosyon ti viz ver aksyon par Gouvernman, pou mwan mon pa ti pou war li en problem akoz se Gouvernman ki responsab. Me ozordi ki mannyer sa Mosyon i *worded*, pou mwan mon pa war i fer sans.

Pou mwan mon krwar sa Mosyon pa pou efektiv, pou napa okenn *follow up* lo la. E mon pa krwar mon devret vot pou sa Mosyon. Me selman par kont Mr Speaker, avan mon terminen mon ava felisit tou travayer servis publik. Tou zot tou, bokou mon'n travay avek. Mon felisit zot tou, e mon dir zot en keksoz.

Kit lesprwar vivan, kit lesprwar vivan akoz 2025 ler nou antre keksoz pou meyer. 63 an zot pansyon pou ganny retournen, zot *long service allowance* pou ganny retournen. E zot 13enm mwan saler pou ganny enstale parey ti ete san okenn problem. Mersi Mr Speaker.

**(APPLAUSE)**

### **MR SPEAKER**

Mersi Onorab. Laparol pou Onorab Woodcock.

### **HON WAVEL WOODCOCK**

Mersi Mr Speaker. I enteresan Mr Speaker, ki sa 2 entervenan ki fek koze avan mwan, tou lede zot in dir en keksoz ki *obviously knowing* US lafason ki zot lespri i fonksyonnen zot pe zis sey fer bann politik.

Bann *polemic* menm kan Mr Speaker zot menm zot ti pe *back up* en Kandida Prezidansyel pou 2020 sa ti Mr Danny Faure, ki ti pe siport - ki ti pe pouz pou en desizyon son Gouvernman ansanm avek son Minis Finans pou sanz laz pansyon pou sorti 63 an pou vin 65 an.

**(APPLAUSE)**

### **HON WAVEL WOODCOCK**

Mr Speaker, mon pa konnen si zot in bliye ou konnen sa i

egzakteman sa kalite *rubbish* ki ou pou gannyen avek en parti en kalite Lopozisyon ki nou annan ozordi. Mr Speaker, i annan en lot keksoz, ou konnen ennler i *baffle* mwan bann keksoz ki sorti dan labous mon bann koleg dan Lopozisyon Mr Speaker.

Onorab Cosgrow i dir koumsa poudir ler, swa Onorab Cosgrow, swa Onorab Loze in dir poudir ler i dir si, si ki pa pou zanmen arive US i raport eleksyon 2025 - US pou garanti travay tou bann travayer dan sekter piblik, tou bann travayer pou garanti zot travay. An plis ki sa in osi dir entervenan avan Onorab Cosgrow, *ex Minister* Cosgrow in dir pou dir tou keksoz dan *civil service* pou retourne parey ti ete avan an 2020.

Be annou fer en revi an 2020 avan 2020 osi ki ti pe arive dan sekter piblik. Mr Speaker, eski ou pe ekspekte ankor dimoun mor pe ganny lasistans *welfare* parey ti ete avan?

**(APPLAUSE)**

### **HON WAVEL WOODCOCK**

Eski nou pe ekspekte ankor plizyer milyon pe disparet dan kof Leta Mr Speaker?

*(laughter)*

### **HON WAVEL WOODCOCK**

Dife dan Zarden Botanik Mr Speaker?

*(laughter)*

### **HON WAVEL WOODCOCK**

Linyon pa pe fer profi Mr Speaker. Servi transpor Gouvernman pou sarye koson ladan Mr Speaker?

*(laughter)*

### **HON WAVEL WOODCOCK**

Eski sa ki nou anvi war dan sekter piblik ankor Mr Speaker? Sa ki nou anvi war retournen dan nou pei Mr Speaker?

Mr Speaker, bal dan simityer en pake zafer. Pey en bann etranze Irlande sepa konbyen milyon ki Mr Speaker in *blackmail*, ki'n sezi kont plizyer bann biznes lokal Mr Speaker. Eski sa ki nou anvi i tournen Mr Speaker?

*Air Seychelles* pres pou faid Mr Speaker, gran mersi sa Gouvernman ki la atraver nou bann profesyonnel in ede sov sa *airline* *Air Seychelles* ki ozordi nou bann frer *Air Seychelles* ki pe travay *Air Seychelles* pa ganny met deor Mr Speaker? Re negosye det Mr Speaker?

Larzan proze lakaz Perseverance partou ki'n disparet Mr Speaker. Konbyen

milyon? Mr Speaker, mon pa krwar ki Lepep Seselwa i anvou retourn dan sa bann letan ankor. *Never*, zanmen ankor Mr Speaker!

Mr Speaker, zot pe koz lo profesyonnel nou bann *civil servant* e Mosyon Mr Speaker pe koz lo bann travayer sekter piblik.

Mwan, mon'n en travayer dan sekter piblik Mr Speaker koman en zofisyen migrasyon. Mon'n en ansenyan, mon'n travay dan Servis Sosyal, mon'n travay koman en *manager* pou proze komunikasyon dan Gouvernman Mr Speaker. Mon konnen ki savedir travay dan Gouvernman. I pa en louvraz fasil akoz ou pe *deal* avek dimoun.

Me nou koman en Lasanble responsab, menm si nou sorti dan nou reprezent *LDS* e se Ladministrasyon *LDS* ki la ozordi. I enportan Mr Speaker, pou nou fer en revi nou Gouvernman. Pou nou analize Mr Speaker, fer *critical analysis* en evalyasyon performans nou Gouvernman dan sekter piblik. E pou nou fer bann propozisyon lo kwa ki nou kapab fer pou amelyor servis dan sekter piblik.

Mr Speaker, mwan koman Onorab pou Distrik Grand Anse Praslin, mon'n fer en revi *over 8* an ki mon'n la dan sekter piblik. E mon

kapab dir ou Mr Speaker, e tou bann *MNA* ki sorti lo Zil Pros e menm lo Praslin, La Digue i kapab admet pou dir i annan en *massive improvement* dan sekter *public service* lo zil.

Mon kapab donn enn de legzanp Mr Speaker, ozordi en keksoz ki enportan pou travayer se en *working environment* ki *conducive*. Ler nou antre dan Gouvernman lamazorite bann lofis partou lo Mahe, Praslin, La Digue ti dan bann leta deplorab. E pou nou ganny sa bon servis i enportan ki bann fasilite enportan i ganny met an plas Mr Speaker, pou fer sir poudir ou travayer pe travay dan en lanvironnman *conducive*.

Ozordi nou'n war bann fasilite ki se bann leta deplorab nou war amenazman in ganny fer lo la. E bann nouvo fasilite in ganny fer, pou fer sir nou bann travayer i travay dan bann lanvironnman *conducive*.

Lo La Digue nou'n war lopital, i pa zis pou servis nou bann pasyan. Me osi i enportan pou bann travayer, bann ners, bann dokter ki travay dan sa lopital.

Plizyer landrwa bann fasilite lapes tousala ki *SFA* i baze ladan ozordi. Lezot fasilite ozordi ki pe ganny met annord pou ki nou bann travayer i war zot dan en

lanvironnman konfortab pou zot travay Mr Speaker.

Zot pe koz lo viktimizasyon Mr Speaker, ek nou pa ek nou? Mr Speaker, en keksoz ki nou Gouvernman in fer, ki prezidan in fer letan in antre dan Ladministrasyon nou *motto* sete "Sesel pou tou son zanfan."

Prezidan Mr Speaker, nou *Cabinet* pa'n fer parey *SPPF* ti fer dan lepase Mr Speaker. Prezidan in donn tou travayer sans e loportinite pou prouv zot lekor. E menm ozordi dan Ladministrasyon *LDS*, dan Gouvernman dizour ozordi Mr Speaker i annan en kantite bann dimoun kle. Menm *CC Member US* Mr Speaker ki pe travay dan bann pozisyon kle dan Gouvernman.

Mr Speaker, si ti *US* ki ti o pouvwar kote ou ti pou vwar sa Mr Speaker? Zot ti pou deor Mr Speaker, zot ti pou ganny pouse. *Security clearance* ti ganny servi dan lepase.

Mwan mon'n en viktim *security clearance* Mr Speaker en kantite nou lo sa kote latab, nou'n deza *share* nou leksperyans koman bann viktim *security clearance* Mr Speaker. Kantite nou Mr Speaker.

En kantite dimoun in pas ladan. Onorab Spiro boner in vini in koz lo *ah* ozordi i annan viktimizasyon ek nou pa ek

nou. Selman i ti en kandida dan dernyen eleksyon kont Onorab Sathya Naidu. Apre sa Mr Speaker, in en *DA* li selman. In en *DA* ki'n travay avek Onorab Sathya Naidu. Kot ou ti pou war sa anba *United Seychelles* Mr Speaker?

E mon fek pe get en pos la, kot Onorab Spiro ansanm avek Onorab Naidu, pe pas dan distrik pe anmenn *hamper* pou bann dimoun avek dezabilite, *sharing and caring* Mr Speaker.

**(APPLAUSE)**

### **HON WAVEL WOODCOCK**

I annan *DA* la, ki pe al met kandida pou *US* Mr Speaker. Zot in ganny pouse? I annan *DA* ozordi zot pe al *rally US*. Eski zot in ganny pouse Mr Speaker? Zot ankor la. Eski ou ti pou kapab fer sa anba en Ladministrasyon *SPPF/SPUP/US* Mr Speaker? Zanmen!

Ou ti pou fini anba en pon Mr Speaker. Ouswa ti pou dir ou *pack and go* ouswa ou ti pou war ou anba en rigol *somewhere*, parey zot *leader* ti dir.

Mr Speaker, mon ganny sa from en good source *Maison Du Peuple*, avek en dimoun laba. Si zot oule nou kapab fer zot ganny sa pti lenformasyon. Mr Speaker, *right now* ki pe arive *Maison Du Peuple*. Zot

deza pe diskit lo lalis bann dimoun dan Gouvernman sirtou dan bann pozisyon kle, ki zot pou pouse si *United Seychelles* i vin o pouvwar.

*(Interruptions)*

### **HON WAVEL WOODCOCK**

Bann direkter, *CEO, PS, DA* zot *Leader* Patrick Hermini in fini travay lo en lalis Mr Speaker pou lekel bann dimoun ki zot pou pouse an 2025, si ki zanmen pou arive si zot ganny elekte Mr Speaker. Zot in fer Mr Speaker, mon annan levidans. Mr Speaker, zot in fer Mr Speaker.

*(Interruptions)*

### **MR SPEAKER**

Silvouple.

### **HON WAVEL WOODCOCK**

Zot pou konnen byento.

### **MR SPEAKER**

*Hold on en moman. Sa Lasamble i bezwen fini en deba annord. Zot in ekout kanmarad. Zot in ekout kanmarad. E mon'n demann respe e kourtwazi. Kourtwazi savedir zot kontinyen ekout kanmarad. E sa ki pe pran laparol i ava fer son largiman, e i a met sa devan Lasamble e devan Lepep Seselwa.*

Silvouple redwir tapaz, redwir komanter, redwir kri

avek kanmarad. Onorab, prosede.

### **HON WAVEL WOODCOCK**

Lo sa lalis ziska *bodyguard* Prezidan i lo la sa lalis. Mon krwar tanzantan zot azout en nouvo non lo la. Zot pe koz Mr Speaker, sa Gouvernman depi ler in antre *in incest* dan bokou bann *civil servant*. Mon a donn dernyen legzanp, i annan en formasyon *leadership* ki fek ganny fer *UAE*.

26 nou bann profesyonnel dan diferan sekter ki enkli bann dimoun ki dan lepase in montre zot lapartenans politik, nou pa'n swazir zis bann ki siport *United Seychelles* ti ganny anvoye pou al fer en *high level Leadership training in UAE*. Ti napa triyaz, non, non sa pa anvoy li akoz i pa avek nou. Mr Speaker, nou Gouvernman in envestir dan devlopman plizyer nou bann profesyonnel dan plizyer sekter.

An plis ki sa, sa *result-based management* ki mon kontan ki Onorab Cosgrow ozordi in dir pou dir, zot ti annan lentansyon pou osi *rule out* en menm programm, ki ozordi zot pe koz kont Mr Speaker. Ki montre poudir zot napa en lanver ek en bon kote. Ozordi pe ganny enplimante.

E tou bann dimoun dan *management* dan *leadership*, dan tou bann sekter dan

Gouvernman, bann lazans bann MDAs in ganny *training* Mr Speaker.

Pou ou sanz en sistem 43an, ou pa pou fer li pou 1 zour, 1 zour pou demen. I pran letan pou sanz *mindset* en pep. Akoz zot si nou anvi tourn parey Onorab Cosgrow i dir retourn Sekter Piblik parey i ti ete avan, mannyer nou ti pou ete Mr Speaker? En kantite zenn, en kantite dimoun kapab ti pou ankor pe asiz se zot pe depan lo *welfare* olye al travay Mr Speaker.

Pa sa ki nou anvi Mr Speaker, nou, nou anvi ki tou dimoun i travay, i performen. Apre tou menm nou bann Manm Lasamble Nasyonal Mr Speaker, nou osi nou ganny evalye nou. Nou tou ki la dan sa Lasamble Nasyonal, bann ki apre pou prezant zot figir Mr Speaker parey Onorab Loze ki zanmen in deza prezant son figir lo en *ballot paper*.

Ki ozordi pe ziz nou. Se Lepep Seselwa *at the end of the day* ki pou ziz nou. Ki pou pran en desizyon lo nou pou evalye nou performans si nou travay, dapre lafason ki zot anvi nou travay. Nou tou *at the end of the day* nou ganny evalye Mr Speaker.

Prezidan osi i ganny evalye tou le 5 an Mr Speaker. Nou, nou pa anvi nou war nou Sesel i retourn dan en lepok kot ti annan gaspiyaz,

koripsyon, vol, mismanagement of fund kot bann fasilité Gouvernman se bann leta deplorab ki ozordi nou Gouvernman pe depans bilyon Mr Speaker pou re aranz sa bann fasilité Mr Speaker.

Mr Speaker, despite tou sa ki nou fer fas avek COVID pandan 2an, sityasyon ekonomik kriz ki nou pei ti pe fer fas avek Mr Speaker. Ki saler ler nou ti antre dan Gouvernman Mr Speaker, Kof Leta ti vid, kales ti'n kase. En pei parey en kales kase sa term ki nou dekrir Sesel leta ki i ti ladan. E saler pou bann dimoun bann travayer dan sekter piblik pa ti garanti pou 2021 Mr Speaker.

Me akoz bon desizyon fiskal nou Gouvernman Mr Speaker, nou'n nobou kapab refer sa pei, re ed sa pei debout lo son 2 lipye e garanti en saler pou tou bann travayer dan sekter piblik. E an plis ki sa Mr Speaker, nou'n nobou kapab donn en logmantasyon 10 poursan Mr Speaker, apre 2 an ki nou'n pas dan en kriz ekonomik, en kriz lasante.

10 poursan logmantasyon lo saler azout ansanm avek *allowance*, kan zot, zot ti anvi donn zis 5 poursan lo saler debaz. Nou'n al en pti pe pli lwen ki zot Mr Speaker.

*COVID menm si in anmenn bokou lapenn dan nou pei, ki'n tous bokou fanmir me en kantite keksoz ki COVID in anmennen.*

Enn, *COVID* in fors Gouvernman pou bouz nimerik. Pou nou ozordi Mr Speaker, bokou bann servis gouvernmantal in bouz *online* Mr Speaker. Kot ozordi ou kapab soumet ou taks *return online*. Kot ozordi nou sistenm imigrasyon pou pas ganny *clear* ler ou ariv *airport* i bokou pli vit. En kantite servis ou kapab gannyen *online*.

E menm promes ki nou Gouvernman ti fer dan nou manifesto pou desantraliz bann servis ki pe ganny donnen lo Mahe, lo bann lezot zil Praslin, La Digue Mr Speaker, bokou bann servis Gouvernmantal in ganny desantralize ozordi.

*SIB* in ariv Praslin, *IEA* lofis in ouver Praslin. *Land* avek *business registration* in ariv Praslin Mr Speaker. Pou anmenn servis pli pros avek nou bann dimoun.

Mr Speaker, i annan bokou, bokou bann travayer dan Sekter Piblik. I annan bokou travayer ki pe travay vreman, vreman byen Mr Speaker. Ler mon ti... zanmen mon pou bliye parol Ton Luc ler i ti dir mwan ler mon ti pou al debout pou Grand Anse Praslin, i ti dir mwan "Wavel,

ler ou vin Praslin pli gro *challenge* ki ou pou fer fas avek ki pou al pou bokou lannen se *issue* lanmar, *issue* gro lapli tonbe, delo monte."

Sa i bann *challenge* ki nou ozordi nou Gouvernman, mon apresye mon felisit *LWMA* pou sa travay ki zot pe fer pou fer sir *management* nou bann lanmar i bokou pli mye ki i ti ete avan. Kot bann lanbousir pe ganny debouse.

*Desilting* bann lanmar Mr Speaker, *SLTA* bokou bann semen pou plizer lannen. I annan en madanm i dir mwan 48 an i esper en semen pou ariv kot li Mr Speaker, finalman semen in ariv kot li Mr Speaker.

So, bokou bann novo semen pe ganny fer. Re sifras antye Praslin pe al ganny fer. In annan en retar la akoz lapli in tonbe, me byento travay pou kontinyen pou re sifras semen Praslin antye Mr Speaker ki pa'n ganny fer pou bokou lannen.

E mon felisit sa bann travayer ki pe debourye Mr Speaker ki pe fer sa bann travay. Mon dir zot en gran mersi, kontinyen.

I pa vedir ki tou keksoz i parfe, i annan bann defayans ki nou ankor pe sey aziste. Me nou pou aranze, nou fer sa dan 3 an ekek Mr Speaker. Me Mr Speaker, avek ankor 10 an, 15 an, 20 an *LDS* pou

kontinyen bouz sa pei pli devan.

US ti annan 43 an pou fer sa, zot in *fail*. Nou nou'n fer sa ki nou'n fer Mr Speaker dan 3 an edmi. Donn nou detrwa term ou ava war ki mannyer *LDS* pou bouz sa pei pli devan.

Mr Speaker, i annan en bann ki'n koze pe koz lo saler ki bann travayer dan sekter piblik pe viv lo la Mr Speaker, mon rapel plizyer bann *meeting* ki'n ganny organize ler Prezidan ti ankor *Leader Lopozisyon*. Mon rapel *FPAC* letan ti fer Linyon, i annan en madanm ki'n travay 30 an. 30 an Linyon lo en saler R5000 mil Mr Speaker.

Mon rapel ler mon ti al fer vizit dan mon kapasite koman *Chairman Komite* ki responsab Medya, Lazenes, Spor e kiltir La Digue ti annan en msye ti koz avek mwan ki travay avek *NSC* kot *Sport Complex La Digue* i dir mwan mon la pli ski 20 an mon lo en saler R6000 mil Mr Speaker.

Sa ti *ok* pou zot sa letan. La zot oule fer dimoun krwar lizour pou aswar, ki en sel kou mon pa konnen mwan zot vin promet en bann kalite promes Mr Speaker. Bann promes dan vid ki zanmen zot in kapab fer tou sa letan ki zot in la.

Mr Speaker, ozordi letap ki nou pei in arive i enportan Mr Speaker, pou nou;

1. Rekonnet bokou bann travay ki bann *civil servant* in fer. Sirtou pandan sa bann letan difisil ki nou pei in fer fas avek pandan *COVID*, le 7 Desanm, bann dezas naturel ki'n arive, linondasyon.

Mr Speaker, sa ki'n arive in prouv avek nou tou Lepep Seselwa an antye poudir nou annan bann travayer ki konpetan, kosto, kapab, kalib, dan Gouvernman ozordi. Akoz nou nobou kapab dil avek bann sityasyon difisil Mr Speaker, i pa bann keksoz fasil.

Leksplozyon Cascade, sa bann dezas. *COVID* i montre ou poudir nou annan bann profesyonnel, nou annan bann dimoun konpetan dan sekter piblik.

Kot Minis Finans, *Local Government*, dan tou sa bann sekter Mr Speaker. La kot SIA Mr Speaker, Lazans Lenfrastiktir mon vreman enpresyonnen avek sa ta proze ki'n demare.

La mon pe get Praslin, byento nou proze lakaz Mont Plaisir pe al komanse. Nou annan proze *micro enterprise center*. Nou annan proze lakot Ros Korbizo Amitie Mr Speaker. E plizyer bann proze ki pe vini.

Alor, nou pe diskit renovasyon lo bann facilite

NSC. I annan en kantite keksoz ki nou anvi fer, i annan bann dimoun konpetan, i annan bann dimoun ki kapab Mr Speaker. E si ou pe get ozordi Mr Speaker, sa ki mon apresye ek nou Gouvernman plizyer bann pozisyon kle dan Gouvernman ozordi, *CEO, DG, Direkter* partou, ou war bann zenn pe ganny loportinite pou okip sa bann pos Mr Speaker.

E mon apresye, mon kontan ler mon war en zenn i ganny apwente mon Mr Speaker. Olye ki ou toulstan war en dimoun, en Minis i la parey dan lepase nou'n war i vol en landrwa ou transfer li i kontinyen vole. Ou transfer li ou met li en lot landrwa ankor.

Kot en Minis i vini i dir ou koumsa i pe sonde avek lepep, i pa pou pran 'larzan *forgo*'. I pou *forgo* larzan, apre i pas par deryer i pran son larzan. Bann ki annan bann parol dan vid Mr Speaker, ki pa zanmen gard zot promes.

Mr Speaker, dan sa detrwa lannen en kantite keksoz in ganny fer par nou Gouvernman. E mwan mon dir mon apresye, mon dir mersi nou Prezidan. Mon dir mersi nou *Cabinet*, mon dir mersi tou sa bann zofisyel, tou sa bann *Civil Servant* dan tou nivo Mr Speaker.

Pou sa travay ki zot in fer ki ozordi nou pei Sesel in re debout lo zot lipye apre tou sa

defi, tou sa *challenge* ki nou pe fer fas avek Mr Speaker. Nou apresye zot.

E mon bezwen dir osi mon apresye mon bann koleg Onorab, akoz i pa en louvraz fasil Mr Speaker. I en louvraz difisil Mr Speaker, *ok*? E pa bokou dimoun ki pou vin devan pou li al debout dan en eleksyon, akoz zot konnen sa defi ki vin avek. Pa krwar i sitan fasil en. I pa fasil pou okenn *civil servant*, i pa fasil pou en Minis, i pa fasil pou okenn zofisyel dan Gouvernman Mr Speaker.

Akoz dimoun, parey nou tou nou konnen, i pa fasil travay avek. Me selman Mr Speaker, nou tou ansanm, nou vin ansanm nou travay ansanm akoz nou anvi ki nou pei i bouz devan.

E mon fer lapel ankor avek mon bann frer, mon bann koleg lo lot kote latab. Wi, i *ok* pou nou kritike pou nou opoze, me selman fodre nou sanz en pe nou mantalite.

Nou bezwen nou tou fer nou bout, pou nou ed nou pei bouz devan. Pa zis vini kraz tou keksoz. Sa ki byen nou dir i byen, kot i mal nou dir i mal. Nou aranze, nou adrese.

Parey sa Mosyon pe demande ozordi. I pe demann tou dimoun, i pe demann tou travayer dan Gouvernman pou azir dan en fason profesyonnel a tou moman Mr Speaker.

Tir politik dan travay, pa fer parey Mr Herminie ti dir fodre anmenn travay dan politik. Nou pe dir tir politik dan travay Mr Speaker. Tir ek nou, pa ek nou dan travay donn nou bann kliyan meyer servis posib. Sa ki nou pe demande, kontinyen sa travay.

Sa bann ki pa pe fer annou fer li Mr Speaker. E nou koman *MNA* osi annou ofer sa pli bon servis nou bann dimoun Mr Speaker.

DA, tou bann travayer dan sekter prive annou fer nou mye. Sa servis, mon osi mon mal, mal kot bann Biro Gouvernman mon ganny servis Mr Speaker.

I annan ki vin kot mwan pou gannyen servis, i annan ki al kot bann *MNA* pou ganny servis Mr Speaker. I aplik pou nou tou Mr Speaker. Annou donn sa servis ki nou dimoun i merite, a tou lenstans. Nenport ki sekter ki ou ladan Mr Speaker. Annou pa fer lapliferans.

e menm Mr Speaker, deza nou bann *MNA LDS* ki mannyer nou pe travay Mr Speaker, zanmen nou montre lapliferans. Nenport ki dimoun ki vin kot nou, dan nenport ki parti zot sorti Mr Speaker nou'n donn zot sipor, nou'n ed zot mannyer nou kapab.

**(APPLAUSE)**

### **HON WAVEL WOODCOCK**

Nou pa'n pini personn, nou pa'n target personn, nou pa'n viktimiz personn. E mon bezwen dir Mr Speaker, 2 tyer bann dimoun ki vin kot mwan pou vin rod lasistans, pou vin rod led Mr Speaker lamazorite zot se bann dimoun *United Seychelles* Mr Speaker. Akoz zot *trust* ki mon pa pou viktimiz zot, ki mon pa pou refize pou donn zot en servis Mr Speaker. E sa i lafason ki nou merit travay.

Me zot, retourn keksoz parey i ti ete avan 2020 Mr Speaker, *never again* Mr Speaker. E Seselwa pa zanmi anvi war en keksoz koumsa arive dan nou pei. E mwan mon asire, mon garanti ki an 2025 nou pou war ladministrasyon *LDS* ankor la.

E si zot pe fer atansyon avek sa kalite latitud Mr Speaker, *US* pou dezentegre Mr Speaker atraver bwat vote. Atraver vot Lepep Seselwa, personn pa pou ganny zet anba pon Mr Speaker.

Nou pa pou dir okenn dimoun *pack and go* Mr Speaker, akoz Sesel i pou tou son zanfan. Avek sa 2 mo Mr Speaker, mon dir ou mersi.

**(APPLAUSE)**

### **MR SPEAKER**

Mersi Onorab. Mon krwar in ariv ler pou nou pran en poz. I reste mwan 3 Manm, 4 Manm lo lalis. E Onorab William, Onorab Aglae, Onorab Larue, e Onorab Pillay. Donk, e apre *summing up* byensir i fer 5 entervansyon. Eski i annan okenn lot Manm ki le laparol avan mon ferm lalis? Onorab Georges? Sorry.

Non, non si ou oule laparol lev ou lanmen mon a note.

*(Interruptions)*

### **MR SPEAKER**

*Order! Order!* Onorab, zis lev ou lanmen si ou oule laparol.

### **HON BERNARD GEORGES**

Si Lopozisyon ti pe ekoute, mon ti'n dir mon'n lev mon lanmen pou demann laparol. Me mon pa bezwen, akoz nou bann Manm in koz telman byen e zot, zot in fer telman malpropte lo sa Mosyon ki mon pa bezwen koze.

***(APPLAUSE)***

### **MR SPEAKER**

Ale nou a pran poz nou a repran deba 4 er 10. Mersi.

***(BREAK)***

### **MR SPEAKER**

Bon. Nou a termin deba avek sa 4 Manm ki mon'n

mansyonnen. Onorab William, ou annan laparol.

### **HON WAVEN WILLIAM**

Mersi Mr Speaker. Bonn apre midi tou dimoun ki a lekout. Mr Speaker, mon pou lir sa Mosyon parey in ganny ekrir. Akoz ou a krwar poudir en lot Mosyon pe ganny antre lo kanpanny eleksyon 2025 ki pa leka. So, mon a lir sa Mosyon.

Lasanble Nasjonal i felisit tou travayer servis publik ki pe fer zot travay byen e konsyansyezman pou benefis pei. E demann avek lezot pou travay e pou azir dan en fason profesyonnel a tou moman, e donn zot kliyan meyer servis posib ek bi pou retenir pou retir fristrasyon e ed nou pei avans devan Mr Speaker.

Mr Speaker, pandan letan ki mon pe ekout deba, e mon a dir ki mon remersye Bondye ki in donn zonm ek fanm lentelizans e osi met a zot dispozisyon pouvwar osi sa bann eleman lasazes avek pridans an mezir ki fanm ek zonm i devlope dan lavi. Mr Speaker, kestyon ki mon'n demann mon lekor se ki eski sa Mosyon i dan lentere nasjonal.

Eski sa Mosyon i benefisyab Mr Speaker? Dan lavi anba lesyel tou i posib. Me eski tou aksyon i benefisyab? Eski sa Mosyon i konstriktiv Mr Speaker? Eski sa Mosyon i

annan en karakter lasazes avek pridans?

E Mr Speaker, eski sa Mosyon i neseser pou vini e anmennen par en lot brans gouvernans, sa se Lasanble Nasyonal, avek bi Mr Speaker mon asire pou inifye e sansibiliz pep Seselwa ver soustenabilite son prop legzistans pou zenerasyon apre zenerasyon Mr Speaker.

Mr Speaker, mon'n komans koumsa, akoz mon pe vwar ki koman en Manm Parlman nou rol se pou fer *oversight* lo travay Gouvernman. Vot Bidze, anmenn kestyon kot nou santi poudir i annan konsern e osi bann Mosyon. Ki mon asire sa Mosyon ki'n ganny anmennen par Onorab John Hoareau, Mr Speaker, i dekoul dan bann vizit ki tou bann Manm Onorab pe fer dan bann distrik.

Mr Speaker, mon'n ganny sans partisip dan *meeting* piblik ki Prezidan ti fer dan Grand Anse Mahe osi ekoute. Bann *meeting* in ganny fer dan bann lezot distrik konsern e swe pep Seselwa.

Mr Speaker, mon'n ganny sans osi al fer *blitz* dan 6 distrik Mr Speaker. E lafason ki mon pou koze Mr Speaker, i reflekte kwa en pti pe ki nou pep letan zot in met nou dan sa pozisyon zot

ekspekte en pti pe avek nou vizavi gidans. Vizavi i annan lespwar pou lavenir.

Mr Speaker, letan mon get lot kote letab mon war poudir i annan 3 Manm ki ti ansanm avek mwan lo Komite Santral. Mr Speaker, en ta keksoz in ganny dir ki pa reflekte sa realite vreman ki zot pe koze.

Mr Speaker, mon kapab servi mon lekor koman en legzanp akoz tou dimoun dan pei ki'n pas atraver bann diferan viktimizasyon, zot annan zot prop zistwar.

Mr Speaker, be sa ki mon kapab dir se ki ozordi, ouswa depi ler *LDS* in vin o pouvwar, zanmen mon'n ganny en kout telefonn pou rod *security clearance* lo enn mon frer e ser travayer dan distrik Grand Anse Mahe, pa'n zanmen arive.

**(APPLAUSE)**

### **HON WAVEN WILLIAM**

Mr Speaker, en Onorab lot kote in dir ki ozordi zot kapab koze Mr Speaker. Ler mon get mon ka pou mwan, Mr Speaker, letan ou ti pe koze e dir sa ki pep pe anvi tande, i anvi vwar. Mon ti ganny demande Mr Speaker. pou demann pardon e ki mon pa pou al dir ankor sa bann kalite keksoz ki mon pe dir. E mon ti ganny sispann Mr Speaker

pou sa. Akoz? Akoz Mr Speaker, mon pa ti oule *forgo* mon drwa koze.

**(APPLAUSE)**

### **HON WAVEN WILLIAM**

Mr Speaker, sa Mosyon i enportan Mr Speaker. I enportan akoz sa Mosyon parey lot kote pe dir i pa vedor ki tou travayer dan pei i pa pe travay. Mr Speaker, si ou get konteni sa Mosyon parey mon'n dir i reflekte dezir e swe sa pep vizavi servis ki i pe gannyen.

E i pe demann ek sa pti group ki dan en fason ou lot Mr Speaker, pa pe donn parey sa mazorite ki pe travay. E la mon pou osi dir la, parey Mosyon in dir mon osi mon felisit Mr Speaker, tou bann travayer dan servis publik akoz zot ganny rekonnet koman fasilitater Mr Speaker.

E fasilitater ki sekter prive ki loter lekonomi pe eksepte en bon servis an menm tan lamazorite pep Seselwa.

Mon osi profit lokazyon pou felisit tou bann travayer dan sekter prive Mr Speaker. Me selman mon bezwen rekonnet poudir letan mon pe koz lo sa Mosyon i osi reflekte lo mon travay koman en travayer Seselwa pou mwan osi evalye lafason ki mon pe travay.

E mon asire ki dan tou bann pozisyon depi pozisyon Prezidan, Minis, PS ensidswit.

Mesaz pe ganny anvoye, se ki nou evalye nou performans pou vvar si vreman nou pe delivre parey nou responsabilite i demann nou.

Mr Speaker, pou devlopman en pei Mr Speaker, letan nou pe koz Gouvernman pa zis Prezidan, Minis, PS. E Gouvernman i form parti tou dimoun akoz pou met en Gouvernman o pouvwar se pep Seselwa. Pep Seselwa e dan tou bann lezot nasyon, se pep ki met en Gouvernman o pouvwar.

E Mr Speaker, sa Mosyon pe koz menm si i pe dir Gouvernman. Me nou, nou pe dir Gouvernman i tou dimoun. E sa Mosyon pe koz avek tou Seselwa dan pei Mr Speaker.

Mr Speaker, pa oublie pou dir nou annan en group lazene deor la ki pe vin dirizan demen. E si sa Mosyon ki parey byen, ki paret konstriktiv isi dan sa Lasanble nou pa kapab ini lo la Mr Speaker.

E mon asire si pep ki pe ekoute la deor, ki tann ki mannyer sa Mosyon in ganny fraze, Mr Speaker, zot pou dir pou dir be Lasanble i annan en problem. Pa lo kote mazoriter, me lo kote Lopozisyon ki zot.

Letan nou pe koz *nation building* Mr Speaker, si ou get depi apre eleksyon in fer bann aksyon ki Lopozisyon koman en group zot in anmennen kolektivman Mr Speaker pou derout sa Gouvernman lo demars ki pe fer pou remet lekonomi Sesel lo son lipye.

Zot in sey tou Mr Speaker, pou derout sa Gouvernman. Me Mr Speaker, mon kontan ki nou bann dirizan pa'n ganny deroute. E pep Seselwa dan son mazorite in solider pou fer nou ariv kot nou ete ozordi.

Mr Speaker, mon pou dir ki wi i annan sa nesesite sirtou avek lafason ki lemonn bann *challenges*, bann lenfliyans ki lemonn pe fer fas avek ki pou enpakte lo lavenir Sesel son soustenabilite, si pep pa ganny sansibilize e edifye. E ganny direksyon ki mannyer i pou ale vizavi son responsabilite, koman sa sitwayen e travayer vizavi kreasyon larises.

Pa zis pou pei, me pou li e konpran dan ki konteks Mr Speaker. Akoz ozordi nou tant pou zeneraliz keksoz. Me nou bezwen get dan konteks. Nou bezwen pran kont konteks ki letan sanzman gouvernman in arive ki mannyer sityasyon pou ete Sesel.

Wi, mezir in bezwen ganny pran. E serten bann benefis i bezwen ganny rewvar

e retire Mr Speaker. Ziska ler ki nou arriv en fason soutenab.

Mr Speaker, nou tou nou konnen poudir Sesel li tousel pa depan lo li menm. Sesel i enter konekte avek larestan lemonn. E pti Sesel Mr Speaker, si son bann dirizan e pep li menm li pa pe swivre ki pe arive Mr Speaker. Lavi dan nou Pti Leta Zil ouswa nou leta gran losean Mr Speaker, i pa pou fasil.

Mr Speaker, e la mon ti a kontan met devan serten bann rekomandasyon Mr Speaker, atraver sa Mosyon ki mon krwar poudir i enportan.

Akoz nou pa zis koze, me an menm tan vvar ki fason nou kapab enfliyans serten bann aksyon avek desizyon.

Mr Speaker, mon rekomande ki dan servis publik atraver tou bann Lazans Gouvernman Mr Speaker, zot fer sir ki travayer i konn son vre rol e son responsabilite Mr Speaker.

Mr Speaker, si ou pa konn ou rol. Si ou pa konn ou responsabilite i pou difisil pou donn e delivre sa servis, ki sa pozisyon i demann ou pou fer. Mr Speaker, sa nesesite osi ki bann zofisyen dan *human resources* Mr Speaker. Se zot ki annan en rol kle.

La mon a dir mon pa pe kritik zot dan en fason mal apropos. Me mon pe zis donn en pti pe gidans ki dan sa

bann *unit* bann diferan lazans, zot pou bezwen zot osi konnen e konpran.

Letan nou pe dir *team building* nou pe fer *capacity building* Mr Speaker, i pou enportan ki travayer i ganny swivre. Travayer i konnen lo kwa i pe ganny evalye pou son epanouisman. Mr Speaker, akoz si sa pa ganny fer byen si sa komunikasyon sa *team building* pa pe marse Mr Speaker, pou napa *job satisfaction*. An menm tan, i pou annan dekourazman.

E dezyenmman Mr Speaker, i enportan ki nou vwar osi an lasenn servis sa laspe delegasyon Mr Speaker - *delegate*. Akoz si sa pe ganny fer byen Mr speaker, i annan serten bann dimoun ki dan diferan responsabilite. Kot ler ou pa'n *delegate*, i annan serten desizyon vit ki bezwen ganny pran, menm si pli tar ou a ganny *copy*. Me aksyon i ganny retardé, akoz sa *delegation of powers* ouswa responsabilite pa'n ganny fer ase apropriye.

So, i annan sa nesesite dan sa lasenn servis, pou nou vwar en pti pe dan sa mayon, eski sa laspe *delegation of word* pe ganny fer byen Mr Speaker.

Mr Speaker, mon osi pe demande ki dan Servis Piblik osi nou vwar en pti pe bann fason fer. Par egzanp si en

dimoun ki responsab i enplike dan en ta *meeting* Mr Speaker, me ki pa *pass on* responsabilite. E i pou fer ki keksoz i kapab ganny retarde Mr Speaker. E desizyon vit pa pou kapab ganny pran.

Mr Speaker, i enportan ki tou sa mayon lasenn servis piblik i ganny vwar pou fer sir ki bann mayon ki fay Mr Speaker i ganny ranforsi, pou fer sir ki pep Seselwa ki pe esper sa servis Mr Speaker i pa pas an pasan dan sa lasenn. Me i ganny tenir par sa lasenn. E i ganny sa servis ki i pe ekspekte.

Mr Speaker, i annan en ta keksoz ki mon kapab koz lo la Mr Speaker. Me mon krwar le pwen in ganny fer. Me sa ki mon kapab dir ki letan ti annan sanzman Gouvernman dan mon lespri, baze lo leksperyans politik 29 an Mr Speaker, 24 an lot kote. Lafason ki keksoz in deroule, e lafason ki ou lespri ti pe fonksyonnen kestyon ki vin dan mon lespri se; eski sanzman Gouvernman i pou fer ki ladministrasyon pou mars efikasman?

Akoz ler ou regarde Mr Speaker, se ki parti ki'n sanze pou vin dan gouvernans. E parey Onorab Depite Speaker in dir taler, se ki tou bann lezot travayer i reste lanmenm. Zot pa'n ale Mr Speaker. Me eski ozordi letan nou pe koz lo

servis piblik nou pou blanm Prezidan, Minis ouswa nou pe get li dan son totalite Mr Speaker?

E mon a dir ki wi i annan en bann akoz letan ti annan sanzman, ti ganny dir *Maison Du Peuple* ki kontinyen fer politik dan travay. Mr Speaker, letan ou dir sa, letan ou dir sa Mr Speaker, sa i *vast*. E dimoun i kapab servi sa dan diferan fason pou li enn;- met retar akoz Lopozisyon ki ankoler akoz zot in perdi pouvwar.

Ozordi zot dezespere akoz *blitz* pe ganny fer par LDS Mr Speaker, pe fatig zot en kantite. E Mr Speaker, Mr Speaker, i pa drol ki dan bann lavenir la ki pe vini ziska lannen 2025, nou pa pou ekspekte keksoz konstriktiv sorti lot kote latab. Nou pa pe ekspekte zot pou siport nou dan demars ki nou pe fer pou ini sa pep.

E sa pozitivite ki nou pe rode Mr Speaker, nou pa ekspekte ganny sa kot zot Mr Speaker. Mon pou klarifye mon lekor Mr Speaker. Letan mon'n ekout zot koze la, lo kote laz pansyon. Mr Speaker, Prezidan ti vin anndan isi la pou eksplike. Se bann teknisyen ki ti vini, e i ti donn bann rezon akoz ki nou ti vwar Lopozisyon pa ti enterese avek sa zot. Zot ti *walk out* Mr Speaker.

Me i pli fasil pou kritike Mr Speaker, olye ki vin dispit avek bann profesyonnel. Ou vvar le vre rezon akoz ki nou bezwen bouz dan sa direksyon Mr Speaker.

Mr Speaker, lot kote i byen konnen poudir larestan lemonn bann gran pei devlope. E Sesel i en pti pei avek pe resours zot in deza pe bouze Mr Speaker. Laz in monte.

Me parey mon dir si nou krwar poudir Sesel izole li tousel i pa enter konekte e vvar ki fason keksoz pe ganny fer ki fason bann lenpak ekonomik i kapab afekte nou, afekte lavi Sesel. E si sa Gouvernman dizour ki la Mr Speaker, i pa kler vwayan, i pa azir ek lasazes, i pa azir avek pridans Mr Speaker.

Koman en Pti Leta Zil, si nou pa inifye nou pep, sansibiliz nou pep e fer zot konpran sa bann realite Mr Speaker. Olye anmenn zot pou viv dan bann rev Mr Speaker. I pou dan en fason irresponsabilou nou par Mr Speaker.

E lo sa *note* Mr Speaker, mon pou dir Onorab John Hoareau mon krwar poudir Mosyon a sa moman la i bon, i byen, i positif, i konstriktif e benefisyab. E mon santi poudir i pe sansibiliz nou pep deor la.

I pe inifye zot, ed zot pou asize mazinen e kalkile ki zot pou fer vizavi zot prop dibyen

an menm tan dibyen pei. Mersi Mr Speaker.

**(APPLAUSE)**

### **MR SPEAKER**

Mersi Onorab. Laparol pou Onorab Egbert Aglae.

### **HON EGBERT AGLAE**

Mersi Mr Speaker. Mon a dir bonn apre midi tou dimoun ki a lekout. E tou Manm Onorab. Mr Speaker, mon'n ekout plizyer entervenan lo lot kote latab ki'n koze depi bomaten e la apre midi. Mr Speaker, mon oule dir ki atraver ou dernyen entervenan ki'n koze i ti en Manm dan nou parti.

Ozordi mon war li pe zwe en kart viktim. E nou tou nou konnen, tou aksyon i bezwen annan en reaksyon. E tou parti, ouswa tou lorganizasyon i annan en nivo disiplin e tolerans dan sa ki ou fer atraver son prensip.

Me Mr Speaker, mon konnen poudir Onorab konpare avek bokou nou ki la lo sa latab in byen etablir li anba nou parti.

E mwan mon parol ki mon annan pou mwan dir, mon anvi dir se ki sa ki'n arive letan in dan nou parti. Si in ganny en problemm ek en dimoun dan nou parti, sa ki mon anvi dir li sete ki pa parti antye ki ti kont li. E mon dir li

osi pou pa repet menm fot dan sa parti kot i ete ozordi.

**(APPLAUSE)**

### **HON EGBERT AGLAE**

Mr Speaker, Mosyon ki devan nou en kantite in ganny dir. En kantite in koz apre 2020 letan Ladministrasyon LDS in pran pei ki mannyer i ti ete. E osi mon krwar nou bezwen konpran en pti pe listwar ki mannyer nou'n ariv kot nou ete ozordi.

Mr Speaker, mwan mon rapel byen mon pa ti ankor antre dan politik mon ti ankor pe lekol.

Bokou koze, bokou kritik ti ganny dir lo servis publik. Dan lepase anba Gouvernman Lepep, anba Gouvernman *SPPF* e anba Gouvernman *US*. Pei an 2008 ti pas avek kriz finansyel ekonomik, ti bezwen war li antre anba en programm reform. E 10 an apre mon kapab dir Mr Speaker, 2018, 2019 avan *COVID* i frap nou lemonn *IMF* ti fer resorti ki Sesel ti'n ariv lo son *peak* ekonomik.

Sa letan nou *GDP* ti \$16 mil par tet abitan. Ozordi anba *LDS*, zot pe seye. Zot ankor 13 mil, Sesel i \$13 mil, zot pa ankor arive lo sa pik ki nou ti anmenn pei. Nou'n reisi 2008 tir pei kot i ti ete, anmenn li lo en nivo ki ti ganny rekonnert mondyal. Sa i en lakonplisman

ki nou koman en parti nou ti fer.

**(APPLAUSE)**

### **HON EGBERT AGLAE**

Zot ou le koz lo 43 an, be les mwan dir zot poudir ozordi zot pli gran pwen feb ki'n anmenn zot kot zot ete se ki zot in pri dan 43 an. Akoz mon pou dir sa Mr Speaker? Ou konnen, letan Mr Prezidan Faure ti pran labar in rod tou fason pou demokratiz nou bann sistenm modern ki ti'n ganny etablir dan pei.

In sey anmenn en inifikasyon, en linite atraver Servis Piblik tir bann enklizyon ki tou dimoun ti annan menm drwa. Zot ti kapab koze, zot ti kapab fer zot lamars Seselwa ti lib pou partisipe. Me zot sa letan zot ti dan Lopozisyon Mr Speaker, pou zot sa pa ti bon. Zot ti le entel *out*, lot *out*.

Letan zot, zot in ganny pouvwar Mr Speaker, ki nou, nou war ki zot in fer sirtou avek Ladministrasyon Piblik e pep Seselwa? Zot in vin kas tou bann bon keksoz, se akoz pa zot ki ti fer. Kas tou, tir tou lamazorite bann sipor sosyal ki ti egziste ki fer ki pep Seselwa ozordi i annan plis mandyan anba zot *watch* ki letan nou, nou ti o pouvwar.

**(APPLAUSE)**

### **HON EGBERT AGLAE**

Pep Seselwa i annan li en desizyon pou li pran Mr Speaker. Akoz kot ou pase partou mon osi mon'n fer letour dan bann distrik. Mwan osi mon al fer bann *blitz* parey zot, zot fer. I annan en gran diferans ant 2016 letan mon ti pe konpanny e sa ki mon pe war ozordi. Ozordi nou pe ganny akeyir avek pep Seselwa devan zot laport.

**(APPLAUSE)**

### **HON EGBERT AGLAE**

Pep Seselwa i pare pou *call* ou, pou ekout ou. Konpare sa ki mon war lo zot kote letan zot ale zot al selektivman kot zot bann dimoun. I montre poudir *LDS*, zot dan en gro, gro problem. Mon pa pou dir sa mo mwan, mon konnen zot dan...

Mr Speaker, pep Seselwa i leve bomaten i al travay akoz i konnen i annan en vant pou li sonnyen. I annan zanfan, i annan bil, i annan son *loan* e osi i annan son *wish* ki i ti a kontan *achieve* dan son lavi, son rev. Ki swa son lakaz, rod en bout later, agrandi son biznes, donn son zanfan en meyer ledikasyon.

Me ozordi, bokou pep Seselwa malgre i pe travay i pa pe war sa kapab arive. Akoz sa ki i pe gannyen ozordi i pa ni

menm ase pou ariv menm le 15. Lontan nou ti dir le 15, me ozordi letan i dir ou lafen dimwan le 1, le 7 ou'n fini larzan in fini. Letan i al tap laport pou li ganny en led sa menm travayer ki leve ki travay dan Servis Biblik ki pran en prosedir long. Zot al foy dan tou trou partou ek ou, pou gete ki ou annan.

Zot blyie poudir ou'n travay *for so many years* dan en servis biblik byensir ou'n met en pti sou akote. Si i war en pti 25 sou lo ou kont, i dir ou annan larzan ou pa merit kalifye pey ou *carer* ou menm.

San realize poudir be sa pti fon ki mon annan si wi mon pey mon *carer* mwan menm, letan i pou'n pas 1 an pou napa. Eski ou pou donn mwan *carer* apre? Zot en bann move, move dimoun.

**(APPLAUSE)**

### **HON EGBERT AGLAE**

Mr Speaker, mwan mon'n travay dan Ladministrasyon Biblik. Mon'n fer 7 an dan Minister Lasante, mon'n fer 5 an anba *Local Government*. Mon konpran ki mannyer ladministrasyon i marse mwan. Mwan mon kestyon se eski bokou zot i konpran ki mannyer en Ladministrasyon i fonksyonnen? Mon war bokou pe tat tate dan fernwar, mon war larealite Mr Speaker.

Ozordi sa birokrasi e pran letan i plis ki zanmen i egziste. Mon a donn bann legzanp senp. I annan en lakaz fek brile Port Glaud Mr Speaker, larantre fek arive. Nou koze nou dir sa bann dimoun i pou bezwen en lasistans pou zot kapab sirtou i annan zanfan pou refer. I annan pe al segonder rod liniform, rod zot bann keksoz ki zot in perdi.

Mr Speaker, i fer plis ki 3 semenn pe al lo 1 mwan naryen lasistans pa ankor gannyen. Mwan mon tap laport, mwan menm mon personnelman mon'n ede. Letan mwan mon ti *DA*, in arive lensidan. Nou Gouvernman dan lespas 10 zour in fini asiste sa fanmir pou kapab re debout.

Wi, presizeman mon kapab dir wi 3 zour akoz from *DA*. Lefe ki sa lensidan i arive, i annan serten kontak ki ganny fer pou gannyen pti off front pou kapab soutenir ou an esperan rapor Lapolis e rapor Firemen apre ou ava ganny bann lezot lasistans. Eski sa zot pe dir nou efikasite? Eski sa ou pe dir nou zot pe byen travay?

*(Interruption)*

### **MR SPEAKER**

Ya. Bann Manm silvouple, zot pe fer paryaz dan deranz Lasanble.

**HON EGBERT AGLAE**

Mr Speaker, zot in koz lo *performance-based budgeting* Mr Speaker. Annefe, sa ti en komansman ki nou Ladministrasyon ti komanse. E zot in tay ek sa e mal kri sa prodwir, zis pou kapab fer serten enplimantasyon baze pou zot kapab koup 13enm mwan saler nou travayer. Ki annefe Mr Speaker, letan ou pe regarde sa lenplimantasyon mon kapab dir in *fail* dan li menm parti.

E se sa ki Onorab Loze mwan mon pou siport li poudir letan nou vin o pouwvar 2025, 13enm mwan saler pou retourn parey sipoze ete.

**(APPLAUSE)**

**HON EGBERT AGLAE**

*Performance-based budgeting* Mr Speaker, tou sa bann *long service allowance* pou retourn parey i ti ete. Mr Speaker, letan zot pe koz politik dan gouvernans, politik dan ladministrasyon, politik dan *decision-making* Mr Speaker.

Be mwan sa ki mwan mon'n war larealite, se ki politik in ganny zwe dan diferan fason dan pran desizyon pou ed Lepep Seselwa, ma kalifye ou dir

*substantiate* Mr Speaker. 24/24 i donnen Port Glaud Mr Speaker, 16 *unit* in pare ti nou prodwir sa wi. Dan sa 16 *unit* Mr Speaker, 8 dimoun Port Glaud ki ti deza la akoz ti en re devlopman. Savedir *existing tenants* i sipoze priyorite pou li kapab ganny landrwa la pou retournen.

Zis 8 dimoun Port Glaud ki gannyen, e apre nou war 8 aktivis *LDS* i ganny lakaz.

**(APPLAUSE)**

**HON EGBERT AGLAE**

Lekel ki ti *chair* Komite? Vis-Prezidan Afif.

**(APPLAUSE)**

**HON EGBERT AGLAE**

Atraver ou Mr Speaker. Eski la nou pe koz nou ek nou pa ek nou? Pa egziste?

*(Interruption)*

**MR SPEAKER**

Eh, silvouple! Onorab Woodcock, Onorab Larue, Onorab Porice, Onorab Pillay, Onorab Loze silvouple, silvouple, silvouple gard zot komanter pou ler zot koze silvouple. Mersi.

**HON EGBERT AGLAE**

Mr Speaker, zot pe pran en pe mon letan, mon pou kontinyen mon pou retourn lo Mosyon. Si

ou anvi enpir travayer dan Servis Piblik i bezwen lenspirasyon e vizyon i bezwen sorti anler, kot Egzekitiv kot latet. Be ler latet li menm li i maltret *cleaners*, ki lenspirasyon ou anvi donn servis piblik?

Tou travayer dan en lorganizasyon i annan son valer akoz bomaten ler ou vini si landrwa pa prop *cleaner* ki netwaye, ou pou travay dan en kondisyon lanvironnman sal. Konmsi, me nou devret promote, valoriz zot Mr Speaker. Pou zot kapab kontinyen performen. Be ek performans osi la, i vin avek son *incentives* Mr Speaker.

Oule dimoun i donnen, i kontinyen donnen, i reste apre ler, i pran menm travay son *file* i anmenn kot li konmsi zis pou *get things done*. Be letan i arriv pou son promosyon ou donn li, ou donn etranze? Letan pou li monte pou ganny ankor en pti R1000 lo la ou sant li zistwar apre zistwar. Be ki lankourazman i annan?

Eski nou pe valoriz sa bann travayer? I pe arive ozordi sa ki mon pe dir, mon pa pe koz lalang mwan. Mr Speaker, letan nou dir valoriz travayer me selman anba *PPPB* ou pa donn li resours pou li *meet* son target. Eski ou ekspekte sa travayer pou donn delivre sa ki zot in met li

koman priyorite? I pa pou achieve.

Ouswa letan ou pran sa ki ti sipoze 3 travayer fer ou donn en sel dimoun pou fer, swa pou pini li, ouswa pou fer li ale apre ou dekouraz li dan son travay.

Eski sa *its unfair*? Letan ou war bann departman letan i fer *mid-year review* plizyer milyon pa kapab depanse *unable to recruit*. I responsabilite lekel? Pa sa travayer, li i pa fer *recruitment* li, li in vin travay. Se sa bout ladministrasyon, *management* ki tonm dan sa bann kad pou fer *recruitment*.

I annan landrwa mon konpran petet nou napa ekspertiz. Me oule dir mwan tou sa bann pos *unable to recruit* i baze lo napa ekspertiz Sesel? Kan plizyer Seselwa mon konnen i kalifye ki kapab vin fer sa bann louvraz. Sa ti ava ede tir presyon lo sa bann ki deza la. Zot ti ava konsantre plis lo sa ki zot sipoze pe fer, e fer keksoz pli bouze. Se sa ki ou tande, apre fristrasyon.

E menm Prezidan i monte dan son ladres i dir i fristre. Be si Prezidan i fristre be son pep ki pou fer?

**(APPLAUSE)**

### **HON EGBERT AGLAE**

Konmsi mon demann mon lekor bann kestyon ennler e

analiz sa bann keksoz parey Mr Speaker. Se sa ki nou dir, e Prezidan menm ki dir *the bucks stop* sa ki anler. Si dan en departman i *stop* ek sa Minis.

Me parfwa mon demann mon lekor kestyon se; eski sa bann Minis mon pa dir pa tou mwan en i annan ki ou *email* zot i reponn ou. I annan pou *WhatsApp* zot i reponn ou, i annan ki ou *call* zot, zot reponn ou *call* ouswa son *PA* apre i *call* ou. I annan enn de Minis.

Me i malere pou dir i annan i anvoy ou merd. Zot pa reponn.

### **MR SPEAKER**

Vey ou langaz Onorab.

### **HON EGBERT AGLAE**

Mon pe vey mon langaz. E apre letan mon met kestyon lo *Order Paper* pou zot vin reponn kestyon, akoz si ou ti'n reponn mwan mon ti napa nesesite vin met kestyon lo *Order Paper* mwan. Ou ti pou'n fini dir mwan, mon ti pou'n ganny lenformasyon.

Me ler ou vin la anndan, ou le vin reponn mwan dan en fason *sarcasm* politikman, kan mwan mon'n fer mon *homework* Mr Speaker, avan mon vin demann ou en kestyon.

Letan en Minis i vin dir mwan poudir *fencing* in fini

komanse, in fer plis ki 1 mwan larantre, vakans in vini, vakans in fini ni en fil pa ankor bouze lo sa bann *fencing*.

Letan en Minis i vini i dir nou, nou pe koz efikasite dan servis piblik la. Napa problemm *ice*, selman apre peser lo *Facebook* nou pe war partou pe anvoy leukri poudir i annan en problemm.

### **MR SPEAKER**

20 minit Onorab, *plus* 1 pou lenteripsyon.

### **HON EGBERT AGLAE**

So, Mr Speaker...

### **MR SPEAKER**

Konklir *please*.

### **HON EGBERT AGLAE**

Mon pou konklir koumsa mwan. Mwan pou mwan mon pou kit sa refleksyon ek pep Seselwa. Pep Seselwa i bezwen deside, si i anvi en Gouvernman ouswa i anvi reste ek en Gouvernman 2025 ki'n vini in pran tou son benefis sosyal. En Gouvernman ki'n koup tou son *part rental*. Ki'n fer ou retourn kot ou manman.

En Gouvernman ki'n ede pou ou biznes frenmen. En Gouvernman ki ler maler i arive, parey Cascade la 5 mwan apre plizyer lakaz pa ankor kapab repare. En Gouvernman ki vin ek en bann

proze ki pa transparans kot ou ganny zis kontra pe ganny donneen tord atraver. E bann peyman ki sistenm pa kler.

En Gouvernman ki pe demann, la sa ki fermal ankor i annan paran pe konplent. Demann bann etidyan liniversite pou al pran en *loan* pou finans son letid, i pa ankor ni travay, i pou annan li en det R500 a R800 mil lo son latet. En Gouvernman kot lazenes pe konplent ozordi ki napa aktivite sportif. Zot in *fail* an lalit kont drog, e zot pe *fail* bann adikt dan zot reabilitasyon.

### **MR SPEAKER**

Konklizyon silvouple Onorab.

### **HON EGBERT AGLAE**

Eski zot en Gouvernman? So, Mr Speaker, pep Seselwa i bezwen deside. Eski i anvi en Gouvernman ki pou kontinyen fer pri lavi monte? Pou kontinyen takse li dan son fason ki pou fer zot lavi malere. Mr Speaker, mon krwar pep Seselwa in war kler in nepli dormi boner. Mersi bokou.

**(APPLAUSE)**

### **MR SPEAKER**

Mersi. Onorab Larue, ou annan laparol.

### **HON FLORY LARUE**

Mersi Mr Speaker. Bonn apre midi Mr Speaker. Mr Speaker, annou retourn en pe lo Mosyon parey Onorab Waven ti pe dir taler. Annou *focus* en pe lo bi sa Mosyon. E nou pe koz prensipalman lo servis piblik. E ki mannyer nou koman en pep nou benefisyé atraver sa bann servis ki nou gannyen.

Mr Speaker, nou annan en popilasyon 100 mil Seselwa. E nou vwar ki preske 10 mil dimoun dan nou popilasyon i travay dan servis piblik. Avek sa kalite poursantaz Mr Speaker, nou vwar ki nou depan lo bokou nou popilasyon pou nou bann servis ki nou gannyen. Dan lepase Mr Speaker, en travayer Servis Piblik ti pran en lanplwa dan Sekter Piblik koman en karyer lavi diran.

Mr Speaker, nou tou nou'n zwenn en dimoun dan sa servis. Letan nou ti ne, nou ti zwenn ners ek bann dimoun ki travay lopital. Anmezir nou'n grandi nou'n pas atraver en *teacher*. E lamazorite nou zanfan i lekol dan en lekol piblik. Nou'n zwenn bann zofisyé lapolis, ki menm si parfwa nou pa rankontre zot direkteman i pe fer son travay dan lakominote pou gard nou kominote an sekirite.

E aswar nou konnen si i annan en lensidan, nou kapab fer en lapel avek nou Servis

*Fire Brigade* si i annan bann aksidan. Mr Speaker, letan nou koz lo sa parol servis i annan plizyer nivo. I annan sa nivo lakey, letan ou premye rankontre en dimoun. I annan sa fason pandan sa kontak pou ganny trete. E i osi annan sa servis lo kote sa tranzaksyon ki ou pe rode letan ou al dan en tel biro koman en finalizasyon.

Nou isi Sesel, nou Servis Piblik i ganny ansarz par Mrs Mohideen ki ti pran lofis koman *Sef Public Service Bureau* ki avan ti apel *Department of Administration* an Fevriye 2022. E ler i ti komanse i ti dir ki dan son rol e avek sanzman non dan sa biro ki pou retir lanfaz lo ladministrasyon e i pou met lanfaz lo sirveyans travay e modernizasyon.

I ti dir ki sa travay pou ganny fer ansanm avek Minister Finans, *Economic Planning and Trade* e lezot Minister. E i ti dir ki sa travay pou ganny pran a ker par *Departman of Information Communication and Technology DICT* ansanm avek son biro pou zot kapab pran sa davans dan pei pou zot anmenn *digitalization* Sesel.

Nou ti vwar en zouti i apel *result-based management* ki ti ganny servi pou fer evalyasyon bann rezulta e asire ki bann aktivite ki ganny fer i

anmenn sa rezulta final ki nou pe rode.

Enn ban keksoz ki Miss Mohideen in fer in met lanfaz bokou lo edik bann *decision-makers*. Nou'n vwar poudir i annan diferan faz ki in met an plas pou travay lo sa *Result-Based Management Training* ti annan 3 faz. 3enm faz ti fer an Out 2022 e i ti annan 30 partisipan, 3 zour *training*.

I host annually *human resource forum* e i fer sa bann *forum* ansanm avek bann zofisyen sorti dan diferan departman ek Minister Gouvernman. Ki i fer ki i annan apepre 30 a 40 zofisyen ki attend sa *forum* tou le lannen.

E zot vin ansanm pou zot regarde kote ki pei in arive, e ki bann target ki zot bezwen kontinyelman travay lo la.

Nou'n vwar ki resaman ti annan 27 CEO ek bann zofisyen senior dan Gouvernman ki'n al *Abu Dhabi* pou en *training* spesyal baze lo *leadership*.

An Novam lannen pase, Mrs Mohideen ti anmenn en programm pou reviz saler 2 group dimoun dan Gouvernman. Sa ti bann dimoun dan *ICT*, ek bann dimoun *HR*. Sa ti anliny avek en lanons ki Minis Finans Naadir Hassan ti'n fer dan adres Bidze.

I dir nou ki nou bezwen fer sa revizyon, akoz

Gouvernman in anbark dan sa *digitalization program* dan en fason entans pou nou kapab *facilitate* bann servis ki biznes pe rode.

E sirtou bann servis ki piblik an zeneral i vin rode letan zot vin dan en Biro Gouvernman. Me nou'n bezwen revwar sa bann saler, akoz sa sekter i en sekter kot nou pou perdi nou bann dimoun Sekter *ICT* si nou pa pey zot byen an mezir ki zot ganny plis leksperyans dan zot lanplwa zot pou kite.

Alor, nou bezwen fer sa sekter ek sa bann louvraz *ICT* pli atiran. E sa i enn bann rezon akoz ki nou'n bezwen regard zot striktir saler. E akoz pei pe bouz anver en servis teknolozi. In dir nou ki nou bezwen osi regard saler nou bann *human resource managers*. Laplipar nou dimoun ki travay dan *HR* isi Sesel Mr Speaker, i bann zeneraliz e non pa bann spesyalis.

Ki fer ki dan zot travay toulezour menm zot fer zot rol *HR*, zot pa toultan pe fer zis sa louvraz. Me zot osi fer louvraz administrativ, e Gouvernman i pran sa konsiderasyon e in kouver sa group dimoun pou zot osi ganny en *review* dan zot saler.

E zot ti osi entrodwir *Human Resource Management System* ki li i ti pou met bann

fonksyon *Human Resource Management* dan en format elektronik ouswa *digital* dan pei.

A sa menm moman ki i ti fer sa lanons, i ti osi dir nou ki an Novanm 2023, nou ti annan nou tou bann *human resource practitioners* dan Gouvernman ti pe pran en *training* kot *Guy Morel*. Sa ti pou ranforsi zot konesans lo bann topik *human resources*, tel ki *Effective Performance Management, staff welfare* e fer bann travay *counselling*.

Ti annan an total Mr Speaker, 120 zofisyen *human resource* ek 100 travayer *IT* ki'n benefisyen avek sa nouveau *scheme*.

E letan nou pe fer sa kalite lenvestisman, i fer ki nou annan en lekspektasyon ki Sekter *Human Resource* dan tou piblik kot travayer pou al travay zot lanvironnman pou pli bon. Zot pou anmenn plis prodiktivite, e sa bann devlopman ki zot le lo kote teknolozi i pou ganny met an plas akoz nou pou annan en tim *IT* ki pli motive.

Me par kont i pa ti bliy lezot travayer, akoz i ti anons nou osi ki sa *scheme* tou travayer i enportan. E anmezir ki pei i kapab tou lezot *scheme* osi pe ganny regarde. Tou sa i ganny fer pou nou donn en *service delivery* pli bon pou piblik.

Mr Speaker, en lenvestisman dan bann nouvo *platform* par Minister Finans atraver Bidze dan bann lekipman pou vreman transform nou Gouvernman.

E lefe ki Minister Hassan in angaz li pou regard saler 2 group dimoun *IT people* ek *Human Resource*, i montre ki i angaze pou met sa finansman letan i disponib dan bann tel kalite lekipman.

Mon a donn en legzanp Mr Speaker ki mannyer teknolozi i kapab ed pei e retir en pe *red tape*. Annou pa blyie sa sistem ki nou annan ozordi lo kote formalite i bokou bann sistem ki nou'n erite.

Anmezir ki nou'n vin o pouvwar, dernyen fwa ki letan nou'n vin o pouvwar sa bann keksoz i keksoz ki nou'n zwenn la. Fodre pa pep Seselwa i blyie ki nou pei apre ki nou ti ganny eleksyon, nou ti'n *shut down*.

Pou premye fwa dan listwar lemonn, ti napa okenn mouvman ant pei. Sitwayen ti reste kot zot, naryen pa ti pe bouze. Ti napa okenn aktivite ekonomik, premye fwa en pei i pas ladan.

Mr Speaker, mon ti a kontan piblik Seselwa i mazinen ki si Parti US ti o pouvwar pandan sa letan, konbyen tan zot krwar ti pou pran nou pou nou sorti? Akoz zot fason fer Mr Speaker. I pa

zanmen bann solisyon, me zot anmenn bokou problem. Nou'n vwar avek en Gouvernman LDS nou'n kapab vitman rekonstri pei e ouver pei pou nou kapab refer fas e resevwar bann servis sirtou reouver Sekter Tourizm.

Mr Speaker, letan nou pe koz lo teknolozi ki nou kapab met an plas, annou regard Biro Rezistrar. Lofis Registrar si nou get lo kote biznes ek later okenn devlopman ki en dimoun ti a kontan fer, i bezwen pas atraver sa biro.

Savedir si ou vin kot sa biro ozordi, ou anvi ouver en biznes en biznes anrezistre ouswa *sole trader* ou vini ou anmenn tou ou dokiman zot anrezistre zot met dan *file*, zot donn ou, ou kopi.

Letan ou sorti laba, ou bezwen al kot SRC pou ou depoz sa menm dokiman, pou ou ganny ou en *tin number*, pou ou kapab pey taks lo la. Pou ou kapab prosede pou ouver sa biznes ou bezwen al kot *Licensing* pou al rod en *license*. E ankor ou bezwen depoz menm dokiman.

Annou mazinen Mr Speaker, si kot Biro *Registrar* nou ti annan en sistem elektronik ki en fwa en biznes in anrezistre *internally* bann lezot Departman Gouvernman, savedir letan ou pou al kot Taks, taks i annan kopi sa bann dokiman.

I konnen i otantik, i konnen ou'n fini peye, ou'n fini ganny ou bann dokimantasyon menm parey avek *Licensing*. Sa kalite *platform* i a fer ki sa dimoun i pa bezwen sorti kot *Independence House*, al *Maison Collet*, koup semen ouswa pran son transpor al rod en *parking Orion Mall* pou li al kot *Licensing* zis pou fer sa bann traze. E i pran dimoun letan, i pran letan pou sa biznes *setup*.

E sa i bann keksoz ki Gouvernman i bezwen pran an men. E letan larzan i vin disponib, envestir met dan Bidze pou ki nou kapab annan sa kalite lenvestisman pou retir bann retar. E tousala nou kapab met li dan diferan sekter.

E *by the way* nou ankor pe esper sa sistenm elektronik lasante ki ti ganny *setup* en kantite letan pase anba Gouvernman US. Me ptitapti nou war zefor pe ganny mete pou sey *set li up*. Me vreman in tarde en kantite.

E *hopefully* ki letan la i pe ganny met an plas, nou osi pe envestir pou met bann teknolozi bann *latest teknolozi* pou siport sa sistenm. Nou vwar osi ki la resaman an Mars 2024 ki Sesel ansanm avek *UAE*, in siny en *memorandum of*

*understanding* pou moderniz e transform *public service*.

Ankor i montre ou Mr Speaker, ki mannyer Gouvernman li i Gouvernman LDS dan sa dernyen 3 an. I pe met lanfaz lo konstri en Servis Piblik ki kapab ganny *trust* piblik, e ki kapab delivre. I pe sey son mye e i pe montre atraver zefor.

Sa *MOU* ki'n nou'n sinyen i pou 3 an. E sa proze li i *aim* pou donn sitwayen sa servis mazik ki tou dimoun pe rode *from* son Gouvernman. E li i pe fer li pli vit pou rod solisyon pou fer li dan en fason pli vit posib.

E mon espere Mr Speaker, ki nou tou nou gard sa antet. E nou swivre sa prosedir travay pou nou siport nou Gouvernman pou nou kapab fer li vin en lakonplisman. Tou sa bann aksyon Mr Speaker, Gouvernman pe pran se pou amelyor servis piblik.

Byensir nou tou nou konnen, se dimoun ki rann sa bann servis. E fason pli meyer pou delivre sa, se pou anmenn plis loportinite pou nou bann travayer ki osi anvi relev zot nivo training Mr Speaker.

Atraver Minister Ledikasyon Gouvernman in siny en *MOU*. E ti annan en dimoun ki ti deryer sa pou pouz byen for avek en Liniversite e *UNICAF*. E la i

annan en serten sonm larzan ki disponib pou bann travayer Gouvernman, ki dan servis piblik ki ti a kontan pran en degre.

Ki ti a kontan ganny en *higher* nivo ledikasyon dan son travay. E si i ti a kontan pran en degre, Gouvernman i pey en morso a en pri vreman ba. En *Bachelor's degree* Gouvernman i bezwen pey zis \$2000 par an.

En *Masters* \$2500 par an, en *PHD* \$5000 par an. Fodre nou mazinen nou piblik i konnen ki *UNICAF* i akredite par *Higher Educational Authority of Zambia* e *British Accreditation Council*.

E anba *UNICAF*, bann ki pa oule swivre direkteman avek *UNICAF* i annan loportinite osi pou li fer son letid avek Liniversite Britanik. I annan 3 Liniversite. *University of Suffolk*, *Liverpool John Moores University* e *University of East London*.

Savedir okenn dimoun ki'n antre dan sekter servis piblik e ki ti a kontan li elev son nivo ledikasyon sa i disponib dan tou Minister, zot kapab apros zot *HR*, e regarde ki mannyer zot kapab tap dan sa fon ki *UNICAF* in met a zot dispozisyon.

Mr Speaker, bann keksoz ki nou'n tandé osi ozordi apre Mosyon bokou nou in koze nou'n tandé ki i annan

dimoun ki menm en sourir zot pa gannyen dan en biro.

Ki zot antre dan en biro i annan serten dimoun si zot telefond mobile i sonnen, zot pou pran sa *call*. Zot pou kontinyen koze zot pe *ignore* sa kliyan.

Mr Speaker, sa bann keksoz pa tou dimoun dan sekter piblik ki reakte koumsa. Souvan ou antre dan en biro, bokou dimoun i donn ou en *smile* e i donn ou sa servis. Me fodre pa nou inyore sa bann serten ki fer sa bann keksoz.

Alor, an mezir ki nou met lanfaz lo bann *training* teknik, mon ti a kontan demann Gouvernman osi ki i met bokou lanfaz lo *customer service*. E i fer sir ki tou *staff* i konnen ki letan zot pe zwenn en manm piblik ki zot bagaz akademik i pa le sel keksoz kriter ki sa piblik pe regarde, e sa fason osi ki mannyer i ganny akeyi, i vreman enportan.

Mr Speaker, Onorab William in koz lo en keksoz vreman enportan. In koz lo delegasyon pouvwar, e sa osi i en nouvo fason regarde Mr Speaker. Akoz nou'n erit en sistèm kot ou ganny dir ki ou pou fer e ou bezwen fer. E si ou pa fer gar ar ou.

E i fer ki bokou dimoun i annan serten lafreyer pou li delivre dan sekter piblik. Si

entel pa la, mon pa kapab fer naryen, mon pa kapab siny papye. Mon pa kapab donn en desizyon.

Mon pa kapab dir ou sa i en keksoz ki nou bezwen liber nou bann *civil servants*, pou zot kapab vin *innovative*. Letan zot annan zot abilite akademik, zot pou kapab annan konfyans dan zot abilite pou zot kapab rann en servis san esper *boss*. Si i pa la naryen pa fonksyonnen. Sa Mr Speaker, i en gran pa ki apre zis 3 an nou, nou kapab liber nou *civil servants*.

E dan sa transformasyon, ki nou ti koz lo la, sanzman ki nou ti koz lo la definitivman *there is something called Change Management*. Sa osi i en keksoz ki *deal* avek dimoun. Sanzman wi, ou pe met li an plas novo fason fer. Me dimoun ki'n dan en sistèm pou en kantite letan, zot war li difisil pou zot adapte avek sanzman.

E letan nou war en kote en parti politik sirtou la dan Lasanble Nasyonal, akoz i en *platform* piblik kot dimoun pe ekoute, zot servi zot letan dan domenn piblik pou zot pa ankouraz dimoun pou annan en lespri pozitiv, me selman senm negativite, ek zot bann lagrenn negative, sa Mr Speaker, i move pou nou pep. Me selman *Change*

*Management* i en keksoz ki nou, nou bezwen fer fas avek.

E sa osi mon demann Gouvernman pou regard li byen pre. Akoz i en *field* vreman spesyalize. E ki nou rod bann dimoun spesyalize pou anmenn bann *training* pou bann *leaders* ek bann lezot *staff*, pou kapab fer fas avek sa bann sanzman san lafreyer. Akoz nou pou annan sanzman Polisi, sanzman prosedir, sanzman stratezi zot bezwen konpran tousala Mr Speaker.

Mr Speaker, Onorab Cosgrow in dir nou ki Mosyon i pou Gouvernman, i vize ver Gouvernman. E nou, nou pe adres *civil servant* endividyeleman. An tou leka Mr Speaker, li ki pe akiz en PS ki pe anpes dimoun al *rally* Anse Aux Pins. Zot, zot konnen laplenn pou vid Anse Aux Pins.

Prezan avan *rally*, i pe rod en leskiz pou li dir nou akoz laplenn ti vid.

**(APPLAUSE)**

### **HON FLORY LARUE**

Mr Speaker, ozordi Onorab Wallace Cosgrow i en *ex-Minister*. I annan *immunity* dan Lasanble Nasyonal, si li i konn sa PS e anvi ed nou Gouvernman pou tir ek nou pa ek nou ki dir nou *entertain* i a

nonm sa *PS* i a dir nou lekel.  
Apre nou a gete ki nou pou fer.

**(APPLAUSE)**

**HON FLORY LARUE**

Mr Speaker, ou letan in fini ou.

*(Interruption)*

**MR SPEAKER**

20 minit Onorab.

**HON FLORY LARUE**

Mersi Mr Speaker. Mr Speaker, koman en pei nou, nou PE montre sipor pou bann dimoun ki diferan avek nou. Nou pe siport Mr Meriton pou li al debout dan eleksyon 2025 pou *Chairperson African Union*. Pei in sanze i annan transformasyon Mr Speaker.

Mr Speaker, zot annan zis 3 bi zot laba pou 2025. Retourn pansyon laz 63 an, donn *long service allowance*, rann 13enm mwan saler menm ki napa travay pa travay donn 13enm mwan saler. Zot anvi zis fer pei faid Mr Speaker.

**(APPLAUSE)**

**HON FLORY LARUE**

Mwan pou terminen la Mr Speaker, nou ti erit en sistem kot servis piblik ti en karyer permanan. Mr Rene in vini in kraz tousala, in fer *PS* vin

Minis. In met *security clearance*, in trenn tou *public servant* dan labou fer zot vin politisyen. Ozordi, nou, nou pe retir sa.

Mr Speaker, mon remersye tou dimoun e tou Seselwa. Me sirtou tou bann *civil servant* ki nou met valer lo ki nou, nou met valer lo la akoz nou'n montre zot sa slogan Sesel pou tou son zanfan e nou pe *live by it* Mr Speaker.

Nou krwar ki zot sel konstan ki nou pei i annan, zot par lao politik. Pou ler parti politik i ganny pouvwar pou antre dan Ladministrasyon, se sa ki nou ti a kontan vvar ki zot, zot reste la permanan e pa sanze. *Team spirit* Mr Speaker, nou tou koman en tim...

*(Interruption)*

**MR SPEAKER**

Konklir Onorab, konklir.

**HON FLORY LARUE**

Mr Speaker, team spirit. Nou tou koman en sel tim Mr Speaker, non pa dan non parti me dan non Sesel. Sesel pou tou son zanfan Mr Speaker!

**(APPLAUSE)**

**MR SPEAKER**

Mersi Onorab. Onorab Pillay.

## **HON SEBASTIEN PILLAY**

Mersi Mr Speaker. E bonn apre midi, bonswar tou dimoun ki pe swiv Lasanble Nasyonal. En bonswar spesyal pou tou bann *public servants* ki pe swiv Lasanble Nasyonal. E ki pe ekout sa deba, e ki mon konnen bokou zot i annan in fini malerezman zet zot televizyon deor, in zoure, in maltrete.

E sirtou dernyen entervenan ki'n koze, i annan menm i pa zis kraz son televizyon, me in zet son radyo tou. Akoz si ti annan en pli gro *garbage* ki zot in kapab tande se sa ki'n ganny dir zis avan la.

Ou pe ganny en dimoun koumsa ki pe donn konsey *public servant*. Ou pa ni *fit* pou tous pti ledwa, dernyen *public servants* dan *public service* ou. *It's unfit* pou ou *challenge* okenn *public servant* vizavi zot konpetans.

*In fact*, dan sa Lasanble, nou *unqualified* pou nou kapab menm tous e koz *public Servant* when it comes to pa reponn telefon. Annou arete sa kalite zafer pou maltret bann dimoun ki travay dan servis piblik. Akoz zisteman Mr Speaker, zisteman atraver ou parti ozordi ou bann *MNA* ki'n ganny elekte dan distrik zot menm parmi premye ki pa reponn telefon dimoun.

E se pou sa rezon 2025 dimoun pou tir zot. Se pou sa

rezon laplenn Anse Aux Pins pou plen. *This is the reality* Mr Speaker. Ou konnen Mr Speaker, ler ou vin dan Lasanble ou vin avek en Mosyon. Ou vin avek en Mosyon e ou dir ou pe demann avek travayer dan servis piblik. Ou pa ni dir konbyen travayer dan servis piblik i annan, *ok*.

Premyerman ou ti devret dir nou poudir dan servis piblik, i annan an tou 10716 travayer. Dan bann parastatal i annan 8413 e dan sekter prive i annan 35803 travayer dapre dernyen statistik ki ti ganny kolekte pou dernyen kar lannen 2023.

Parmi sa bann travayer ki ou pe koz lo la, dan sa 10,716 ki dan Gouvernman direkteman, 6084 ladan i trouve dan servis ladministrasyon piblik, ladefans e larestan i bann lezot ki zot in groupe. 2517 i dan ledikasyon, e 1954 i dan *human health* e *social work activities*, ners. Ou vin koz ners avek *teachers* travay plis, kan ou'n koup *long service allowance* *nurse* ek *teachers*? You should be ashamed of yourself Onorab!

Dezyenmman Mr Speaker, pou vin koz avek bann administrative and bann *support staff*, *support activity staff*. Kan ou'n koup zot *performance bonus*, ki zot ti

sipoze gannyen *amalgamate* li e prezan zot pa ni ganny rekonnet zot bann *skills* ki zot annan. Mr Speaker, *this Assembly* pe gat letan ki nou ti kapab servi pou fer lezot keksoz apre midi la.

**(APPLAUSE)**

### **HON SEBASTIEN PILLAY**

This is *rubbish* Mr Speaker, *rubbish!* Prezan mon a dir akoz i *rubbish*, akoz si i annan en Gouvernman ki lalang, i sa enn ki la o pouvwar Mr Speaker!

**(APPLAUSE)**

### **HON SEBASTIEN PILLAY**

Mon annan devan mwan la, mon pou re mete bann *verbatim* Lasanble Nasyonal ler Mr Ramkalawan ti dan Lasanble kot in servi mo "lalang" dan lepase e li i ti ganny dwa fer. Me kot in menm dir, kot li in menm dir *the buck stop with the President! The buck stops with the Minister! And fact*, dan son SONA i ti menm dir si en Minis pa reponn telefonni pou *deal* avek sa Minis.

Ou kapab konte lo ou ledwa konbyen Minis ki reponn telefonni piblik la. Selman zot, zot le ziz sa travayer ki pli ba dan sa departman. Me annou regard

Lepet Seselwa ozordi apre midi, pli gro kontradiksyon ki annan. Ou konnen LDS i *remind* mwan sa poul, sa kok ki sante la Kokoriko, *ok?* I paret mwan in blyi son ler ki ler pou li sante ozordi li Kokoriko.

E i pe dispit laba lot kote, mon pa konnen. Me selman in blyi son ler ki pou sante. Akoz Mr Speaker? Mon a dir ou akoz, ki arive LDS i dir ek nou koumsa poudir ler tou Minis i vin la. E mon oule tou travayer sekter piblik i ekout mwan byen la. I dir ek nou koumsa poudir tou Minis pe byen travay. Mon felisit ou Minis pou travay ki ou Minister pe fer. Be lekel ki travay dan sa Minister?

**(APPLAUSE)**

### **HON SEBASTIEN PILLAY**

Si pa travayer servis piblik ki travay dan sa Minister, lekel ki travay? Me pa sa bann travayer servis piblik? Me eski zot nou bann MNA, eski nou lekel ki pou anmenn Mosyon lo nou, si nou oule anmenn Mosyon lo nou kanmarad? Lekel ki pou anmenn Mosyon lo nou, kan nou ganny proteze par Speaker, nou ganny proteze par nou parti par mazorite?

Lekel ki pou anmennen? Selman nou, nou annan drwa

kritik tou dimoun. *In fact, Onorab Henrie, i konn tou le 20 dimoun ki ti dan US ki dan Gouvernman. Me akoz ou pe vey zot afilyasyon? Ou'n deza menm dir poudir si en dimoun i met son sticker lo poto, ou pou monte ou pou tire. Ki sa, oule tir sticker lo sa bann dimoun? Is that what it is? Mr Speaker, this is rubbish ankor. Garbage in garbage this is what LDS stands for!*

E mwan pou mwan sa ki pli enteresan Mr Speaker, sa ki pli enteresan ozordi apre midi nou gat letan Lasanble pou diskit en Mosyon, en Mosyon ki pou demande?

Travayer servis piblik travay pli byen. Me akoz ou pa demann bann Minis pou travay pli byen? Akoz ou pa demann bann PS pou travay pli byen? Non, non, non Mr Speaker, zot, zot *above the law*.

Ou konnen akoz zot *above the law*? Ou konnen akoz zot *above the law*? Akoz menm ler Lapolis i dir zot arete dan *roadblock* i tir fizi zot kapab taye, ale foulkan kasyet kot zot pe ale. *Above the law, this is what it is.* E i annan menm MNA ki *above the law*, akoz zot tap ek loto dimoun personn pa kapab aret zot. *This is how it is* Mr Speaker ozordi dan nou pei.

Mr Speaker, Mr Speaker, dan nou pei nou bezwen

etablir en keksoz fondamantal. Lasanble Nasyonal i la pou li travay, e i la pou li travay dan lentere Lepep Seselwa. Me pou nou kapab fer nou travay dan lentere Lepep Seselwa, fodre nou aret blanm lezot dimoun pou lefikasite lezot dimoun ki pa pe travay or nou prop lefikasite.

Par egzanp Mr Speaker, mwan mon ekout tou bann kritik ki dimoun i avoye par egzanp lo Lasanble Nasyonal, i dir nou demann bann pli bon kestyon.

Mon oule demann pli bon kestyon, me ou, ou sanz mon kestyon ler mon avoye. Ki mannyer mon kapab demann pli bon kestyon? *That's the truth, it's the cold hard fact...*

*In fact, mon pou er Lepep Seselwa konnen apre midi, e mon pa mind ganny problem pou sa. Ki mannyer ler mon avoy en PNQ, i pas 4erdtan a 5erdtan avan mon ganny larepons lo si mon PNQ pou ganny admet oubyen non. Akoz mon PNQ, mon konvenki i al State House avan. Mon pe dir sa Mr Speaker, akoz *is the truth, is the truth*. E...*

*(Interruption)*

## **MR SPEAKER**

Onorab! Silans silvouple. Onorab, mwan ki *deal avek PNQ*, mon pran responsabilite

pou *PNQ*. E ou pa bezwen fer okenn lakizasyon kont mon desizyon. Silvouple, mon pe dir ou evite, e mon pe dir ou reste annord sansan mon pou aret ou *speech*.

### **HON SEBASTIEN PILLAY**

Ou kapab bat mwan, ou kapab touy mwan, ou kapab montre mwan ledwa, mon pa pou zanmen aret defann Lepep Seselwa e...

### **MR SPEAKER**

Onorab! Mon pa aksepte ki mannyer ou pe koze. E mon pe termin ou ladres la.

**(APPLAUSE)**

*(Interruption)*

### **MR SPEAKER**

Onorab, si ou pa gard lord mon pou demann ou pou sorti dan lasal. Onorab John Hoareau, i a fer son *summing up*.

*(US members walked out of the House)*

### **HON JOHN HOAREAU**

Mersi Mr Speaker. bonn apre midi ankor tou dimoun ki a lekout *cette* apre midi. Se avek gran plezir ki mon pou reponn. Se avek gran plezir ki mon pou reponn Mosyon ki'n ganny debat dan Lasanble

ozordi bomaten e apre midi. Ankor enn fwa nou vwar koman en group *coward* i kit Lasanble.

**(APPLAUSE)**

### **HON JOHN HOAREAU**

Mr Speaker, mon oule remersi premyerman tou bann dimoun ki'n koze ozordi, ki'n entervenir lo sa Mosyon in parfwa en Mosyon ase anrisisan, en bann deba anrisisan kot nou'n tras en pti pe ki si sa *public service* dan nou pei e ki natif *public service* dan nou pei. E ki fason nou kapab amelyor sa servis.

Mr Speaker, parey mon Mosyon in dir ki nou oule felisit premyerman bann travayer dan servis piblik. E mon krwar poudir lo nou kote tou dimoun in felisit bann travayer dan servis piblik.

**(APPLAUSE)**

### **HON JOHN HOAREAU**

E san fer plis ki sa, mon pou dir ki Sesel nou'n pas dan 2 gran kalamite san presedans. E sa in montre nou ki rezilyans nou pep i annan e ki rezilyans nou servis piblik i annan.

Premyerman nou'n pas atraver *COVID* ki montre kot sekter lasante in *pull up* tou

*zot resources e zot in stretch to the limit.*

I annan ners, i annan dokter ki menm pa'n pran konze pou 1 ou 2 an zis pou zot kapab travay e ede pou konbat sa pandemik isi Sesel. E la mon oule tir sao avek Dokter Louange, Dokter Gedeon e tou bann lezot travayer Lasante dan pei ki'n ede dan sa lalit.

Mr Speaker, i pa'n fasil nou'n vwar ki sa i en bon legzangp kot en Sekter Piblik in kapab met tou resours ansanm e ede pou anmenn pei a lavan.

Ankor Mr Speaker, nou retourn lo le 7 Desanm kot dan mon distrik dan bann distrik dan Nor nou'n temwannyaz gro lapli, move letan. E osi an menm tan ti annan en leksplozyon ki'n frap distrik mon zanmi Onorab Monthy Cascade.

E pandan sa letan, nou bann MNAs avek nou bann DAs ek bann dimoun kot Gouvernman Lokal enkli tou bann lezot lazans konsernen ki annan pou fer avek dezas in *pull tou resources together.*

E nou'n vwar kot ankor enn fwa in montre nou grander lespri, e grander rezilyans ki nou'n kapab anmennen pou kapab met sa bann sityasyon anba kontrol. Nou'n travay depi son Zedi

bomaten, ziske son plizyer semenn ki'n swiv.

E Onorab Monthy i dir mwan li in ale *up to more than 3 weeks* pou li kapab seye met sityasyon anba kontrol. E fer sir ki nou tou nou vwar sa bann dimoun, e nou asiste zot kot fodre asiste pou fer zot lavi retourn normal.

E se sa kalite lespri dan Servis Piblik ki mon kontan e apresye pou vwar, e mon oule tir sao avek. Mr Speaker, nou militer osi in ede, nou Lapolis in ede. E ensi ki lezot departman dan Gouvernman ki'n montre sa rezilyans. E nou isi kot sa Lasable, mon fyier pou dir ozordi ki nou, nou toulstan vote pou dan Bidze pou siport servis piblik avek en Bidze pou zot kapab fer zot travay.

Tandi ki lot kote latab, zot plifere sove, zot taye e zanmen zot vot pou Bidze. Zanmen zot siport Servis Piblik menm zot pe fer tou sa tapaz. Mr Speaker, bokou keksoz in ganny fer resorti lo nou kote latab lo size *RBM*, lo size 13enm mwan saler ki en *performance oriented* ki 50 poursan i *performance orientated*, ki fer sir ki nou ed servis piblik pou ed son lekor.

Nou donn zot sa serten gidans ki zot kapab ogmant zot performans e zot ganny rezulta e zot *enjoy* fri zot travay. Mr Speaker, bokou bann

Manm in koz osi lo kondisyon travay lo retir politik dan travay. Bokou bann Manm in koz lo valoriz lekselans, e retir medyokrite. *Teamwork* fer sir ki bann dimoun i konpran byen zot *job description*, bon latitud e etik dan travay, retir birokrasi, *delegation of responsibilities* pou montre kontinyite ki ler dimoun pa la son travay i kontinyen.

Montre lanmour pou ekout kliyan e fer sir ki nou pran nou responsabilite o serye. Nou'n fer resorti bann defi osi parey mankman travayer dan serten lofis, mankman resours osi dan serten lofis.

Benefis ki *public service college* ki nou dir *TGMI* pe fer dan nou sekter *public service*. I annan osi ki'n koz lo desantralizasyon, i annan ki'n koz lo fason ki dan ladministrasyon avan dan lepok Prezidan Rene sa *security clearance* in gat tou keksoz, in gat servis piblik.

E wi sa lepok si ou pa ti sipor *SPPF*, ou pa ti pe gannyen en gro plas, oubyen en plas responsab lo *senior management*. Tousala, ti'n ganny rezerve zis pou en serten group dimoun.

Mr Speaker, ler mon ekout lot kote latab ki zot kontribisyon ki zot in fer ozordi? Onorab Loze in vini in dir nou koumsa poudir in

afirmen li menm, in konfirmen, pou dir si zot, zot vin o pouwar an 2025 zot pou fer sorti bann *civil servants* ki pe pran bann o responsabilite koman ros dan fles.

Zot in osi konfirmen, in osi dir ki nou dan *LDS*, dan ladministrasyon *LDS* nou pe anmenn sa prensip ek nou pa ek nou. me Mr Speaker, sa menm Onorab si nou ti pe anmenn ek nou pa ek nou ozordi zour petet son lavi pa ti pou an egzistans. Parske i ti byen malad e nou pa'n gete si i avek nou, si i pa avek nou, nou'n fly li aletranze e in ganny tou son medikal, in retournen ozordi e i a pe koz bon labous.

Mr Speaker, in koz lo 30 an pase ki nou, nou pa'n edik sa pep. Me selman sa ki i pa dir nou, se ki 30 an pase nou ti bezwen met laliny pou ganny materyo konstriksyon. Nou ti bezwen pou nou kit Sesel nou pa ti annan drwa sorti avek plis ki \$200 akoz ti napa. Savon, dile zonnyon e lezot komodite esansyel ti ganny vann anba tabli, akoz ti napa ase pou met deor. Nou ti bezwen ser sang, ser sang ziska ler vant ti pe pete.

Mr Speaker, nou'n menm ganny dir ki si zot retournen, zot pou return avek 13enm mwan saler pou fer sir ki tou dimoun i ganny 13enm mwan

saler, travay pa travay ou a ganny ou 13enm mwan saler.

Nou'n ganny dir osi ki laz pansyon pou retourne 63 an o defi lanons ki bann dimoun ki fer sa letid lo bann profesyonnel ki'n fer sa letid pou montre ki i pa pou soutenab a laz 63 an.

Savedir ki sa bann dimoun pe dir nou? zot oule fer faid sa pei parey zot ti fer an 2008 e 2012. Zot bann dimoun ki irresponsab, zot bann dimoun ki pa pe mazin demen pou zot zanfan demen benefisy avek en pansyon. Si ou kalkile i annan 40 zot an plis 1, savedir zot sef avek 40 zot. I zis parey sa zistwar Alli Baba ek son 40 voler.

**(APPLAUSE)**

### **MR SPEAKER**

Onorab, evite apel bann *MNA* voler. Evit bann lakizasyon.

### **HON JOHN HOAREAU**

Mon a retir sa zafer 40 voler, *ok* Mr Speaker mon a kontinyen. Onorab Cosgrow, in vini i n dir nou koumsa poudir *ASP* ozordi pe pran 3 mwan pou en dimoun gannyen en servis. Sa ki sa menm Onorab pa dir nou, se ki anba li menm li koman Minis sa letan, zot ti fer sir zot ti met lanmen dan kof Gouvernman. E plis ki 1.5 milyon ti ganny vole.

E i annan dimoun ki ozordi in ganny *convicted for that offence* Mr Speaker. Anba son Minister dimoun ki ti mor, ki ti pe ganny peye. Tandis ki sa ki vivan, li i ti pe espere e i ti li menm li a son tour i ti bezwen mor.

E apre ler i ti a mor i ti a ganny sa larzan. Mr Speaker, Onorab Aglae in koz lo en mansonz ki mon bezwen met en leklersisman, *Fitch Rating* in dir nou koumsa poudir an 2023 *GDP* in ariv par lao *USD17 mil*.

Me li ki'n dir nou poudir an 2019 *GDP* in pli o ki zanmen. In pli o ki tou sa letan ki menm Ladministrasyon *LDS* pe diriz sa pei. Me menm fitch rating in predir ki *GDP* pou mont par lao *USD18 mil by 2025*. Mr Speaker, ler nou pe get sa Mosyon i en Mosyon ki responsab. I en Mosyon ki malgre serten dimoun in al dan tou direksyon avek. In fer politik avek, me i en mosyon ki serye. I en Mosyon ki demann travayer pou azir dan en fason profesyonnel.

Reponn sa lapel ki Prezidan in dir pou nou ganny en servis piblik ki profesyonnel. E ki a lekspektasyon nou pep, se tou ki sa Mosyon pe dir. E i pe osi an menm tan felisit tou dimoun ki'n travay dir oubyen ki ankor pe travay dir dan

servis piblik, pou fer li avans de lavan.

Mr Speaker, bokou in ganny dir depi bomaten e mon fyer ki ozordi le 15 Me ki sa Mosyon in ganny debat dan Lasanble, nou'n komans en konversasyon lo sa size.

E mon ekspekte ki Egzekitiv i a pran sa bann rekomandasyon ki'n ganny fer par Lasanble, e ki pou ganny transmet avek zot koman bann rekomandasyon serye. E nou Servis Piblik i ava al de lavan, e nou pei i a mars de lavan. E vot toulstan *LDS* pou nou pa les sa bann voler antre dan nou pei.

**(APPLAUSE)**

**MR SPEAKER**

Bon. Manm i aprezan vot lo Mosyon. Parey ki in ganny eksprimen. Les mwan rapel bann Manm ki zot pe vot lo la. Mon a lir Mosyon ki'n ganny prezante koumsa;

Lasanble Nasyonal i felisit tou travayer servis piblik ki pe fer zot travay byen e konsyansyezman pou benefis nou pei. E demann avek lezot pou travay, e pou azir dan en fason profesyonnel a tou moman. E donn zot kliyan meyer servis posib, avek bi pou retir fristrasyon e ed nou pei avans devan.

Manm ki an faver lev lanmen silvouple? Mersi. Tou Manm prezan in vote. Lo Mosyon ki devan Lasanble 22 Manm in vot pour, 0 kont e 0 *abstain*. Alor Mosyon in aprouve par Lasanble. Bon, nou'n arriv a lafen travay pou ozordi e pou sa semenn. Mon a remersye bann Manm pou zot kontribisyon. E Lasanble i ava *adjourn* ziska Mardi prosen. Mersi.

**(ADJOURNMENT)**



